

WOTET

Yowbad Kululuwan Bwanabwein

1 ¹⁻²Kalin nuwag Tiyopil yakoum. Kweitan livan kweiboug nalel neiw. Let towen wanuwan nalel livanen Yeisuw. Yeisuw isilamaw nawotet babaw o nageiguy, iwwotet ee... tutan iyakous nakatimlakay nagamag wasigeis, mo imwen in walbalab. Peinan bo nikatigikes nagamag tasiyas silmanin anilivan bikokews; ikatimlakes waseg Kululuwan Yowbad, ikous, mo imwen in walbalab.

³Peinan kweiboug mwasanin niyagages Yeisuw, imat, ikit vayuwein; sona mwamovan mo inekes nagamag tasiyas; ikines nawotet tawtouna singay; e, tasiyas isimounids bo imov, peinan siney inounas sinawavas yam waseg, ikkines Yeisuw, o sinapun Yowbad inakaleiwag Yeisuw bo ikatimlakes.

⁴Misumkwey siney nagamags nikatuyouns nisesus, Yeisuw idibakes, ilana, “Awoum kunounas; tage kukwayamats Yelusalem waseg; Tamag mo bikayeb teitan gamag biwekeimiy vagan kid bilabeimiy; kweiboug nikatigik mawan, o yey nadibakeimiy mawan.

⁵“Peinan kweiboug Yon nibaptayses gamags, soup waseg; tage igaw tut nag biveiyov, Yowbad mo bibaptayseimiy yakamiy, waseg kululuwan tatonen.”

Yeisuw imwen in walbalab

⁶Katuyouns tasiyas mo ikatiganes Yeisuw, ilansa, “Tamwey, tabta bukuvag vayuwein bitawtoun dakaleiwags, yakids min-Yisleil, mawana kweiboug? Tut towen bukuvag mawan? o nag? igaw?”

⁷Yeisuw ikatimop asilivan, ilana, “Tamag nawotet towen. Nag kadilokeimiy bukukwakins avei-tut o avei-yam Yisleil vayuwein mo bitawtoun; peinan takaleiwag anmwanet Tamag.

⁸“Tage yakamiy miwotet kweitan. Igaw Kululuwan Town Bwanabwein biwekeimiy, bikimtuweimiy vagan bukusekes livaneig min-Yelusalem wasigeis, o min-Yudiy asibabaw-wan, o min-Samaliy wasigeis, o vena babaw wadaban pwepway.”

⁹Igawa illivan māwan o ikkines; Yowbad mo ikow, inow, ilakanig-o lov kweitan wanuwan.

¹⁰⁻¹¹E, iyeys, ikakins walbalab, Yeisuw nilakanig yay; nuwanaw mo itamanaws wadides tawaw asteiy, asikweim pwapwakaw. Tasiyas mo ilivans, ilansa, “Min-Galiliy yakamiy, aveiyag wawun kutomos kukwakins walbalab? Townen Yeisuw mwana nilisaweimiy nein walbalab, igaw māwan, mo beiyum bimekeimiy. Māwana nein, e, beiyum beim māwan-wan, ankakin katanok-wan.”

Atimapun Yudas

¹²Ikous, ilisawes koy townen, yagan Oliv, iyums ineis Yelusalem. Ked townen nag biveiyov, kadiyakus-wan, kadiloka gamag binoun yam Tapwāloul waseg.

¹³Iyums, mo isiws wasibunatum to nisikeyas, mo imnavaws kasiyuwein waseg, tasiyas Pita, Yon, Yemes, Andiluw; tasiyas Pilip son Tomas; tasiyas Batolomiw son Matiw; Alpiyow natun townen Yemes; talliwon townen yagan Saymon; o Yemes natun townen Yudas.

¹⁴⁻¹⁶Asibabaw tasiyas, ninous kid katanok-wan vagan bininitougs Yowbad waseg. Sisiyas vinay mwasanin, sisiy Yeisuw inan Meliy, siney Yeisuw budan. Babiweis mamagin lakututan sinawey. Misiyamun townen, kweitan yam waseg, Pita mo itamanaw wanuwein gamag siyas babaw, ilana, “Budag yakamiy, kweiboug Yowbad Kululuwan ikatipel ansinap isek Deibid, mo ikatigik nawotet Yudas, townen talabein siyas niyousis Yeisuw; o Deibid anilivan townen nein Bukitab waseg. O kadilok youd siyas bikamats māwan Deibid anilivan kweiboug.

¹⁷“O townen Yudas sods nitasesus, o datoveks nisek inawotet, māwana yakids.

¹⁸⁻¹⁹“O townen gog isilakod Yeisuw waseg, mo ikow maysan nawotet townen, igimwel pwepway kweitan. Wankuyeim mo ikalouw kantukov wapwepway townen, nuwan ikatuw, sinewun isap in wamnat. O min-Yelusalem babaw ikakins, mapun idokes pwepway ‘Akeldamak.’ (Kativin bein aga-Muyuw ‘Buyav pwapwayein’).

²⁰“O livānen Yudas nises Bukitab, kweitan Sam waseg, māwana, ‘Kadiloka naven bikalipet; awoum teitan gamag bisik.’

E, kweitan livan nises,

‘Kweitan gamag bikow nawotet.’ ”

²¹⁻²²Pita mo ilivan, ilana, “Kadiloka taneves atimapun Yudas, kavel tut babaw sods nitasesus; nitakines Yon igaw kweiboug nibaptayses gamags, o nitakines daGuyaws Yeisuw, yam babaw ininoun ee... tutan ilivet mo imwen in walbalab. O sods townen bitakokews livānen Yeisuw nakabeikit waseg; e, bitaneves mtowen atimapun Yudas.”

²³E, iliganes Pita anilivan, isenas tawaw asteiy; teitan Yosep, yagan pinatoun, kweitan yagan Basabas, kweitan yagan Yusitos; tayuwein isenas yagan Matiyas.

24-25 Ikous, mo ikululs Yowbad wamatan, initougs, ilansa, “O Guyaw, kukwakina gamag babaw amasinap, kwatimlakem mukwaleiwag wasigeis tasiyas asteiy, kal atimapun Yudas bikow nawotet, takawein amlivan; peinan Yudas bo ipiyev nawotet towen, inoun in inaven kweitan.”

26 Wankuyeim mo ileles yiges tasiyas asteiy, akweiy youd waseg, mo ilaves makaw; ikalouws, o yagan Matiyas isin wanakaew, mapun Matiyas isiw inekes tasiyas takaweins livānen Yeisuw; tasiyas sinawatan tatanok.

Kululuwan Townen Bwanabwein isap

2 1 Pentikos anayam waseg, Yeisuw nagamag asibabaw-wan, katanoka bunatum waseg nisesus.

2 But meinoy neim walbalab, singay nuwanaw inekes; idokes yag itow avakaein; bo iyavkavek bunatum towen nisinis wanuwan.

3 Wantes gog mamagina mayen kov, ililivis in palatan palatan, mo itonas wasigeis gamag katanok katanok.

4 Yowbad Kululuwan Townen Bwanabwein bo inekes, asibabaw-wan, mo igeiguys, asilivan kweitan kaeig kweitan kaeig, peinan asisinap bo isekes Kululuwan Yowbad.

5 Misumkwey towen vena babaw gimgilis nimeis sagal towen silmanin, nisesus Yelusalem, tawaw bwanabweins, gimgilis vena babaw wadaban pwepway.

6 Butun towen iliganes; ikatuyouns nimeis, bo iyow nuwes peinan asibabaw iliganes ages tatineis.

7-11 Singay isom ninous, ilansa, “Adok tasiyas asibabaw-wan min-Galiliy ne? Amawan asilivan nitaliganes teitan gamag aygan tonen, teitan gamag aygan tonen; tage yakids aygads babaw, peinan davanuys babaw, Palit, Mediy, Elam, Mesopotemiy, Yudiy, Kapadokiy, Ponit, Esiy, Piligi, Pampiliy, Yidipt; o wawnuwan Aplik ven mwasanin, Saylin walasin; o mina-Lom, mwasanin min-Yudiy nikoulups ineis Lom sisiy mina-Lom tasiyas nikawes min-Yudiy datapwalouls; o min-Kilit, o min-Alebiy; yakids babaw taliganes livānen Yowbad nawotet tawtoun, o babaw yakids taliganes aygads tatoneids waseg.”

12 Bo isom ninous peinan nag ikakins silawun. Sisiyas ikatiganes, ilansa, “Aw-sinap towen?”

13 Tage mwasanin isibawes, ilansa, “Bo ikabalaweins, peinan wayn neimoums adok.”

Pentikos anayam Pita igeiguy

14 Siney Yeisuw nagamag, tasiyas sinawatan tatanok, Pita mo itamanaw igeiguy, idibakes gamag babaw, ilana, “Sigwey min-Yudiy yakamiy, o Yelusalem gimgilis yakamiy babaw, kuliganes agulivan, mo bakatimlakeimiy sinap kweitan.

15 “Peinan kulivans, ‘Bo imoums wayn, ikabalaweins,’ nag; nag bakakabalawein, peinan igaw gaboug. Tasiyas bikabalaweins, wayn kwayav waseg beimoums mo bikabalaweins; tage yakamey bwein.

16-17 “Youd townen nukukines peinan palopit Yowel kweiboug-o nikatigik, ilana,

‘Yowbad anilivan mawana: Igaw nakabiyokous tut ven watinow, kululuwag bo basekes ven babaw gimgilis, nitimiyas, tawaw o vinays, mapuna bigeiguys agulivan waseg.

Tabwabwat wasigeis yakamiy bikines kweivaw youd, mamagina asmikon; ninous waseg bikakins; o tammwayas, asmikon waseg bikamikons.

18 O yam townen waseg kululuwag bo basekes gungamag, tawaws o vinays, mo bigeiguys.

19 Aniyag bo basen wanakaew walbalab, o ven watinow. Aniyag buyav waseg o kov son musewun waseg.

20 Kalas biladadub, o tibukon bilabwabwel mawana buyav.

Ikous, mo bikamat Guyaw Yowbad nawotet tawtoun, inayam townen waseg.

21 Guyaw townen bo bikatinabwes gamag tasiyas kalisiy bidawes yagan.’

22 “Sigwey min-Yisleil yakamiy, kuliganes agulivan townen. Yowbad bo ikatimlakeids gum-Nasalet townen, yagan Yeisuw, naman mulin waseg, nawotet tawtoun, peinan Yowbad nisek natawtoun tonen silmanin wotet townen; o sods nitasesus, nawotet tawtoun nivvag, o babaw yakamiy kukwakins.

23 “O kweiboug Yowbad ikakin-wan townen nawotet babaw bo biwtel ven watinow waseg; o Yowbad kweiboug nikaleiwag silmanin takalbalebs biyousis townen Yeisuw, bikatkavates waklos, mo bikatimates. O yakamiy miwotet mawan.

24 “Tage Yowbad bo iyamov Yeisuw, kanig mouvitan bo ilisow. Nag kadilok kanig bitawtoun Yeisuw waseg, nag.

25-28 “Livanen mtowen kweiboug Deibid bo ilivan Yeisuw anilivan mamagina,

‘Tut babaw nakikineim yak gunguyaw yak wamatag.

Guntawtoun bisigeg, peinan yakoum wagunkatay nukuses.

Mapun, wadoug waseg allivan, peinan gunmwasaw avakaecin.

Igaw woug waseg nases ven watinow, bo banmiseim gunguyaw yakoum bukwatinabweig.

Peinan kwayuseig, awoum kululuwag bisesuna watum.

Awoum woug beipwas; awoum.

Bo nukwatimlakeig ked townen kabmwamov kidenen.

Wamatam bo bukuvag gunmwasaw bivakaecin.’

29 “Sigwey yakamiy, adok balivan livanen datoveks townen Deibid; livan kamnat balivan. Townen Deibid bo ikanig, itakus wakalawagan waseg; e, alawag townen, igaw tut townen wadavanuys nises.

30 “O peinan Deibid palopit, bo ikakin sinapun Yowbad; o Yowbad bo itabudabod, idibek Deibid, ilana,

‘Mounid wabuyavim igaw mo bisap tabum yəkoum,
townen bo biguyaw, bikow kid mukwaleiwag.’

31 “O kweiboug, peinan Deibid ikakin mtowen Kelis kanig bo bilisow, bitamanaw vayuwein, livānen bo ilivan mamagina:

‘Awoum bisesuna wāTum. Awoum won beipwas; awoum.’

32 “Yowbad gog nivag mtowen Yeisuw mo itamanaw vayuwein; o yakamey bo nakakin.

33 “O tut townen, mtowen Yeisuw, Taman nisek nakaleiwag avakaein, o nises Taman wanakātay. O peinan Taman anilivan, bo bisek Kululuwan Townen Bwanabwein, nagein gog bo isek, katipel mo nisekem yakamey; nawotet townen kukines o kuliganes.

34-35 “Deibid ta-imwen in walbālab; Yeisuw gog imwen in walbālab. Livānen Yeisuw nilivan māwana,

‘Yowbad bo idibek gunguyaw, ilana: Kusin wagunkātay.

Tage tasiyas nikamliweims igaw mo bavag beibus, bimplavags
mamagina mukwabtatet.’

36 “Kuliganes beibwein, o kadiloka min-Yisleil babaw yakamiy bukukwakins kamnat waseg, Yowbad bo ikatigik guyaw teitan takatinabweids yəkids, townen yagan Kelis, mtowen Yeisuw nukuweiyis waklos.”

37 Gamag tasiyas iliganes, bo igeg ninous, ibwayouys avakaein, ikatugwans waseg Pita siney Yeisuw nagamags, ilansa, “Tawaw, bo igak! Amāwan bakavkek?”

38 Pita ikatimop asilivan, idibakes, ilana, “Kulavewas amisinap kalbaleb, mo bakabaptayseimiy tatanok tatanok yakamiy, Yeisuw Kelis yagan waseg; mo biwid mikalbaleb, binumlev, nasiwayoub mo bisekeimiy, Kululuwan Townen Bwanabwein.

39 “Peinan Yowbad bo ilivnek mounid bisiwyoubuds yəkids sidayas nitidayas, o bisiwyoubus vena babaw gimgilis, kalisiy daGuyaws Yowbad bidawes. E, Kululuwan bo isekeids sidayas tasiyas.”

40 Anilivan māwan mo igeiguy avakaein, idibakes, “Kadiloka kulavewas simiyas, peinan takakons tasiyas.”

41 Gamag mwasanin iliganes anilivan; yam townen mo ibaptayses, mo iyakelesiys tasiyas, babiweis mamagina kweitoun tawsan gamag.

42 Tasiyas bo itoukums. Yeisuw nagamags asilivan iliganes, o sisiyas tasiyas nisesus, ininitougs Yowbad waseg; o bled ikikivis, māwan asisinap.

Tayakelesiys asisinap

43 Gamag babaw bo igoulus Yowbad; peinan ikines Yeisuw nagamag siwotet singaya tawtoun.

⁴⁴O tasiyas tanageins liᵛanen Yeisuw, sisiyas nisesus; o sivavag mamagina babaw gamag sivavag; nag kweitan ikayuses, nag.

⁴⁵O sipwepway o siwliyoug iyamiyises, mayses ivganes tasimavs wasigeis.

⁴⁶⁻⁴⁷Yam babaw ikatuyouns tasiyas-wan, ineis Yowbad wanbunatum. Tage tatineis wasibunatum, bunatan bunatan, ikikivis bled; sisiyas ikamkwams, ikalin nuwes, bo imwasaws; ikavvasis Yowbad; o gamag babaw ikalin nuwes tasiyas. O yam babaw Guyaw Yowbad ikatinabwes gamag mwasanin; ikatimweisis nagamag bo ibabaw.

Takagayal ivages mo ibwein

3 ¹Kweitan yam, kaᵼas bo itageg, tutan nitoug Yowbad wanbunatum, Pita son Yon mo ineis, nitoug silmanin.

²⁻³Teitan taw igaw kweiboug inan nikop yay igayal, bo ivakaein tage angayal isigeg-wan; o yam katanok katanok issin Yowbad nabunatum wawkwedan, koukwed townen yagan Kamnabwein; e, tut babaw issin townen, ininitoug money wasigeis gamag tasiyas nisowsiws wanuwan. O siney bikokews taw townen biwayes, Koukwed Kamnabwein waseg bisin, yam babaw mo bininitoug; o taw townen ikines Pita son Yon kakita bo beisiws wakoukwed, mo initoug money wasigeis.

⁴Pita son Yon ikikines taw townen; Pita mo ilivan, ilana, “Kukinem yakamey.”

⁵Taw townen mo igintoves tasiyas asteiy; idoki bisiwyoubus kid.

⁶Nag gog, Pita ilana, “Ta-ivag money waseg yey. Kweitan youd nises waseg yey, bo basekeim. Gum-Nasalet yagan Yeisuw Kelis, mtowen yagan waseg adibakeim kunoun.”

⁷⁻⁸Pita iyous naman wanakaᵼay, mo itamnow. Nuwanaw idamoms kaken, o inatub meivek-wan idamoms; kaspepel, itamanaw, mo inoun; o siney tasiyas asteiy mo isiws Yowbad wanbunatum, inoun palatan palatan, ipilapel, singay iyakawn Yowbad waseg.

⁹⁻¹⁰Gamag babaw bo ikines taw townen ininoun, o iliganes anayakawn Yowbad waseg; iwtusis tantougein money townen kweiboug nises Yowbad nabunatum watoulan, Koukwed Kamnabwein waseg. Meiveka tasiyas bo isom ninous, mapuna ikalin nuwes, peinan ikines takagayal townen bo ibwein.

Pita igeiguy

¹¹Taw townen siney Pita, Yon nisesus. Bo isom ninous gamag babaw, isisawls, imimeis kwānow kweitan yagan Solomon nakwanow.

¹²Pita ikin, ikatimop asilivan, ilana, “Min-Yisleil yakamiy, aveiyag wawun isom ninoumiy, o wawun kukinemas yakamey. Ta-ivag matawtoun o amasinap tatinem vāgan bakavag beibwein takagayal townen, nag.

13 “Towen Yowbad nawotet, mtowen Ebelam naYowbad, o Aysak naYowbad, o Yekob naYowbad, o tamumwey babaw siYowbad; mtowen nivag natun Yeisuw mo iguyaw. E, yakamiy nukupiyaves taw towen, nukusilkodes wamatan Paylat; o Paylat gog sivinan bikaluweg towen Yeisuw bilik bisap.

14 “O yakamiy gog nukupiyaves taw towen bwanabwein, taddumwal, o nukwawtagis yagan tawayin gamag, vagan Paylat bikaluweg taw towen bilik bisap.

15 “Nukuweisy abmwamov tanuwagan towen, o Yowbad gog bo ivag ikit kanig waseg, bo kakin yakamey.

16 “Waseg natawtoun mtowen yagan Yeisuw, taw towen bo ibwein. O kweiboug nukukines angayal taw towen, o nagein-vak kukines bo idamoms kaken, peinan bo isimounid waseg Yeisuw. E, isimounid waseg Yeisuw, mo isek natawtoun wamitamiy babaw yakamiy.

17 “Sigwey, nagein akakin nukuwteles mawan peinan tatagouwaws yakamiy, o mituwaveks-vak mawan.

18 “O Yowbad gog ikakin gamag mwasanin biyagages naKelis, o kweiboug ikatimlakes napalopit mawan; e, mo ilivans mawan tababaw palopit tasiyas; o mawan asilivan kweiboug, mawana tut towen bo ikamat.

19-20 “Kadiloka kuvages ninoumiy bikanavin, kulavewas amisinap kalbaleb, vagan Yowbad biwid, binumlev. DaGuyaws mo bivag beibwein amnamiy. Peinan bo ikaleiwag Yeisuw Kelis nawotet vagan bilabeimiy. Magat bikanavin ninoumiy, Yowbad mo bikayeb mtowen biwekeimiy.

21 “Tut towen Kelis bo nein walbalab, kadiloka bisesuna ee... igaw anatut bikatilow youd babaw mo beiyum beim, mawan pwamug-o nilivnek Yowbad wasigeis napalopits tatonen.

22-23 “Moses gog anilivan mawana,

‘Igaw palopit teitan daGuyaws Yowbad mo bisek nawotet, mtowen budamiy teitan, palopit mawana yey;

kadiloka kuliganes anilivan babaw wasigeis yakamiy.

Kavel tapiyavein anilivan palopit towen, bo bagidem taw towen, bilisaweimiy, binoun.’

24 “E palopit babaw kweiboug nilivnakes youd towen, asilivan katanokwan, tage tut towen bo nikamat. Wanmugwana Samwel anilivan mawan, mo tasiyas wankuyeim asilivan bo mawan.

25 “O yakids tut towen mamagin tasiyas palopit tibiyyas yakids o Yowbad nakaleiwag tamumwey wasigeis bo ikaluweg silmanin yakids; anilivan Ebelam waseg, ilana,

‘Igaw ven babaw gimgilis wadaban pwepway mo bimwasaws tabum waseg.’

26 “Wanamug Yowbad bo isekeimiy natouwat pinamiy yakamiy, nikayeb mtowen niwekeimiy, vagan bukulavewas amisinap kalbaleb,

mo bukumwasaws; wanmugwana yakamiy min-Yudiy, tage vena babaw wankuyeim mo bimwasaws.”

Bo iyateles Pita son Yon

4 ¹⁻²Igaw Pita son Yon illivans gamag wasigeis, mo isaps tanuwgwes lun situwawek, sisiy tulal avakaein, towen tamtakavatein Yowbad nabunatum, sisiyas tasiyas Sadusiy; bo igeg ninous tasiyas, peinan ikatimlakes gamags, ilansa, “Kanig waseg gamag beikits vayuwein, peinan Yeisuw nikanig, mo itamanaw vayuwein.”

³Mapuna iyousis tasiyas tawaw asteiy, isenas wadeil, bikayamats yamtan yam kid waseg mo biyateles, peinan bo ikwayav.

⁴Tage babaw gamag niliganes asilivan, bo isimounids waseg; tawaw siyas isimounids bo ibabaws, mamagina kweinim tawsan.

⁵Iyam-nen Yelusalem waseg mo ikatuyouns tanuwgwes lun situwawek, o tamumwey, o takatimlakeins kaleiwag.

⁶Misumkwey towen tanuwgwes lun sitovek avakaein yagan Anas, nimeis siney Kayapas, Yon, Alekisan, sisiy angamag mtowen tanuwgwes lun sitovek.

⁷Imeyes Pita son Yon itomos wanuwein gamag babaw, mo ikatiganes, ilansa, “Aw-kaleiwag waseg, kal yagan waseg kuwteles sinap towen?”

⁸⁻¹⁰Kululwan Towen Bwanabwein son Pita nisesus, mapun iwon, ilana, “O matuwawek, o tamumwey yakamiy; magat nagein bukwatiganemas livanen takagayal towen amawan anvavag neibwein, kadiloka bukukwakins, babawa yakamiy, o min-Yisleil babaws, bo ibwein waseg gum-Nasalet, Yeisuw Kelis; yakamiy nukuweiys waklos, ikanig, tage Yowbad ivag mo itamanaw vayuwein. E, natawtoun mtowen Yeisuw waseg, takagayal itamanaw wamatads bo ibwein.

¹¹“Livanen mtowen waBukitab nises mamagina:

‘Wululay towen tawteleins bunatum nipiayaves, tage bo imlavag anmwamwan bunatum.’

¹²“Mtowen anmwawet Yeisuw bikatinabweids; nag kwayuwein kadilok; nag kwayuwein yagan nises libalab waskawan; misinak yagan towen Yeisuw waseg bitabanes damwamovs, yakids gimgilis ven watinow.”

¹³Ikinis Pita son Yon bo iwons, asilivan tawtoun, o ikakinsa tasiyas nag iskuls avakaein, mamagin ven gimgilis tasiyas, bo isom ninous; mo inuwes tasiyas asteiy sisiy Yeisuw kweiboug nisesus.

¹⁴O peinan takagayal towen mwana ibwein, sisiy itamanaws, tamawan bikatimop asilivan.

¹⁵⁻¹⁶Mapuna ikayabes bineis bikayamats watoulan bunatum; tasiyasa takaleiwags mo illivans sisiyas, ilansa, “Amawan bitavkakes gamag tasiyas? Peinan siwotet tawtoun singay, o min-Yelusalem babaw ikakins. Admwasins. Ta-mawan!

17“Adok bo bitakanes, vagan nag bivgavaws livanen Yeisuw. Nagein gog gamag mwasanin bo iliganes asilivan. Bo deis. Kukin bikatpeles livan towen gamag wasigeis, adok bitakatimapus asisinap vagan bikakin mites. Idakaleiwags mawan!”

18Ilivans mawan, ikous, mo idawes Pita son Yon bimeis. Imeis; tawtoun asilivan waseg mo idibakes, ilansa, “Awoum kullivans Yeisuw yagan waseg; awoum kugeiguys o kulivans; singay bwaboum.”

19-20Pita son Yon ikatimapus asilivan, ilansa, “Tab kadilok wamatan Yowbad bakaligen amilivan yakamiy? O Yowbad anilivan tonen? Kukwaleiwags yakamiy. O youd siyas nakakin o nakaligen, ta-mawan bakayakous amalivan sinap towen waseg.”

21-22Vayuwein ikanes avakaein, mo ikayabes bineis kid wasibunatum. Tabanes asisinap kalbaleb aveiyag bikatimapus, nag. Bo iwenes gamag babaw, peinan gamag babaw nikines wotet towen, mapuna iyakawns Yowbad waseg. Peinan taw towen mwana ibwein bo itovek, anbweilim bo iyakous sinawavas; o wotet towen tawtoun, mamagina mulin naman Yowbad.

Tayakelisiys initougs Yowbad waseg

23Iyokous, mo iyums inekes tawlisiyas, mo ikamteles livan, tasiyas tanuwgwes lun o tamumwey asilivan.

24Iliganes ikous, mo ikanavin ninous silmanin nitoug Yowbad waseg, ilansa, “Matovek yakoum, peinan nukuvag libalab, o pwepway, o yol, o youda babaw wapwepway o wayol.

25-26“Gamag siyas sivines bisilbwades muwotet, mawan nilivan mutouwat towen, yakamey tibum Deibid. Peinan kweiboug Kululuwam waseg, mo ikakin sinap towen, ilana,

‘Aveiyag wawun iwons ven babaw gimgilis,

o min-Yisleil ininuways sinap mav?

King babaw wadaban pwepway itamanaws,

sisiyas guyawaw ikatuyouns imeis,

bikawpwanaws kid wasigeis Yowbad son naKelis.’

27-28“Mounid, ven towen waseg, bo ipiyaves mutouwat towen bwanabwein; ikawpwanaws waseg towen Yeisuw, mtowen nukusek inawotet, nukwayus peinan towen Mesay. O peinan mukwaleiwag nukulivnakes mawan, mogo iyagages Yeisuw, tasiyas Elod, o Ponitivy Paylat, o min-Yisleil, sisiyas ven mwasanin gimgilis, bo iyagages Yeisuw.

29“O Guyaw, tut towen bo kukwakin asilivan kalbaleb, sivines kid biyagagemas yakamey; kulabem mutouwat yakamey vagan bakawon beibwein, mo bakalivan amlivan.

30“O Guyaw kuyasel namam vagan bukulabem, takatouns kuvages beibweins, namam mulin kuvvag, wotet tawtoun waseg, wayagan mutouwat bwanabwein towen Yeisuw.”

³¹Initougs ikous, sibunatum mo igogewn, mamagina bo beinik; Yowbad Kululuwan inekes tasiyasa babaw, mapun iwonsa singay, illivans Yowbad anilivan.

Nag ikayuses sivavag

³²Peinan Kululuwan Yowbad nises wasigeis tasiyas, ninous katanok-wan, o sivavag katanok-wan. Nag teitan gamag bikayus navavag; peinan youd tasiyas gamaga babaw sivavag katanok-wan.

³³⁻³⁵O sitawtoun waseg, takaweins anilivan mo igeiguys livanen Yeisuw, ilansa, “Maguyaw towen nikanig, bo ikit vayuwein.” Babaw tasiyas singay isiwayoubs. Nag teitan kal tasimav nises, nag; peinan ven tanuwgwes iyamiyises sipwepway o sibunatum; mayses mo ikawes imeyes, isekes Yeisuw nagamag; tasiyas mo ivagens gamag wasigeis, bo isekes mawan gamag babaw sivines.

³⁶⁻³⁷Teitan taw Yosep, kweivaw yagan Banabas, Yeisuw inagamags nidokes. Wawun yagan towen, “Talabein gamags.” Gum-Saypilos mtowen, anakum Livay, napwepway wanven bo iyamiyis; maysan ikow imey, isen wamtes Yeisuw nagamag, tasiyas takaweins anilivan, sinawatan teiy; bo isekes tasiyas maysan napwepway.

Ananiyas son Sapayil

5 ¹⁻²Teitan taw son nakwav iyamiyises sipwepway, maysan money mwasanin ikawes isenas wamtes tasiyas takaweins livanen Yeisuw, ilansa, “Maysan tamkwalan towen-an.” Iyaweids gog; taw towen Ananiyas iyaweid, namoney mwasanin ikayus, o nakwav Sapayil ikakina iyyaweid.

³Iw to Pita, ilana, “Ananiyas, aveiyag wawun Seitan isiw wananoum yak, vagan kid Yowbad Kululuwan bukwatidev? Peinan kwayus mumoney mwasanin, maysan pwepway.

⁴“Kweiboug pwepway towen tanuwagan yak; wankuyeim nukuyamiyis, maysan money nukukow tanuwagan yak. Aveiyag wawun amsinap nukuvag mawan? Nag kuyawadem yakamey; tage bo kuyaweid Yowbad waseg.”

⁵Ananiyas iligen, ikalouw wapwepway, bo imat. Gamag tasiyas iliganes, mo ivag aspwayat avakaein.

⁶Tabwabwat mo itamanaws itabwes won towen takanig, ikawes inawes, itakus.

⁷⁻⁸Taw towen nakwav nag ikakin neimat. Veit kweitoun ikous mo isap, Pita ikatugwan waseg, ilana, “Tabta mipwepway maysan mawan towen?” Ilana, “E, mawan.”

⁹Pita ilivan, “Aveiyag wawun ninoumiy amiteiy bo bukuyakwanes kid Yowbad Kululuwan? Kukin! Tadibwanins mumwan bo nimeis, wakoukwed nisesus, bo bikaweims binaweims yakoum!”

¹⁰Nuwanaw mo ikalouw wamatan Pita, imat. Tabwabwats mo isaps ikines nikanig manawen, ikawes, inawes, idibwanis namwan wadadan.

¹¹Tayakelesiys babaw ivag aspwayat, o taliganeins livan townen mo ivag aspwayat meivek-wan.

¹²Takaweins livanen Yeisuw siwotet singay tawtoun, gamag wasigeis; gamag nikines mo ikakins Yowbad nawotet tatonen. Yam babaw asisinap ikatuyouns imimeis Solomon wankwanow.

¹³Gamag siyas watoulan nag imekes, peinan aspwayat; tage babaw gamag bo iyakawns wasigeis.

¹⁴⁻¹⁵Gamag mwasanin mo isimounids Guyaw Yeisuw waseg, vinay, tawaw; bo ikatimweisis gamag singaya babaw. Takatouns imeyes, isenas ked wadadan, ampalawen Pita meinoy; e, isenas wakabes o wasag, sivines kululuwan Pita bilumwes kid tasiyas takatouns, mo beibweins.

¹⁶Ven babaw gimgilis Yelusalem walasin katuyouns imimeis, takatouns imeyes sisiyas tasiyas bwagaw nibugawus; ivages mo ibweins.

Mwasanin ikamliwes Yeisuw nagamag

¹⁷⁻¹⁸Butun wotet townen mo iliganes tanuwgwes lun sitovek avakaein, siney inabod tasiyas Sadusiy, singay igeg ninous, ikamliwes tasiyas takaweins livanen Yeisuw, mapuna iyousis, inawes wadeil.

¹⁹⁻²⁰Boug waseg Yowbad natakayob im ikaliyow awkwedan deil, itokes, inawes wamnat, ilana, “Kuneis, kutamanaws Yowbad wanbunatum, kudibakes gamag livanen mimwamov townen Yeisuw nisekeimiy.”

²¹Iliganes anelos townen anilivan; walalayis mo ineis Yowbad nabunatum, livan mo ikatimlakes gamag. Tanuwgwes lun sitovek avakaein siney angamag mo idawes min-Yisleil astakaleiwags o tammwayas bimeis, mo idibakes inagamags mwasanin, ilansa, “Kuneis, tasiwuns deil tasiyas kutokes, kumeyes.”

²²⁻²³Ineis, bitokes kid wadeil, iwekes makawan. Iyums, imeis ilansa, “Nakan nakakin deil buntuman bo ikatabagus keikay-wan, o takaymateins deil nitatos wakoukwed; nakašiw wanuwan, ta-kweitan gamag nises, makawan.”

²⁴Tulal avakaein sen tanuwgwes lun situwawek iliganes asilivan, bo isunasun ninous; ikubukub nuwes, peinan na-bikakins aveiyag mo bikamat.

²⁵Teitan gamag mo isap, ilana, “Gamag siyas nukusenas wadeil bo itamanaws Yowbad wanbunatum, illivans ikatimlakays gamag.”

²⁶Tulal sen nagamag mo ineis, itokes gamag tasiyas imeyes. Bo ivnases. Nag ikanes, peinan iwenes gamag babaw. Mata bigeg ninous, peinan idokes kid beiweiys dakul waseg.

²⁷⁻²⁸Imeyes gamag tasiyas, mo itomos wanuwein tasiyas takaleiwags. Tanuwgwes lun sitovek avakaein mo ikatiganes, ilana, “Livan kamnat waseg nakadibakeimiy, kalana,

‘Awoum kugeiguys yagan towen waseg;’
tage min-Yelusalem babaw bo iliganes butun towen; o adok sivinamiy
gamag kid bilansa,

‘Peinan tanuwgwes lun sikaleiwag bo iweiys Yeisuw.’
Awoum gamag bilivans mawan.”

²⁹Pita siney takaweins livanen Yeisuw mo ilivans, “Magat mikaleiwag
kweitan, o Yowbad nakaleiwag kweitan, kadiloka bakaligen Yowbad
nakaleiwag.

³⁰⁻³¹“DaYowbads towen tamumwey siYowbad bo isek Yeisuw
vayuwein namwamov, peinan yakamiy nukwatimates, nukwatiptukwes
wakamweilok; tage Yowbad bo isek naguyaw, mamagina takatinabwein
gamags, aban nisek wanakātay Yowbad; o nawotet silmanin min-Yisleil
yakids, bikanavin nanouds, mo biwid adsinaps kalbaleb, bilev.

³²“O yakamey kakakin livan towen moundid, mapuna kallivan mawan;
o Yowbad Kululuwan Bwanabwein bo isekem taliganein anilivan
yakamey, o Kululuwan Towen ikatimlakeids sinap towen moundid.”

³³⁻³⁴Tasiyas iliganes, bo ikapasal nuwes, sivines bikatimates; tage
takaleiwag teitan yagan Gamaliyel itamanaw vagan biliwon. Mtowen
Palisiy, takatimlakein Yowbad nakaleiwag; mapuna babaw gamag ivnases
tamwey towen. Ilana, “Kadilok tasiyas takaweins livanen Yeisuw bineis
watoulan, tut kadiyakus bisesus, baliwon, beikous mo beisiws bimeis.”

³⁵E, tasiyas ineis watoulan, Gamaliyel mo iliwon, ilana, “Sigwey min-
Yisleil yakamiy, kadiloka kuvnaseimiy, aveiyag bukunuwakes gamag tasiyas.

³⁶“Kunuwes kweiboug teitan gamag yagan Tudas itamanaw, idok
guyaw avakaein tonen; gamag babaw mo inekes, mamagin lakatuvas
tawaw; wankuyeim mwasanin iweiys taw towen, o taliganeins anilivan
bo igayays; butun taw towen bo ikous.

³⁷“Wankuyeim gum-Galiliy teitan yagan Yudas, anatut yagads gabman
nileles wabuk, mo itamanaw, ikatidavis gamag mwasanin, ikatkunis;
wankuyeim mo ikanig taw towen, o taliganeins anilivan bo igayays, bo ikous.

³⁸⁻⁴⁰“O tut towen adibakeimiy, bweina bisesus gamag tasiyas. Awoum
kuyagages. Magat gamag sikaleiwag towen, o gamag siwotet, kakita
biyakous; tage kukin Yowbad nawotet towen, ta-mawan bukusiwbwades;
mata ge bukuvatays waseg Yowbad.” Tasiyas iliganes aygan towen;
idawes Yeisuw nagamag, imeis, iwaways, mo idibakes, ilansa, “Awoum
kwatimlakays yagan Yeisuw waseg;” mo ikayabes, ineis.

⁴¹Ilisawes takaleiwags tasiyas, nag ivag asimwasin, imwasaws-wan,
ilansa, “Adok Yowbad sivanan yakids, inakaleiwag vagan abads bigeg,
Yeisuw yagan peinan.”

⁴²Yam katanok katanok mo ikatimlakes gamag, Yowbad wanbunatum,
o bunatum babaw wasigeis; isekes livan towen bwanabwein, livanen
Mesay, mtowen yagan Yeisuw.

Tamtakavateins kan siwotet

6 ¹ Misumkwey towen sivamul ikatimweisis singay babaw, musinis takagaGilis, musinis takagIbliws; e, tasiyas takagaGilis ivtokes livan siyas takagIbliws, ilansa, “Yam katanok katanok ivganes kaeis isekes nakubukwabs wasigeis, o yakamey nakubukwab siyas nag ivag manānan kaeis.”

² Yeisuw nagamag tasiyas sinawatan teiy mo idawes sivamul babaw bimeis, mo ilansa, “Mawotet bakalivan Yowbad anilivan; nag kadilok bakasem wotet towen vāgan bakavgen kan.

³ “Kadiloka kukines tawaw toubweins mwasanin yakamiy; gamag tasiyas asisnap tawtoun; o Yowbad Kululuwan wasigeis tasiyas; kadilok kusenās teinim teiy vāgan bakasekes siwotet towen.

⁴ “Yakamey bakaysiyous imawotet silmanin Yowbad, bakanitoug waseg, o anilivan bakasekes gamags.”

⁵ Gamag babaw itams, ilansa, “Bwein”, mo isenas tawaw teinim teiy; teitan Sitiben, Kululuwan Yowbad nises waseg towen, o bwein isimounid Yowbad waseg; teitan Pilip, teitan Pilokol, teitan Nikanol, teitan Timon, teitan Pamenas, teitan Nikolaw, mtowen gum-Antiyok bo imlavag gum-Yudiy, peinan ikow tapwāloul-nen Yudiy.

⁶ Tasiyas bo itamanaws wamtes takaweins livānen Yeisuw; initougs Yowbad waseg, ikous, mo isenas nimes wawous tasiyas, silmanin bikawes siwotet vāgan bintakavatays kan.

⁷ Singay babaw gamag mo iliganes livānen Yowbad, navamul bo ikatimweisis singay babaw, waseg ven towen Yelusalem. Tanuwgwes lun mwasanin bo iliganes livan towen, mo isimounids waseg Yeisuw.

Bo iyousis Sitiben

⁸ Yowbad nasiwayoub avakaein isek Sitiben, iwotet tawtoun, mamagin Yowbad naman mulin ivag; o gamag babaw ikines.

⁹⁻¹⁰ Gamag mwasanin mo itamanaws ikamnimans waseg Sitiben; mwasanin min-Yudiy sitapwāloul yagan Libetin, sisiyas min-Saylin mwasanin, o min-Aleksanidel, o min-Silisiy, o min-Esiy, tasiyas mo ikamnimans waseg Sitiben; tage nag kadilok bitakayways, peinan kululuwan o ansinap singaya tawtoun.

¹¹ Mapun isilkodes; idibakes mwasanin, ilansa, “Igaw yatal waseg kuyaweidsa, kulansa, ‘Nakaligen anilivan kalbaleb taw towen, ilivan mav, Moses livānen, o Yowbad livānen.’”

¹² E, mo ivtokes livan Sitiben wasigeis gamag babaw; o tamumwey, o takatimlakeins kaleiwag niliganes; gamag babaw mo itamanaws, iyousis Sitiben, inawes vāgan biyateles wamtes astakaleiwags min-Yudiy tatineis.

¹³⁻¹⁴ Mo idawes tasiyas tayyaweids bimeis. Imeis, ilansa, “Gamag towen, tut babaw ivtokay livan silmanin Yowbad nabunatum towen, o

silmanin Moses nakaleiwag, o nakaligen anilivan, ilana, ‘Gum-Nasalet towen Yeisuw bo bigulek bunatum towen; o sinap kweiboug Moses nisekeids, Yeisuw bo bikatlow.’ Anilivan maʷan.”

¹⁵Takaleiwags isinis, iggintoves magin taw towen Sitiben, ankakin kweitan, magin maʷana gum-libalab anelos.

Anilivan Sitiben

7 ¹Tanuwgwes lun sitovek avakaein mo ikatigan Sitiben, ilana, “Tabta asilivan moundid? Amaʷan amlivan yak?”

²Sitiben ikatimop livan towen, ilana: “Talawog yakamiy o tamumwey yakamiy, kuliganes agulivan. Guyaw avakaein Yowbad bo inek datoveks Ebelam, pwamug-o waMesopotemiy, wankuyeim mo ikoulup in Elan.

³“E, igaw Ebelam nises Mesopotemiy, Yowbad inek, idibek, ilana, ‘Kadiloka muven o talawom kulisow, kun ven kweitan bakatimlakeim.’

⁴“Mapuna ilisow Kaldiy, ikoulup, in Elan. Taman son nisesus; e taman ikanig ven towen Elan. Wankuyeim mo im isik pwepway towen Kenan, tut towen idavanuys.

⁵“O Yowbad ta-isek nakiyay towen; igaw. Ta-isek napwepway wavtanok, nag; Yowbad idibek Ebelam, ilana, ‘Igaw basekeimiy simwey tibum mipwepway;’ tage nag ivag natun, nag.

⁶⁻⁷“Yowbad mo idibek Ebelam, ilana, ‘Tibum bisikes kweitan ven, wunovek, o misikena gimgilis bisekes siwotet avakaein biwotets, o bweilim lakatuvas abes bigeg. Igaw mo bamop sikalbaleb misikena gimgilis tasiyas, igaw tibum mo bisaps bimeis biwotets gunawotet ven towen wanuwan.’

⁸“O peinan Ebelam itam kaleiwag towen waseg, Yowbad mo isek nakabivatus; Ebelam ibwabwes tawaw momwes. Wankuyeim nakwaw mo ikop natun Aysak, ikayamat yam kweinim kweitoun, mo ibob momwan; wankuyeim Aysak natun Yekob maʷan, o Yekob nitun tawaw sinawatan teiy, tasiyas datuwaʷeks pwamug-o.

⁹⁻¹⁰“Datuwaʷeks tasiyas ikamliwes budas Yosep, isekes gamag mwasanin, ikawes Yosep, inawes Yidipt; tage Yowbad son nisesus, ikatinob Yosep youd babaw kalbaleb nilouvat ven Yidipt waseg; e, isek ansinap avakaein wamatan min-Yidipt siking towen Pelow, mapun ikalin nuwan Yosep waseg, isek nawotet tamtakavatein nabunatum, o tamtakavatein ven towen Yidipt, meivek-wan.

¹¹“Wankuyeim nag ivag kweis Yidipt waseg, o Kenan waseg; tut singay kalbaleb ilivatus. Kan bo iyakousis datuwaʷeks wasigeis.

¹²“Wankuyeim Yekob iligen kan nises Yidipt, mo ikayabes nitun; e, tibdayas yakids tasiyas; ikayabes ineis Yidipt, kan silmanin.

¹³“Sivyuwein ikayabes, ineis Yidipt, Yosep mo ikamat wasigeis tuwan. Ikamtel waseg Pelow, ilana, ‘Talawog min-Kenan tasiyas.’

14 “Yosep mo idawes taman Yekob sen taliven bimeis Yidipt; gamag siyas babiweis sinawanim sinawey teinim.

15 “Yekob inoun in Yidipt, ven townen waseg nikanig; e, tibdayas tasiyas nikankanigs.

16 “Wous ititabwes guyawaw siyas, mo ikokews, innawes, isenas watakunumwan ven Sekam waseg; kweiboug Ebelam igimwel takunumwan townen, maysan silib nisek Emol nitun, ven Sekam waseg.

17 “Kweiboug Yowbad nilivnek Ebelam waseg, ilana, ‘Bakatinabwes tibum ven townen waseg.’ Kadilakusa bo bilouvats tutan bikatinabwes, min-Yisleil mo ibabawsa singay. Ven townen Yidipt bo ikalawt min-Yisleil.

18-19 “Misumkwey townen mo isap King kweivaw; mtowen nag ikakin Yosep, isilkodes tamumwey, ikaleiwag vagan bilavewas nitsiyas apwaw; sivinan gamag tasiyas bimtāmats beikous.

20 “Tut townen waseg natan vin mo ikop natun apwaw tamnabwein yagan Moses, isowum tibukon kweitoun, namwan wanbunatum.

21 “Wankuyeim mo isemos wamnat; Pelow natun kudavin mo ikow, ituy gwad townen, mo imlavag natun tatonen.

22 “Townen Moses ivakaein, iskul, itakayes min-Yidipt asisinap babaw ikous, bo itawtoun anilivan waseg, o nawotet-vak tawtoun.

23 “Anbweilim sinawawas waseg, mo inuway taliven, in kid bilakwanes taliven tasiyas min-Yisleil, idoki bo bilabes.

24 “In ikin gum-Yidipt iyageg gum-Yisleil teitan, imop nakalbaleb, iweiy gum-Yidipt, imat.

25 “Idoki taliven bikakins Yowbad nisek nawotet vagan bikatinabwes tasiyas; tage nag ikakins.

26 “Yamtan yam mo ikines min-Yisleil asteiy ikawpwanaws, idoki bivag beimwas kid, ilana, ‘Tawaw, yakamiy bod katanok-wan, min-Yisleil yakamiy. Aveiyag wawun kuygeg soum?’

27-28 “Townen niyageg son, mo iyabin Moses, ilana, ‘Kal nisekeim muguyaw o mukwaleiwag wasigeis yakamey? Adok bukuweig mawana townen nov gum-Yidipt nukuweiy, ne?’

29 “Iligen anilivan townen, ivag anpwayat Moses, mo isawl, ikoulup, in isik ven yagan Midiyan, ivays son nakwav, ikopwes nitun tawaw asteiy.

30 “Isesun ee... bweilim sinawawas ikous, ininoun wanawoud, koy Sinay waseg. Ta-ivag ven, makawan. E, Moses mo ikin gum-libalab son inakov nigidaged amweilok yageivein waseg.

31-32 “Moses ikin, isunasun nanon, isineikim vagan kid bikinbunik, mo iligen aygan Yowbad, ilana, ‘Yey tamumwey siYowbad yey; yey Ebelam naYowbad yey; yey Aysak naYowbad yey; yey Yekob naYowbad yey.’ Moses iligen mo itat won, anpwayat bikin Guyaw Townen.

33-34 “Yowbad idibek ilana, ‘Kwablev musandol, kusew, peinan ven townen waseg nases. Awoum sona musandol bukumey. Bo akin min-Yidipt

iyagages gungamag, bo aligen ildeilids, bo abus vāgan kid bakatinabwes; e, tut towen kum bakayabeim kid bukun Yidipt, wotet towen silmanin.’

35 “Mtowen Moses, min-Yisleil kweiboug niپیaves, nilansa, ‘Kal nisekeim muguyaw o mukwaleiwag towen?’ O Yowbad gog, gum-libalab waseg, bo isek nakaleiwag o nawotet vāgan kid bikatinabwes Yowbad nagamag. Gum-libalab towen Moses nikin amweilok waseg.

36 “Moses mo imgwayes gamag tasiyas, peinan nawotet tawtoun, Yidipt waseg, o Yol Bwabwel waseg, o sinawavas bweilim wanawoud waseg, nawotet tawtoun, mamagina Yowbad naman mulin.

37 “Mtowen Moses nidibakes min-Yisleil, ilana, ‘Iḡaw teitan wasigeis yakamiy, Yowbad mo bisek nawotet mo bimlavag palopit, mtowen māwana yey.’

38 “Towen Moses siney min-Yisleil babaw ininounas wanawoud, o gum-libalab nilivan son Moses koy Sinay waseg, ikatipel ansinap mo isekes tibdayas, tammwayas tasiyas, o mwamov livānen bo isekeids.

39-40 “Tage tammwayas tasiyas nag sivines biliganes Moses anilivan; ipiyaves, waninous kid sivines beiyums bineis Yidipt. Mapuna idibakes Elon, ilansa, ‘Kubun dayowbads vāgan bimgwayeids, peinan mtowen Moses nitokeids nitalisawes Yidipt, nag kakakin amāwan nein.’

41 “E, tut towen bo ibunis youd magin māwan bulumakaw natun, o iluns o itapwālouls waseg kokotom towen, o imwasaws waseg youd towen nibunis wanimes.

42-43 “Yowbad mo ilisawes tasiyas, vāgan tasiyas bikululs kid wamatan wutun babaw, māwana palopit anilivan wanuwan Bukitab mamagina:

‘Adok bweilim lakatuvas wanawoud nukuweis lun bulukwan, min-Yisleil yakamiy, vāgan bukuluns waseg yey?

Tage nukuyousis yowbad kweitan, yagan Molok, nukuwlules nabunatum, nukukokews;

o nukukululs wamatan Lepan nawutun, o nukutapwālouls mikalelel waseg.

Mapuna bakaweimiy banaweimiy palata-dadan ven Babilon.’

44 “Tamumwey tasiyas ikokews Yowbad nabunatum wanawoud, peinan Yowbad nikatimlek Moses ankakin bunatum towen, ilana, ‘Kuwlul gunbunatum ankakin māwan.’

45 “Wankuyeim Yosuw imgwayes tibdayas, tamumwey tasiyas; sona bunatum towen nikokews, mo iyousis min-Kenan sipwepway, peinan Yowbad ikawmanayes gamag tasiyas, mo isawls wamtes tibdayas. Bunatum bunawen ises ee... mo isilamaw nakaleiwag Deibid.

46 “Yowbad isiwayoub waseg mtowen Deibid, o Deibid sivinan biwlul Yowbad nabunatum silmanin sitapwāloul Yekob tibun tasiyas.

47 “Togo Deibid nag iwlul nabunatum; natun gog Solomon iwlul Yowbad nabunatum towen.

48 “Tage libalab naYowbad towen nag imasis wanuwan bunatum ven watinow waseg, nag. Palopit teitan Yowbad anilivan nilel mamagina: 49-50 ‘Yey abag libalab o kakeig nakabvawot wapwepway.

Amata-bunatum bukuwlules yey gunbunatum?

O amata-bunatum bukuwlules vagan bayeiwas wanuwan?

Adok nag kadilokeimiy, peinan wanamag bo abun youd tasiyas.’ ”

51 Sitiben mo ilivan, ilana, “Singaya takakon yakamiy, Yowbad ta-ivag nakabivatus waninoumiy o watigamiy, nag; tut babaw kuyblebes Yowbad Kululuwan; mawana tamumwey, mawana yakamiy.

52 “Ta-kweitan palopit tammwayas ikatibomes, nag; babawa iyagages. O ikatimates palopit tasiyas, o palopit asilivan mawana, ‘Igaw beim Tadidumwal, mtowen Kelis.’ E, Tadidumwal towen nukusilkodes-vak, nukuweiy.

53 “Min-libalab nisekeimiy Yowbad nakaleiwag; tage nukupiyaves nakaleiwag towen; mawana tamumwey, mawana yakamiy.”

Iweiy Sitiben

54 Iliganes anilivan towen, singay ikapasal nuwes, ikakilis kumtus, singay ikamliwes.

55 Tage Yowbad Kululuwan Bwanabwein son Sitiben nisesus, Sitiben ikin walbalab, ikin mititeilin Yowbad, ikin Yeisuw nitamanaw Yowbad wanakatay.

56 Sitiben mo ilana, “Towen-o bo akin ikaliyow libalab, o Gimgilitoun towen Yeisuw itamanaw Yowbad wanakatay.”

57 Tasiyas gog bo iwaks avakaen, nag sivines biliganes livan towen, bo ikibwades tiges; ituts bineis biyousis kid Sitiben.

58 Iyousis Sitiben, mo itokes inawes watoulan ven, mo iweiy, dakul waseg. O tasiyas niyyaweids yatal towen waseg inisis asikweim isenas wadadan toubwat teitan yagan Soul, vagan kid bintakavet asikweim, mo ikawes dakul, iweiy Sitiben.

59 Igawa iwaways, Sitiben mo iwak, idow naGuyaw yagan, ilana, “Guyaw Yeisuw, kululuwag kukow.”

60 Mo ibasen kitatun, iwak avakaen, ilana, “O Guyaw awoum kumop asisinap towen kalbaleb;” mo ikanig. Toubwat towen Soul ikikin, idok wotet towen bwein.

Soul iyagages tayakelesiys

8 ¹ Misumkwey towen gamag mwasanin bo isilamaws kid biyagages tayakelesiys Yelusalem waseg; e, bo iyagagesa singay. Mapuna bo igayays ineis Yudiy o Samaliy, o vena babaw wasigeis. Misinaka takaweins livanen Yeisuw nisesus Yelusalem, tasiyas sinawatan teiy.

² Mwasanin gamag bwanabweins bo idibwanis takanig towen Sitiben, ivalams avakaen silmanin.

³Tage Soul bo iyagages tayakelesiys, inineves tayakelesiys bunatum katanok katanok wasigeis, iyousis tawaw o vinay, itokes, inawes wādeil.

Livānen Yeisuw ikawes isekes min-Samaliy

⁴O tayakelesiys tasiyas nigayays bo inawes livānen Yeisuw vena babaw wasigeis.

⁵Pilip in min-Samaliy wasiven kweitan wunovek waseg, isekes livānen Mesay Kelis.

⁶O min-Samaliy inganegs anilivan, ikines nawotet tawtoun, ninous katanok-wan vāgan biliganes anilivan.

⁷Pilip nawotet tawtoun; o tasiyas takayyeiluws ivag, mo iwaks avakaein, yeiluw mo ilisawes gamag tasiyas; o taguyāgweys o takagayals ivag, mo ibweins.

⁸Mapuna misikena gimgilis bo imwāsaws avakaein.

⁹⁻¹¹Tamgameg yagan Saymon nises ven towen; min-Samaliy nikines nawotet, bo isom ninous. Mtowen Saymon bo ilivan, ilana, “Yey tatawtoun yey.” Bo iliganes anilivan, tasiyas guyawaw, o sisiyas toul, gamaga babaw, mo ilansa, “Adok natawtouna tonen, mamagina Yowbad natawtoun.” E, nagwādiven inganegs tamgameg towen, nameg nikines bo isom ninous.

¹²Tage gamag babaw mo isimounids Pilip anilivan waseg, Yowbad nakaleiwag livānen son Yeisuw yagan livānen, ibaptayses tawaw o vinay.

¹³Towen Saymon mo isimounid, ibaptays; ibaptays ikous, isesus son Pilip, ikikin nawotet tawtoun o naman mulin, bo isom nanon.

¹⁴Takaweins livānen Yeisuw igaw nisesus Yelusalem, iliganes min-Samaliy bo itams Yowbad anilivan waseg, mapuna ikayabes Pita son Yon bikines.

¹⁵⁻¹⁶Pita son Yon isaps, mo initougs silmānin Yowbad Kululuwan Townen Bwanabwein binekes kid gamag tasiyas; peinan kweiboug nag inekes, deisa nibaptayses yagan Guyaw Yeisuw waseg.

¹⁷Initougs ikous, mo isenas nimes wawous gamag tasiyas, Yowbad Kululuwan mo inekes.

¹⁸⁻¹⁹Towen Saymon ikin takaweins livānen Yeisuw siwotet māwan, nisenas nimes gamag wawous, Kululuwan Yowbad mo inekes; towen Saymon mo isekes money, ilana, “Money towen kukow, maysan sinap towen. Sivinag sinap towen, namag kid basen gamag wawous vāgan Kululuwan Yowbad binekes.”

²⁰⁻²³Pita mo ikawtun taw towen, ilana, “Soum-wan mumoney kov waseg bigabum wadiginasim, peinan kudok kid bukugimwel Yowbad nasiwāyoub. Yākoum tobwag gamag. Nag kweitan muwotet nises wasigeis yakamey. Yak nanoum bo ikaydodog wamatan Yowbad. Kadiloka kulavew amsinap towen kalbaleb; kunitoug Yowbad waseg. Adok mo

biwid amsinap, peinan akakin-wan amkameiliw son amsinap kalbaleb bo ikaḷawt nanoum waseg.”

²⁴Saymon ikatimop anilivan, ilana, “Kunitougs Yowbad waseg vagan kid kalbaleb towen nag bimekeig yey.”

²⁵Pita son Yon asilivan kamnat waseg mo idibakes gamags livanen siGuyaw Yeisuw, mo iyums ineis Yelusalem; o igawa waked inounas, livan towen bwanabwein mo isekes min-Samilyi, vena babaw wasigeis.

Pilip inek gum-Idiyopiy teitan

²⁶Yowbad ikayeb gum-libaleb teitan inek Pilip, ilana, “Kutamanaw kunoun kun wayals, kunoy ked makadewen meinoy neim Yelusalem nein Ges.” Ked towen waseg ta-ivag ven; makawan.

²⁷⁻²⁸Itamanaw, inoun, mo inek gum-Idiyopiy teitan, mtowen yunak, towen tamtakavatein Kandas namoney, manawen vin min-Idiyopiy sikwin. E, yunak towen nitapwaloul Yelusalem waseg mo iyum in waniven. Hos ibiteilis inawag, isin wanuwan ivnivin Bukitab, palopit Isaya anilivan.

²⁹Yowbad Kululuwan mo idibek Pilip, ilana, “Kun, kunek taw towen wanawag nises.”

³⁰Pilip isawl, inek, iligen ivnivin anilivan palopit towen Isaya. Pilip ikatigan ilana, “Tabta kukwakin silawun livan towen?”

³¹Iwage towen ilana, “Ta-mawan bavkek bakakin. Magat teitan gamag bikatimlakeig, bo bwein.” Mo ilana, “Kumwen kum, kusin wawag;” mo imwen, isin wadadan taw towen.

³²⁻³³Bukitab wanuwan bo ivin lelel-nen mamagin,

“Mawana lamiy gamag beiweisy, ta-ivag aygan;

o mawana bibwabwes wunuwunun sip, nag beiwey, bo bikkapay-wan.

O gamag towen mawan, nag bilivan.

Asilivan tasiyas yaweid, inayatal waseg.

Anmwasin; ta-mawan.

Igaw ta-kal bilivan livanen angamag taw towen, peinan bo ikanig.”

³⁴Yunak mo ikatugwan Pilip waseg, ilana, “Livanen kavel? Palopit towen livanen? O teitan gamag livanen?”

³⁵Pilip isilamaw livan towen Bukitab wanuwan, mo ikatimlek livanen Yeisuw, livan towen bwanabwein.

³⁶Igawa ininounas waked, yunak inganeg livan towen, wankuyeim isaps wayvagam; mo yunak ilivan, ilana, “Kukin yevagam towen. Tab kadilok bukubaptayseig yey.” ³⁷(-)

³⁸E, idibakes nagamag bisewas wag wadadan ked, mo ibus tasiyas asteiy, Pilip son yunak, ineis wayvagam, ibaptays son.

³⁹Ibaptays ikous, igalags, Yowbad Kululuwan mo ikow Pilip, inow. Yunak na-ikin Pilip; anmwaneta ises. Mo inoun in waked, singay imwasaw.

⁴⁰Wankuyeim mwasanin ibānes Pilip nises Asot. Inoun in itāvin vena babaw, illivan livānen Yeisuw gamaga babaw wasigeis, wankuyeim in isap Sisaliy.

Soul ikanavin nanon

(Wotet 22:6-16; 26:12-18)

9 ¹⁻²Mtownen Soul singay ikawkunes Yeisuw nagamags, sivanan kid bikatimates. Mapuna inek tanuwgwes lun sitovek avakaein, ilana, “Tab kadilok kulel let, vāgan bakow banow basekes tanuwgwes bunsiyas sinagog ven Damasik waseg; igaw tanuwgwes tapwāoul tasiyas bivinis, mo beitams waseg gunawotet vāgan banineiv kid kalisiy inoyes Yeisuw inaked, ked townen kalbaleb. Magat vinay o tawaws, mo bayousis gamag tasiyas, bayawen nimes, mo batokes, bameyes Yelusalem.”

³Mtownen itam, isek nalet, ikow; siney nagamag mo ineis ee... kadilakusana Damasik, mititeilin avakaein imek Soul, ikaligwen matan. Mititeilin townen māwana kavikawn meinoy neim walbālab.

⁴Ikalouw wapwepway, iligen aygan teitan, ilana, “Soul, Soul, aveiyag wawun kuybilebeig yey?”

⁵⁻⁶Iwāge Soul, ilana, “O guyaw, kavel yak?”

Ilana, “Yey Yeisuw, nukuybilebeig. Tage kutamanaw, kun ven townen wamatam, teitan gamag mo bilivnek muwotet vāgan bukukwakin.”

⁷Gamag tasiyas sisiy Soul ineis waked, itamanaws, bo isom ninous, peinan iliganes aygan; tage ta-kweitan gamag ikines.

⁸Soul itamanaw, bo ikiplal matan, tage nag ikin, magina bo ikaw matan; mapuna iyousis naman mo itokes inawes ven townen Damasik.

⁹Yam kweitoun isesuna-wan, matan nag ibwein, ta-ikam, ta-imoum, isesuna-wan.

¹⁰Yeisuw nagamag teitan nises ven Damasik, yagan Ananiyas; anmikon waseg naguyaw idibek Ananiyas, ilana, “Ananiyas.”

Ilana, “Yey-ay.”

¹¹⁻¹²Naguyaw mo ilivan, ilana, “Kutamanaw kun kunoy ked townen yagan Didumwal, e, kun Yud wanbunatum, kunev gamag teitan gum-Talisus yagan Soul, peinan bo intougig. E, igaw ininitoug, ikin taw teitan yagan Ananiyas isap, isen naman wawon, vāgan matan beibwein.”

¹³⁻¹⁴Ananiyas ikatimop aygan, ilana, “O Guyaw, gamag babaw ilansa, ‘Taw townen singay takalbaleb, singaya iyagages mugwamag Yelusalem waseg;’ o tut townen ikow inalet tanuwgwes lun sitovek avakaein silmanin kid biyawanim yakamey takavtagin yagam yak.”

¹⁵⁻¹⁶Naguyaw mo idibek, ilana, “Kun kuwtel agulivan māwan, peinan bo akaluweg nawotet taw townen silmanin bikow yagag vena babaw gimgilis wasigeis, o siguyawaw wamtes, o min-Yisleil wamtes. Igaw bakatimlek taw townen youda babaw kalbaleb igaw mo bilouvat peinan yagag yey bikow.”

¹⁷Ananiyas iligen, inoun, isiw wabunatum towen naGuyaw nikatigik, isen naman wawon Soul, ilana, “Bwadag yakoum Soul, daGuyaws nikayabeig nam, silmanin matam bavag beibwein, o silmanin Yowbad Kululuwan Towen Bwanabwein biwekeim. DaGuyaws towen Yeisuw niwekeim yak waked.”

¹⁸Nuwanaw mo ilatimatet matan, mo ikin bwein. Itamanaw mo ibaptays.

¹⁹Kan ikam, amnan mo ibwein.

Soul igeiguy Damasik waseg

Soul siney Yeisuw nagamag ven Damasik waseg nisesus mwasanin yam waseg.

²⁰Tage nuwanaw iggeiguy sinagoga babaw wasigeis, ilana, “Mounid Yowbad natun, mtowen Yeisuw.”

²¹Taliganeins anilivan towen bo isunasun ninous, ilivans, “Tabta taw towen tayagagein Yeisuw nagamag Yelusalem waseg, mo im wadavanuys silmanin biyousis tayakelesiys, mo binawes kid tanuwgwes lun situwawek wasigeis?”

²²Tage Soul mo itawtouna singay, anilivan tawtoun waseg mo ikatimlakes min-Yudiy tasiyas misikesa Damasik waseg, vagan kid bikakinsa Yeisuw mounida Kelis; e, tasiyas bo ibol ninous, ta-mawan bikatimapus aygan.

Min-Yudiy sivines biyousis Soul

²³⁻²⁴Yam mwasanin ikous, min-Yudiy illivans sisiyas, idokes amawan bikatimates Soul; tage teitan gamag idibek Soul mo ikakin ninous. Tasiyas ikayyamats wawkwedan boul yam waseg o boug waseg; ikayyamats kid Soul bisap mo beiweiys. Ven towen nibasis boul watoulan. Gamag nitatos wadunan ked, ikayyamats.

²⁵Mapuna boug waseg inavamul idagis Soul in wanuwan kaynad avakaen, ikaygwagwes ee... in iton wapwepway watoulan boul, mo itamanaw inoun.

Soul in Yelusalem

²⁶Soul inoun in Yelusalem, sivinan kid binekes Yeisuw nagamag; tage tasiyas iwenes, ilansa, “Adok mtowen Soul nag ikanavin nanon.”

²⁷Tage mtowen Banabas mo itok, inekes tasiyas takaweins livanen Yeisuw, ilana, “DaGuyaws bo inek taw towen waked, ikin, ilivans son, wankuyeim ven Damasik waseg mo itawtoun, igeiguy Yeisuw yagan waseg.”

²⁸Min-Yelusalem tasiyas iliganes aygan towen, mo Soul inekes; siney tasiyas nisesus siwotet babaw waseg; e, mo itawtoun, yagan Yeisuw waseg, illivan.

²⁹E, illivans wasigeis min-Yudiy tasiyas takaga-Gilis, mo ikamnimans waseg, mapuna iyokons kid bikatimates.

³⁰Tage Yeisuw nagamag ikakinsa ninous bikatimates Soul; mapuna itokes Soul ineis Sisaliy, wankuyeim mo ikayabes in Talisus.

³¹Tage tayakelesiys babaw nisesusa bwein, wawnuwan Yudiy, o Galiliy, o Samaliy. Nag aveiyag ilivatus; bwein-wan, ikatimweisisa babaws, itawtouns, ivnases Yowbad; peinan Kululuwan Townen Bwanabwein bo ilabes, imlavags singaya babaws.

Pita ivag Ayney mo ibwein

³²Pita itavin inoun vena babaw wasigeis, mo iwloubus inekes Yowbad nagamag mwasanin nisesus ven yagan Lid.

³³Ven townen mo iban taguyagwey teitan yagan Ayney, bweilim kweinim kweitoun immasis wakaban, ta-mawan binoun.

³⁴Pita idibek, ilana, “Ayney, Yeisuw Kelis bo ivageim kid bukubwein. Kutamanaw, kukow musag.” Iligen, nuwanaw mo itamanaw.

³⁵Mina-Lid o min-Selon tabebaws-wan ikines, mo isivins, Yowbad nakaleiwag ikawes.

Dokas ikanig, mo imov vayuwein

³⁶Ven Yop waseg, Yeisuw nagamag natan yagan Tabit, pinyuwein yagan Dokas; vin manawan nawotet bwanabwein, singaya isiwyoubus tasiyas tasimavs.

³⁷⁻³⁸Misumkwey townen ikatoun avakaein, mo ikanig. Iwidis won, isewas bunatum kasiyuwein wanuwan; o peinan Yop kadilakusana Lid, o peinan Yeisuw nagamag niliganes Pita nises ven townen Lid, mo ikayabes tawaw asteiy; inounas, inekes Pita, ilansa, “Nuwanaw kum, taneis Yop.”

³⁹Pita iligen, itamanaw, siney tasiyas mo ineis. Pita isap, im; itokes Pita inawes bunatum townen wanakaew nakanig nimsik-yay. Nakubukwabs babaws-wan itomos wadadan Pita ivvalams, ikatimlakes asikweima babaw, ilansa, “Kukin amakweim. Dokas, igaw son mwamovan nises, nibalal maynsiyas amakweim magayana.”

⁴⁰Pita ikayabes, ineis watoulan, ibasen kitatun, initoug Yowbad waseg, mo itouvin, inek nakanig, ilana, “Tabit, kukit.” Ilivan ikous, mo ikiplal matan, ikin Pita, ikit.

⁴¹Pita iyous wanaman, mo itamnaw; idawes tayakelesiys sisiyas nakubukwabs tasiyas, mo imeis, ikines Dokas bo imov.

⁴²Butun wotet townen in vena babaw Yop walasin, kalamwey babaw gamag mo isimounids Yowbad waseg.

⁴³Pita nisesuna Yop, yam babaw waseg; mimsikey Saymon wanbunatum, mtowen nabalal kaleivin man.

Pita inek Koniliy

10 ¹Gum-Sisaliy yagan Koniliy, mina-Lom sitakanaviys sitovek; takanaviy tasiyas mina-Italiy.

²⁻³Taw townen ansinap bwein, siney angamag ivnases Yowbad; tuta babaw isiwayoub gamag wasigeis. E, tuta babaw initoug Yowbad waseg. Kweitan yam, kwayav waseg, igawa ininitoug, ikin magina gum-libalab teitan imek, idibek, ilana, “Koniliy.”

⁴⁻⁶Iggintov, ivag anpwayat, mo ilivan, ilana, “O guyaw, aveiyag sivinam?”

Gum-libalab mo ilivan, ilana, “Peinan munitoug babaw, sona musiyayoub wasigeis tasimavs, mapuna Yowbad mo inuweim yakoum. Tut townen bweina kwayabes mugwamag mwasanin bineis Yop, bidibakes Saymon beim. Mtowen Saymon, yagan kwayuwein Pita, nises valeyin Saymon wanbunatum, townen tawtelein kaleivin man; nabunatum wakawalaw nises.”

⁷⁻⁸Anelos ilivan ikous, inoun, in; Koniliy mo idawes nagamag asteitoun; tawwotets wanuwan nabunatum asteiy, sisiy natakanaviy tatanok. Takanaviy townen ansinap bwein, tuta babaw iwotet natovek waseg, mamagina takanawein aygan. Anelos anilivan ikatipel isekes ikous, mo ikayabes bineis kid Yop.

⁹Iyam-nen, yanay waseg, igawa waked inounas, ineis kadilakusan ven townen Yop, Pita mo imwen wakunuwatan bunatum silmanin binitoug waseg Yowbad. Peinan sibunatum mamas kunuwatan.

¹⁰Pita ivag anamoun, sivanan beikam. Igawa ikaleibwans wabunatum, matan makava isisawl, ikin magina youd kweitan.

¹¹E, ikin libalab itavis, o mamagin kweim avakaein, matan palavas vatul iyawanis mo ikaygwagwes, italaves vatul waseg ee... in, iton watinow.

¹²Wanuwan kweim townen man babaw nisesus, mansiyas inounas wapwepway kikeis waseg, o mansiyas itatets wapwepway o mansiyas sam pinpineis iyoyows wanakaew.

¹³Pita ikin, mo iligen aygan teitan, ilana, “Pita, kun, kuweiy mansiyas man vagan bukukwam.”

¹⁴Pita ikatimop aygan, ilana, “O Guyaw, adok nag, ta-mawan bakam man tasiyas, bwaboum. Kweiboug nag; adok nagein-vak nag.”

¹⁵Vayuwein mo ilivan, ilana, “Magat Yowbad bivag bwein, bo bwein; awoum kupiyev; awoum kulana, ‘Bwaboum;’ awoum.”

¹⁶Sivatoun ivag mawan, youd townen mo iyum in walbalab.

¹⁷⁻¹⁸Igawa Pita ininuway, ilana, “Aveiyag silawun youd townen nakin?” Koniliy nagamag tasiyas mo isaps, ikatugwans wasigeis mwasanin gamag, ilansa, “Avanuy Saymon nabunatum?” Tasiyas mo ikatimlakes

nabunatum mo ineis bunatum towen waseg. E, itamanaws wakoukwed, ikatugwans, ilansa, “Tabta amibwabwal mtowen Saymon Pita, ne?”

¹⁹⁻²⁰Pita, igaw wanakaew, ininuway waseg youd towen mwana nikin, Yowbad Kululuwan mo ilana, “Kutamanaw. Gamag mwasanin watinow nisesus, inineveims yakoum. Kun, kunekes, mo simwey tasiyas kunounas; awoum nuwam bikubukub, peinan yey tatoneig nakayabes nimeis.”

²¹Pita mo ibus, inekes, ilana, “Yey-yaya, kunneveigs. Aveyiyag wawun nukumeis?”

²²Ilivans, “Matovek teitan takalikay, ansinap kamnat, tuta babaw igoul Yowbad aygan, o min-Yudiy babaw ikakinsa ansinap bwein. E, Yowbad natakayob bo idibek matovek, ilana, ‘Kudow Saymon Pita beim wambunatum, anilivan kuligen.’ Mapuna nikayabem nakam.”

²³Pita ilana, “Bwein, kumeis wabunatum kumasis, peinan bo ikwayav. Nubweig mo tanounas bitaneis.” Iyam nen mo ineis, sisiyas tayakelesiys mina-Yop mwasanin.

²⁴Akweiy yam mo isaps Sisaliy. Koniliy bo inmis Pita bo beim, mapuna mo idawes taliven sisiyas ansinvalams nikatuyouns nimeis.

²⁵Pita mo isap wanbunatum towen, Koniliy inek Pita, ikulul wamatan.

²⁶Tage Pita bo iyous wanaman itamnow, ilana, “Awoum kukulul wamatag, awoum; yey gamag mawana yak.”

²⁷Igawa ilivans son Koniliy, isiws wanuwan bunatum, Pita mo iban gamaga babaw, nisinkunouks wabunatum nisesus.

²⁸⁻²⁹Pita mo ilivan wasigeis, ilana, “Kukwakins gum-Yudiy nag bimek tobwag ven gimgeilin, nag bilakwen, nag bikaypuls son; bwaboum. Tage tut towen agumikon waseg, Yowbad bo ikatimlakeig bweina banekes tobwag ven gimgilis; awoum badok bwaboum. Mapuna nukudaweigs nam, nag apiyev. Kadiloka kudibakeigs wawun nukudaweigs nam.”

³⁰⁻³²Wankuyeim Koniliy mo ilivan, ilana, “Yam kweivas nein wankuyeim, kwayav waseg, kalas itageg, mawana tut towen nagein; e tutan nitoug kwayav yam towen waseg, yey ases wagonbunatum anitoug waseg Yowbad. Igawa aninitoug mo akin taw teitan itamanaw wamatag, anakweim gimagam seikwan. Taw towen mo ilivan ilana, ‘Koniliy, peinan munitoug babaw, o peinan musiwayoub babaw wasigeis tasimavs, Yowbad bo inuweim yak. Tuta towen kwayabes mugwamag mwasanin bineis Yop, bidibakes Saymon beim. Mtowen kwayuwein yagan Pita; valeyin anwbabwal nisesus son. Valeyin tawtelein kaleivin man; nabunatum wakawalaw-o nises.’

³³“Mapuna akatimales gungamag mwasanin, niwekeims, o bo ikalin nuwag yakoum peinan nukum. O tut towen yakamey babaw wamatan Yowbad nakases, sivinem bakaligen daGuyaws nakaleiwag; aveiyag nidibakeim yak, kwatipel babaw kusekem.”

Pita ilivan Koneliy nagamag wasigeis

34-35 Pita mo isilamaw anilivan, ilana, “Mounid akakin wamatan Yowbad gamaga babaw yakids katanok-wan; o vena babaw gimgilis toubweins, kukin bivnases Yowbad, Yowbad mo bikalin nuwan gamag tasiyas wasigeis.

36 “O Yeisuw Kelis, gamaga babaw daGuyaws towen. O Yowbad bo isek anilivan bwanabwein silmanin min-Yisleil yakamey, vagan beita nuwem.

37-38 “O yakamiy kukwakins livanen gum-Nasalet towen Yeisuw; e, kweiboug Yon nigeiguy, nibaptayses gamag, wankuyeim Yeisuw isilamaw nageiguy Galiliy, ininoun in vena babaw Yudiy wasigeis; livanen Yeisuw vena babaw ibekena, peinan Yowbad natawtoun iligob Yeisuw waseg, magina Kululuwan Townen Bwanabwein inek; mapuna ininoun ililabesa gamag babaw, o tasiyas Seitan niyagages, ilivan mo ibweins, peinan Yowbad son. Livanen towen kukwakins-wan.

39 “O yakamey nakakin youda babaw nivvag vena babaw wanuwan Yudiy, o Yelusalem waseg; mo iweiys ikatikavates wakamweilok.

40-42 “Yam kweitoun Yowbad ivag, mo itamanaw vayuwein; gamag mo ikinbunikes. Tage gamaga babaw nag ikines; misinaka yakamey, kweiboug Yowbad nikatigikem takawein bulagan Yeisuw yakamey; bo nakakin neimov vayuwein; simey nakakam; simey nakamoum; mo isekem mawotet vagan bakageiguy gamag wasigeis. E, kageiguy vagan gamag bikakins Yowbad nikatigik Kelis towen igaw mo bikaleiwag vagan bimop asisinap tamwamovs sisiyas takanigs.

43 “O towen Kelis, palopit tasiyas kweiboug nilivnakes towen tawidin sinap kalbaleb wasigeis tasiyas kalisiy bisimounids yagan waseg.”

Yowbad Kululuwan inekes tobwag ven gimgilis

44 Pita igawa illivan anilivan towen, Yowbad Kululuwan mo inekes tasiyas taliganeins livan towen.

45-47 O min-Yudiy tayakelesiys tasiyas sisiy Pita nimeis bo isom ninous, peinan ikines Yowbad isiwyoubus tobwag ven gimgilis, Kululuwan Townen Bwanabwein bo inekes tasiyas asibabaw-wan. Ikines tasiyas singaya iyakawanes Yowbad, o ilivans kaeig kweitan kweitan wasigeis, peinan Yowbad Kululuwan nises wasigeis tasiyas. Min-Yudiy tasiyas bo iliganes siyakawn o sikapleon amav, mapuna Pita ikatiganes, ilana, “Kal bisilbwed sibaptays tasiyas? Tago-mawan bitasilbwed. Bweina bitabaptayses peinan Yowbad Kululuwan bo inekes, mawana yakids kweiboug.”

48 Pita mo ikaleiwag bibaptayses kid Yeisuw Kelis yagan waseg. Sibaptays ikous, mo ilivans, ilansa, “Simayas yakamiy bweina tasesus, igaw yam mwasanin waseg mo bukuyums.”

Sinap towen Pita mo ikamat Yelusalem waseg

11 ¹Yudiy waseg, takaweins livanen Yeisuw sisiyas tayakelesiys bo iliganes sinap towen, mamagina tobwag ven gimgilis bo itimakes Yowbad anilivan.

²⁻³Iyum Pita in Yelusalem, tayakelesiys tasiyas Yowbad nakabivatus wasigeis, mo ivtokes livan Pita, ilansa, “Yakoum bo kunekes tasiyas nag ivag Yowbad nakabivatus? Kwamtans simwey, ne? Bo igak!”

⁴⁻⁵Pita mo itakud livanen nawotet towen, mamagina; “Yey nases Yop, anitoug Yowbad waseg; matag makava isisawl, kweitan youd akin, mamagina kweim avakaein, vatul iyawanis kweim to matan palavas, mo italaves ee... in iton watinow, wamatag-wan.

⁶“Yey akinbunik, wanuwān kweim man babaw, mansiyas sam kikeis inounas watinow, o mansiyas bulawud kawkavek, o mansiyas ta-ivag nimes tage itatets wapwepway, o mansiyas sam pinpeneis iyoyows wanakaew.

⁷“Wankuyeim mo aligen aygan teitan idibakeig, ilana, ‘Pita, kun, kuweiy mansiyas man silmanin bukukwam.’

⁸“Yey akatimop livan towen, alana, ‘O Guyaw, ta-mawan bakam mansiyas man, bwaboum. Kweiboug nag. Adok nagein-vak nag.’

⁹“Vayuwein aygan towen, libalab waseg, mo ilana, ‘Magat Yowbad bivag bwein, bo bwein; awoum kupiyev; awoum kulana; “Bwaboum.” Awoum.’

¹⁰“Sivatoun ivag mawan, youd towen mo iyum in walbalab.

¹¹“Misumkwey towen tawaw teitoun mo itamanaws wawkwedan bunatum towen nakasikey-yay; peinan gum-Sisaliy nikayabes nimekeigs.

¹²“Yowbad Kululuwan mo idibakeig, ilana, ‘Simwey tasiyas kunounas; awoum bisunasun nanoum; bwein-wan.’ Sigwey tayakelesiys asteinim tatanok, tasiyas-nan, nakan, kasiw taw towen wanbunatum.

¹³⁻¹⁴“Towen Koniliy nidibakem ilana, ‘Akin gum-libalab nitamanaw wagonbunatum, ilana: “Kwayabes mwasanin gamag bineis Yop bidawes Saymon Pita beim; mtowen Pita mo bisekeimiy sinap bwanabwein; e, sinap to waseg, Yowbad mo bikatinabweimiy simwey tasiyas mugwamag wambwabwan nisesus.”’

¹⁵“Asilamaw agulivan wasigeis tasiyas, Yowbad Kululuwan mo inekes tasiyas, mawana yakids kweiboug.

¹⁶“Wankuyeim mo anuw daGuyaws anilivan mamagina, ‘Yon bo ibaptays soup waseg, tage yakamiy igaw Yowbad mo bibaptayseimiy Kululuwan Towen Bwanabwein waseg.’

¹⁷“Wanmugwana yakids nitasimounids daGuyaws Yeisuw Kelis waseg, mo isiwyoubuds Yowbad Kululuwan waseg; tut towen mo isiwyoubus tasiyas mawan. Yey ta-mawan bavkek basilbwed Yowbad nawotet.”

¹⁸Min-Yudiy tasiyas iliganes Pita anilivan, ta-mawan bikatimapus aygan. Tage ikavasisa Yowbad, ilansa, “Tage Yowbad bo isiwyoubus tobwag ven gimgilis, vagan asisinap kalbaleb bilavewas, mo sona simwamov bisigagas.”

Tayakelesiys ven Antiyok waseg

¹⁹Kweiboug tanuwgwes-lun neiweiys Sitiben, ikous, mo iyablebes tayakelesiys Yelusalem waseg; mapuna igayays, mwasanin ineis Pinisiy, mwasanin ineis Saypilos, mwasanin ineis Antiyok; vena babaw waseg ikatpeles livanen Yeisuw, tage misinaka isekes min-Yudiy tasiyas nikoulups nisesus ven wunsiyas; nag isekes livan townen gamaga babaw wasigeis, nag.

²⁰Tage sisiyas tasiyas min-Saypilos mwasanin o min-Saylin mwasanin ineis Antiyok mo isekes Guyaw Yeisuw livanen bwanabwein, mina-Gilis wasigeis.

²¹O peinan Yowbad ilabes, babawa gamag ikanavin ninous; mo isimounids Yeisuw waseg; mo ikatimweisis singaya babaw gamag.

²²Tayakelesiys tasiyas nisesus Yelusalem iliganes, mapuna ikayabes Banabas bein kid Antiyok.

²³Towen Banabas isap, ikakin Yowbad singay isiwayoub wasigeis tasiyas, mapuna ikalin nuwan avakaein; e, idibakes gamag tasiyas, ilana, “Kadiloka kusimkines, kutoukums daGuyaws inawotet waseg.”

²⁴Mtownen Banabas gimgilitoun townen, singaya isimounid Yowbad waseg, o itawtoun, peinan Kululuwan Yowbad son nisesus. Misiyamun townen Yeisuw nagamag ikatimweisis; bo ibabaw.

²⁵⁻²⁶Wankuyeim Banabas in Talisus inineiv Soul, iban, mo itok; asteiy mo iyums ineis Antiyok. Nisesus Antiyok bweilim katanok, sitapwaloul waseg bo ikatimlakes tayakelesiysa babaw. Wanmugwana Antiyok waseg idokes magawen yeg Kelistiyan mo idawes tayakelesiys yiges tasiyas.

²⁷Misumkwey townen palopit mwasanin meinoy nimeis Yelusalem, imeis isaps Antiyok.

²⁸Teitan yagan Agabous; Kululuwan Yowbad ikatipel ansinap isek mtowen Agabous, mo itamanaw ilivan, ilana, “Kadilakusa bo bitalivatus tut kalbaleb, vena babaw wasigeis, peinan nag beikweis kweis, o nag beivag kan.” Magina bo ilivnek livan townen. E, anatum Kalodiw nakaleiwag waseg mo ikamat youd townen.

²⁹Mapuna tayakalesiys Antiyok waseg, tasiyas sam sivavag, idokes kid katanok katanok bimulouls; o muloul townen igaw mo biwyabes vagan bilabes tayakelesiys tasiyas Yudiy nisesus.

³⁰Imulouls ikous, mo isekes Banabas son Soul, ikawes, inawes Yelusalem, silmanin tayakelesiys situwaweiks ven townen waseg.

Iweiys Yemes, mo Pita isenas wadeil

12 ¹Misumkwey townen King Elod iyousis tayakelesiys mwasanin vagan kid biyagages.

²⁻³Yemes, mtowen Yon tuwan, bo ibob kayon, pulut tanmunum waseg. Mapuna ikalin nuwes tasiyas min-Yudiy. O peinan ikalin nuwes, Elod mo iyous Pita, wik towen waseg min-Yudiy nag beikams bled son yist, bwaboum.

⁴E, iyousis Pita, inawes wadeil, Elod siwotet isekes natakanaviys vagan bintakavates Pita, natakanaviy tasiyas babiweis sinawatan teinin tatanok. Wananon idok, igaw beikous sagal towen yagan Kaltuwon, mo bitok Pita bisekes min-Yudiy vagan kid biyateles.

⁵Igaw Pita nises wadeil, tayakelesiys singay ikalin nuwes, initougs, igilagels Yowbad waseg, vagan kid bileb towen Pita.

Gum-libalab ikatinob Pita

⁶Pita nises wadeil yam mwasanin ikous, Elod idok yamtan yam mo biyatā waseg. E, bo iboug, Pita imasis wanuwein takanaviys, teitan palatan, teitan palatan, immasis, o sen bo iyawanis naman Pita, walitan palatan, walitan palatan; o takanaviys mwasanin itamanaws wakoukwed, imtakavatays deil towen.

⁷⁻⁸Igaw immasis, Yowbad natakayob isap, itamanaw wadadan Pita; mititeilin im imteil nuwan bunatum. Gum-libalab towen im igipit Pita wawiligan, iwgun, ilana, “Kutamanaw! Nuwanaw!” Anasen tatonen mo ikabilow wanaman. Mo ilana, “Amuwat kuyawen, musandol kuvaligev.” Ivag manawan, mo ilivan, ilana, “Amukweim kusikam, mo kum kwabkunig yey.”

⁹Nuwanawa inek, ikabkun; ineis; nag isimounid waseg youd towen gum-libalab nivag; idoki mamagina matan isisawla mav.

¹⁰Isaps koukwed kweitan, iwekes takanaviys nisesus; isiws isaps koukwed kwayuwein waseg, iwekes takanaviy nisesus; isiws isaps koukwed avakaein waseg, tanmunum; tatonen ikaliyow, mo isaps wawtakon ven; e inounas wawtakon ven, gum-libalab nuwanaw mo inoun in.

¹¹Wankuyeim Pita mo ikakin, ilana, “Bo akakin moundid daGuyaws nikayeb gum-libalab towen nikatinabweig Elod waseg, isilbwed gog asisinap waninous tasiyas min-Yudiy takalbalebs.”

¹²Nanon idumwal manawan, mo inoun in Meliy wanbunatum, manawan Yon inan, Yon yagan kwayuwein Mak; o bunatum towen waseg, babaw gamag nikatuyouns nimeis innitougs Yowbad waseg.

¹³⁻¹⁴Igipit wakoukwed; nakubukwab nawwotet, yagan Lod, mo in ilivan, “Kal yak kuggipit?” Iligen aygan Pita, sona namwasaw isiwlayum; nag ikaliyow koukwed, isawl in wanuwan bunatum, ilana, “Pita bo isap, nitet watoulan.”

¹⁵Ilansa, “Adok nakabalawein yak.”

Iw manawan, ilana, “Mounida Pita nises.”

Mo ilansa, “Adok aluwan-nan.”

¹⁶Igaw Pita iggipit, mo ikaliyowes koukwed, ikines Pita; singaya bo isom ninous.

¹⁷Tage Pita naman itamnow, ikatitun asilivan, mo itakud maʔawan siGuyaw nikatinob waʔeil, mo ilana, “Kudibakes Yemes sen nagamag,” mo inoun in kweitan ven.

¹⁸Iyam gaʔoug mo ivag mouvit wasigeis takanaviys siyas, peinan nag ibanēs Pita.

¹⁹Elod siney natakanaviys mo inineivs Pita; inineivs, bo nag. Mapuna iyateles natakanaviys, ikaleiwag mo ikatimates tasiyas. Wankuyeim mo ilisow Yudiy, iwloubus in Sisaliy, nisikey-yay.

Elod ikanig

²⁰Elod singay ikawkunes min-Tayil sisiy min-Sidon; o tasiyas sivines beimwas, mapuna isineikimas; wanmugwana imwas waseg Bilasit, mtowen nawotet King Elod wanbunatum; wankuyeim asilivan mo ikow isek King Elod vaʔan kid beimwas siney tasiyas. Ivages maʔawan peinan niggimweles kaeis Elod waniven.

²¹Elod ikatigik siyam, ilana, “Yam towen waseg mo kumeis.” E, imeis, mo isap wamtes gamag tasiyas; bo isikam King kweiman, singay maynamnabwein, isin wakaban, mo iliwon wasigeis tasiyas.

²²Illivan ikous, mo iwaks, ilansa, “Nag kweitan gamag aygan maʔawan; towen mamagina yowbad aygan.”

²³Nuwanaw Yowbad natakayob mo iweiy King towen, peinan ibakew Yowbad yakawanan; ikasimwaʔwat nuwan, mo ikanig.

²⁴Wankuyeim babaw gamag mo iliganes Yowbad aygan, vena babaw wasigeis.

²⁵O peinan siwotet bo ikous, Baʔabas son Soul mo ilisawes Yelusalem, sisiy itokes teitan gamag yagan Yon, yagan kwayuwein Mak.

Isekes siwotet Baʔabas son Soul

13 ¹Ven Antiyok waseg, tayakelesiys wasigeis palopit mwasanin nisesus, o mwasanin takatimlakeins Yowbad nakaleiwag. Teitan yagan Baʔabas; tayuwein Simiyon, mtowen yagan kwayuwein Wobug; tatounun gum-Saylin yagan Lukiyos; tawasin Manen, son Elod asibweilim katanok-wan, kweiboug niskuls son towen, min-Galiliy siguyaw avakaein Elod; o tanimen yagan Soul.

²Tasiyas ivnaʔes Yowbad nawotet, ipsapos silmaʔanin; Kululuwan Townen Bwanabwein mo inekes, ilana, “Kadiloka kutames Baʔabas son Soul silmaʔanin wotet kweitan bakatigik siwotet.”

³Mapuna ipsapos innitougs Yowbad waseg, mo isenas nimes wawous tasiyas, ikayabes silmaʔanin wotet towen.

Ineis Saypilos igeiguys

⁴Peinan Yowbad Kululuwan nakaleiwag māwan townen, bo ikayabes, iwloubus, ineis Selusiy, itouws wawag, ikuks ineis Saypilos.

⁵Ineis wanakaew ven yagan Salamis, mo igeiguys Yowbad anilivan, min-Yudiy sisinagog nisesus ven kweitan kweitan wasigeis. Sisiy Yon, mtowen illabes.

⁶Sim townen ikanpeles, isaps palatan, ven yagan Pepos, mo ilouvats sisiy tamgameg teitan, gum-Yudiy, yagan Bayosuw; gamag babaw idokes palopit teitan; nag gog, tayyaweid.

⁷⁻⁸Gabman-nen ven townen, yagan Segipawl, tassinap teitan. Mtownen Bayosuw son Segipawl nisesus. Segipawl idawes Banabas son Soul bimeis, sivilan kid biligen Yowbad aygan, tage tamgameg townen Elaymas idoki bisilbwed; nag sivilan gabman townen biligen Yowbad nakaleiwag. (Yagan Bayosuw takativin bein kaeig kweitan Elaymas.)

⁹⁻¹⁰Mapuna Soul, nidokes yagan piniyuwein Pawl, bo itawtoun singay, peinan son Kululuwan Yowbad, ikinbunik tamgameg townen, ilana, “Seitan natun yakoum, singay takalbaleb o tayyaweid yak; tuta babaw kusilbwed sinap bwein, tuta babaw sivilan Yowbad inaked bukukididog.

¹¹“E, tut townen Yowbad bo beiweiy matam; tut mwasanin nag matam beikin kalas mititeilin, peinan bo beikaw matam.” Nuwanawa matan mo ikaligwen, wankuyeim mo ikaw singay dadub. Ininoun, inineiv kavel biyous naman vagan bitok, peinan ta-māwan bikin inaked.

¹²Gabman townen Segipawl ikin wotet townen, mo isimounid Yowbad waseg; iligen daGuyaws nakaleiwag, waseg isom nanon.

Paul son Banabas ineis Antiyok ven Pasidiy waseg

¹³Pawl siney nagamag mo ikuks, ilisawes Pepos ineis Pelig, wawnuwan ven avakaein Pampiliy; tage Yon ilisawes, iyum in Yelusalem.

¹⁴O tasiyas ikanpeles Pelig ineis Antiyok, ven Pasidiy waseg; isaps ven townen; Sadad waseg mo isiws wanuwan sinagog, tapwaloul silmanin.

¹⁵Tapwaloul waseg ivinis Bukitab, Moses nakaleiwag kweitan yageivein o palopit asilivan kweitan yageivein; ivinis ikous, mo tanuwagan sinagog idibek teitan ikatugwan wasigeis Pawl son Banabas, ilana, “Sigwey yakamiy, kukin amisinap nises, kadiloka kugeiguys gamag babaw wasigeis.”

¹⁶Pawl mo itamanaw, itamnow naman, ilana, “Min-Yisleil yakamiy, o tagouluns Yowbad yakamiy, kunages agulivan.

¹⁷“Min-Yisleil yakids, daYowbads bo idawes tamumwey, igawa nisesus Yidipt; e, ilabes mo itawtounsa singay; o natawtoun waseg imgwayes, mo isaps vagan bineis kid wasiven tatineis.

¹⁸“Wankuyeim sinawawas bweilim wanawoud mo imgwayes tasiyas, o singay moumouvit, peinan tuta babaw takakons tasiyas.

19-20 “DaYowbads mo iweiys ven kweinim kweiy, Kenan wawnuwan. Yowbad nisekes tamumwey sipwepway townen; e nisesus ven townen bweilim babaw, lakatuvas sinawanim bweilim. Wankuyeim mo isekes situwaweḱ vagan bikaleiwags wasigeis. Tasiyas ikaleiwags bweilim babaw ee... mo isilamaw nakaleiwag palopit townen Samwel.

21 “Wankuyeim mo ivag sivines siking kid beivag; initougs waseg Yowbad, mo isekes siking teitan, Kis natun yagan Soul, anakum Binyamin, anbweilim sinawavas.

22 “Wankuyeim Yowbad mo ipiyev king townen Soul; siking kweivaw mo ikatipel isek mtowen Deibid. Livanen Deibid Yowbad nilivan, mamagina, ‘Bo aban Desiy natun Deibid, ikalin nuwag waseg; mtowen biwtel youda babaw maḱwana nanoug yey.’

23 “O maḱwana Yowbad kweiboug-o nilivnek; tut townen bo isek Deibid tabun nawotet vagan bikatinabweids min-Yisleil yaḱids. O Deibid tabun townen yagan Yeisuw.

24 “Yon bo ikidumwal ked wamatan Yeisuw, inageiguy min-Yisleil babaw wasigeis, vagan bilaves kid asisinap kalbaleb, mo bibaptayses.

25 “Yon nawotet iyakous, mo ilivan mamagina, ‘Kuninuways kavel yey. Yey nag Kelis mtowen kukwayamats, nag. Tage watibweloug teitan bo beim; nag kadilokeig bakulul wamatan vagan bakablev nasandol, nag. Peinan townen guyaw avakaein.’

26 “Sigwey, Ebelam tibun yakamiy, o kalisiy yakamiy kugoulus Yowbad, anilivan bo isekeimiy vagan bikatinabweimiy.

27 “O min-Yelusalem sisiyas situwaweḱs nag bikakins mtowen Yeisuw bikatinabweids; o nag bikakins palopits asilivan Bukitab wanuwan. Asilivan tasiyas Saḱad katanok katanok, tapwaḱoul waseg, ikatilutegsa mav tage nag bikakins silawun. Mapuna mo iyateles mtowen Yeisuw; o maḱwana nikatigik kweiboug-o livanen Yeisuw, Bukitab waseg, nagein gog mo ikamat livanen maḱwana nilivnek.

28 “E nag ibanēs ansinap kalbaleb vagan beiweiys, tage bo initougs takaleiwag townen Paylat bikatimet kid.

29 “E livanen babaw nises Bukitab wanuwan, mo iwteles maḱwan; e, imat, ikaygwagwes wakamweilok ee... inibwis, mo ikawes inawes, isewas watakunumwan.

30 “Yowbad mo iyakit, itamanaw vayuwein.

31 “Tasiyas kweiboug sisiy Yeisuw nitanouys ven Galiliy waseg ineis Yelusalem; e, tasiyas yam babaw ikines Yeisuw, bo imov. Asilivan tasiyas mo isekemas yakamey, o isisekes-vak gamag babaw wasigeis.

32-33 “O livan townen bwanabwein kasekeimiy yakamiy, o youd townen kweiboug-o Yowbad nilivnek tamumwey wasigeis. O nagein gog youd townen bo ikamat wasigeis yaḱids, tamumwey tibiys yaḱids, peinan

Yeisuw igawa wakanig nises, Yowbad mo iyakit vayuwein. Livānen nises Sam kwayuwein waseg, mamagina:

‘Yākoum natug yak. Nagein mo nukumlavag natug.’

34 “Igawa wakanig nises bo ikit; nag bikanig vayuwein, nag. Won nag beipwas, nag. Livānen nises, Yowbad anilivan mamagina:

‘Gunasiwayoub waseg Deibid, tage igaw mo basekeim yak.’

35 “E, livan nises kweitan Sam waseg, mamagina,

‘Mugwamag towen kukwayus, nag bukutam won beipwas, nag.’

36 “Deibid inatut ven watinow waseg, bo ikokew Yowbad nakaleiwag; mo ikanig, inekes timen, won tonen bo ipwas.

37 “Tage Yeisuw won nag ipwas, peinan Yowbad bo iyakit vayuwein.

38-39 “O sigwey yakamiy, kunages amalivan, kadiloka kukwakins towen anmwānet biwid adsinaps kalbaleb. Adsinapsa babaw, Moses nakaleiwag waseg na-ikadilok biwid; tage kukin bitasimounids waseg Yeisuw, mo biwid adsinaps kalbaleb, babaw-wan; Yowbad mo binumlev, beikous.

40-41 “Palopit kweiboug-o anilivan mamagina:

‘Tayyagays yakamiy, kukines gunawotet, beisom ninoumiy, mo bukumtāmats.

Peinan mitut waseg gunawotet bawtel;

gamag mwasanin bikatimlakeimiy gunawotet towen, tage nag bukusimounids; nag.’

E, palopit anilivan mamagin. Kadiloka kuvnāseimiy, mata ge tut wanakougwaw livan towen bikwaneimiy.”

42 Pawl nageiguy ikous, isaps wamnat, gamag babaw mo initougs wasigeis, sivines kwayuwein Ṣadad mo bisekes livan towen.

43 Ikous tapwāloul, sinagog towen waseg, gamag babaw bo ikabwākuns wasigeis Pawl son Bānabas, min-Yudiy babaw, sisiyas tawaw tadidumwals mwasanin, tasiyas kweiboug nikawes min-Yudiy asisinap. Pawl son Bānabas mo ilivans wasigeis tasiyas, iguyes silmanin bisimkines Yowbad nasiwayoub waseg.

44 Katanok wik ikous, Ṣadad waseg, ven towen gimgilis babaw ikatuyouns nimeis, sivines kid biliganes livānen Yowbad.

45 Tage Yudiy gimgilis, ven towen waseg, bo igeg ninous, peinan gamag babaw sivines biliganes anilivan Pawl, mapuna ikamnimans sisiyas Pawl nagamag, sona siyagay.

46 Pawl son Bānabas mo iwons, ilansa, “Kadilok wanmugwana bakasekeimiy Yowbad livānen. O peinan kupiyaves livan towen, o peinan kupiyaves ked silmanin mwamovamiy nag beikous, takaleiwagsa yakamiy. Adok livan towen bo bakasekes tobwag ven gimgilis wasigeis.

47 “DaGuyaws nikalawagem māwan, peinan Bukitab waseg anilivan nises mamagina,

‘Bo akalawageim, vena babaw sikamnat yākoum;

Vagan bukuymoves vena babaw gimgilis wadaban pwepway.’ ”

⁴⁸Vena babaw gimgilis iliganes Pawl anilivan townen, bo imwasaws; ikalin nuwes Yowbad waseg, anilivan townen silmanin. O peinan Yowbad nikaleiwag mwasanin son simwamov mo bisigagas, tasiyas bo isimounids Yowbad waseg.

⁴⁹Gamag tasiyas mo ikawes livanen Yowbad, inawes vena babaw wasipalatan.

⁵⁰Tage min-Yudiy bo ikamliwes Pawl son Banabas, mo ivtokes livan. Mwasanin iliganes asilivan, guyvinay siyas nasiwayoubs, sisiyas tamumwey mwasanin; wankuyeim mo ivages asisinap kweitan, ipiyaves Pawl son Banabas, iyagages; ikayabes kid bineis kweitan ven.

⁵¹Tage tasiyas Pawl son Banabas ikatsapis kikeis, musamusan ven townen waseg, peinan ipiyaves ven townen gimgilis. Tasiyas mo inounas waked, ineis Ikoniya.

⁵²Tasiyas gog nikawes livanen Yeisuw bo imwasaws, peinan Kululuwan Yowbad sisiy tasiyas.

Pawl son Banabas ven Ikoniya waseg

14 ¹Mawana ven townen nilisawes, mawana ven townen Ikoniya waseg, isiws wanuwan min-Yudiy sisinagog, igeiguys; e, tasiyas min-Yudiy o mina-Gilis, tabebaws-wan, mo iliganes asilivan tawaw tasiyas asteiy.

²Tage min-Yudiy mwasanin ipiyaves asilivan, ivtokes livan; mapuna tobwag ven gimgilis ikanavin ninous mo ikamliwes Yeisuw nagamag.

³Isesus ee... imwemway-nen; e, illivans livanen Yeisuw nasiwayoub; nag iwenes gamag, nag. O Yeisuw bo ilabes, siwotet tawtoun mo iwteles, wayagan Yeisuw; magina naman mulin Yowbad.

⁴Gamaga babaw ven townen waseg mo ilivis, mwasanin ilabes Yudiy gimgilis, mwasanin ilabes takaweins livanen Yeisuw.

⁵Wankuyeim tasiyas tapiyaveins livan townen mo isilamaws sinap kweitan. Min-Yudiy mwasanin, sisiyas vena babaw gimgilis, sisiyas ven townen gabman-nen, asibabaw idokes biyagages Pawl son Banabas, beiweiy dakul waseg, bikatimates kid.

⁶⁻⁷Tasiyas Pawl son Banabas bo iliganes livan townen, mo isawls ineis Lisitil o Dabi o vena babaw wawnuwan ven avakaen Lakeyoniy; mo igeiguys livanen Yeisuw, vena babaw wasigeis.

Pawl son Banabas ven Lisitil waseg

⁸Taguyagwey teitan isin ven Lisitil waseg, kaken paleyuna ipam; tamawan binoun. Igaw-o inan nikopweyay mawan-wan.

⁹⁻¹⁰Pawl isap, ilivan gamag babaw wasigeis, o taw townen iligen. Pawl mo ikinbunik taw townen, ikakin inanamis nises waseg Yeisuw

vagan bivag kid mo beibwein; mapun mo ilivan, aygan avakaein, ilana, “Kutamanaw, kutadamoms;” taw townen mo ipel, itamanaw, inoun.

¹¹ Gamag babaw ikines Pawl nawotet townen, mo iwaks, aga-Lakiyoniy waseg, ilansa, “Dayowbads bo imlavags gamag, bo ibus, ilakewaneids yakids gamag ven watinow.”

¹² Banabas idokes Yupit, peinan siyowbad yagan Yupit; Pawl idokes Makiyul, peinan talliwon.

¹³ E, tanuwagan lun silmanin Yupit nises ven townen, o lun buntuman nises ven townen koukwed wadadan. Townen ivaniyel asipay bulumakaw wasigeis, mo itokes, sivinan kid beiweis bulumakaw mansiyas, vagan gog beiluns wasigeis Banabas son Pawl, o gamag babaw ninous bo mawan, bo bilabes tanuwagan lun.

¹⁴⁻¹⁵ Tasiyas Pawl son Banabas iliganes, mo isiledes asikweim, peinan singaya igege ninous, mo isawls, inekes gamag babaw. Ages avakaein ilivans, ilansa, “Tawaw yakamiy, awoum kuvages mawan. Yakamey gamag mawana yakamiy gamag; sinap bwanabwein bakasekeimiy vagan gog bukulavewas makava sinap townenan. Kadiloka kumekes Yowbad townen tamwamov, tabunin libalab, o pwepway, o yol, o youda babaw waseg.

¹⁶ “Tut kweiboug Yowbad itames vena babaw gimgilis binoyes siked tatineis.

¹⁷ “Tage peinan Yowbad sivinan bukukwakins kid ansinap bwanabwein, nissekeimiy kweis o kaeimiy bweilim katanok katanok, vagan bukukwamuweips, bukumwasaws.”

¹⁸ Pawl ilivan mawan, o singay keikay siwotet vagan bisilbwades ninous tasiyas; peinan singay sivines beiluns wasigeis.

¹⁹ Wankuyeim min-Yudiy mo isaps, Antiyok o Ikoniyam gimgilis, ivalutsa livan issekkes gamag babaw wasigeis, iliganes mo iweis Pawl, dakul waseg, mo ibiteilis, ilaves in watoulan ven; idokes kid bo imat.

²⁰ Yeisuw nagamag ikatuyouns inekes Pawl nimmasis wapwepway; mo itamanaw, isuwvaw vayuwein wanuwan ven. Iyam ne-gaboug Pawl son Banabas mo ineis Dabiy.

Iyums ineis Antiyok, ven Siliy waseg

²¹ Ven townen Dabiy waseg mo igeiguys, gamaga babaw iliganes asilivan, Yeisuw livanen. Ikous, mo iyums ineis Lisitil; ilisawes Lisitil mo ineis Ikoniyam, ilisawes Ikoniyam ineis Antiyok.

²² Vena babaw wasigeis tasiyas asteiy ilabes Yeisuw nagamag silmanin kid bitawtouns; idibakes, ilansa, “Kadiloka kusimkines misimounid Yeisuw waseg, peinan tuta babaw abads bigeg mo bitasiws wanuwan Yowbad nakabkaleiwag.”

²³ Vena babaw wasigeis sivines tamumwey mwasanin, kalisiy bimtakovates tayakelesiys, mapuna itamnawes gamag mwasanin

tasimounids Guyaw Yeisuw waseg, ipsapos katanok yam o akweiy, ininitougs waseg Yowbad, mo itapwālouls, isenas nimes wawous gamag tasiyas, intougis Yeisuw vāgan bikimtuwes silmanin siwotet townen.

²⁴Ikous, ikanpeles Pisidiy, ineis Pampiliy.

²⁵⁻²⁶Illivans livānen Yeisuw ven Pelig waseg, mo iwloubus ineis Ataliy; itouws wāwag, ikuks, iyums ineis Antiyok, ven Siliy waseg. Kweiboug ven townen tayakelesiys nisekes siwotet, ininitougs silmanin Yowbad bilabes; e, misumkwey townen mo iyakousis siwotet.

²⁷Iyums ineis Antiyok, tayakelesiys mo ikatuyouns, imeis; itākuds livānen Yowbad nawotet tawtoun to niwtel wasigeis tasiyas, peinan bo ikaliyow koukwed vāgan tobwag ven gimgilis mo bisimounids, beisiws bimekes Yowbad.

²⁸Pawl son Bānabas tut kalamwey kadiveiyov nisesus sisiyas tayakelesiys tasiyas.

Ikaleiwags ven Yelusalem waseg

15 ¹Iesua ee... imwemway-nen mo gamag mwasanin meinoy nimeis Yudiy isaps Antiyok, ikatimlakes tayakelesiys, ilansa, “Kukin bukukwawes nakabivatus Ebelam, māwana Moses nakaleiwag, bweina bikatinabweimiy Yowbad; kukin gog nag, bo nag.”

²Pawl son Bānabas mo itamanaws, ikamnimans sisiyas; mapuna tayakelesiys mwasanin ilansa, “Simiyas mwasanin kuneis Yelusalem vāgan bukullivans simsimiyas min-Yelusalem tasiyas tayakelesiys situwāveks o tasiyas takaweins livānen Yeisuw; e, livānen Ebelam nakabivatus kwambuvisis vāgan nanouds bidumwal.”

³Mapuna ilisawes tayakelesiys ven Antiyok waseg, itanouys mo ikanpeles Pinisiy. Ikous, mo ikanpeles Samaliy. Vena babaw ititāvins ikatimlakays, ilansa, “Tobwag ven gimgilis bo ikanavin ninous, isimounids waseg Yeisuw.” Tayakelesiys tasiyas iliganes, mo imwasaws avakaein.

⁴Wankuyeim mo isaps Yelusalem, tayakelesiys babaw imulouls sisiyas tasiyas, o situwāveks imulouls, o takaweins livānen Yeisuw imulouls. Pawl son Bānabas mo itākuds Yowbad nawotet babaw niwtel siney tasiyas.

⁵Takaweins Yeisuw anilivan mwasanin, tasiyas Palisiy kweiboug niyakelesiys, tasiyas mo itamanaws, ilansa, “Kadiloka tobwag ven gimgilis bibwabwes momwes, bikanawes Moses nakaleiwag, mo beisiws biyakelesiys.”

⁶Mapuna ikatuyouns takaweins livānen Yeisuw, sisiyas tayakelesiys situwāveks, vāgan bikaleiwags silmanin sinap townen.

⁷Illivansa babaw ee... ikous, wankuyeim mo Pita itamanaw, ilana, “Sigwey yakamiy, kukwakins kweiboug-o Yowbad nakaleiwag waseg yey,

vagan bakow livanen Yeisuw, banow tobwag ven gimgilis wasigeis, vagan biliganes, mo bimwasaws.

⁸“O peinan Yowbad ikakin ninous gamaga babaw, bo itimakes tasiyas; Kululuwan Townen Bwanabwein mo isekes, mawana yakids kweiboug.

⁹“Bo isimounids waseg Yowbad, mo iwid asinap kalbaleb, mawana yakids. Youda babaw ivag wasigeis tasiyas, mawana yakids.

¹⁰“Tut townen awoum bitayagages nanon Yowbad, awoum bitakaleiwag moumouvit wasigeis budidayas tasiyas. Peinan tammwayas ilapes Moses nakaleiwag; mawana yakids, bo ilapeids, nag kadilokeids.

¹¹“Deisa townen daGuyaws Yeisuw bo isiwyoubuds vagan bitasimounids waseg, mo bikatinabweids; o tasiyas gog bo mawan.”

¹²Tasiyas babaw bo iliganes, isesusa ge ikikapays; wankuyeim mo itakuds Banabas son Pawl, isekes livanen Yowbad nawotet tawtoun, mamagin naman mulin nivag tobwag ven gimgilis wasigeis; o nawotet townen niwtel wasigeis tasiyas Banabas son Pawl.

¹³⁻¹⁵Iliganes, igawa ge ikikapays; Yemes mo iliwon, ilana, “Sigwey yakamiy, kuliganes agulivan. Saymon bo idibakeids: Wanmugwana Yowbad ilokon tobwag ven gimgilis wasigeis vagan bidawes gamag mwasanin bikawes ansinap, o bikawes yagan tonen. E, mo ikamat youd townen, palopit kweiboug nilen Yowbad anilivan, mamagina:

¹⁶⁻¹⁸ “Ikous, mo bayum baw, bawlulavaw Deibid nabunatum townen nigulekwes,

Naven nises makaw; igaw mo bawlulavaw, mo biton bitadumwal beibwein.

Bawtel mawan vagan vena babaw gimgilis mo bineveigs siGuyaw yey.

O silmanin tobwag ven gimgilis tasiyas nadawes gungamag tasiyas.’ DaGuyaws anilivan mawan, o nawotet townen pwamug-o ikamtel tammwayas wasigeis.

¹⁹“Mapuna akaleiwag, awoum youd moumouvit bitasekes vena babaw gimgilis, tasiyas mwana nitouvins inekes Yowbad.

²⁰“Deisa takaleiwags wasigeis tasiyas vagan bipiyaves kan nimgwavis silmanin tobwag yowbad; awoum bisubwans; awoum beikams viniyonan man bo niskwen kayon neimat nanawan, o viniyonan man sona buyavin. Misinak.

²¹“Peinan nagwadiven ivnivins Moses nakaleiwag Sadad katanok katanok, vena babaw wasigeis. E, vena babaw sisinagog wasigeis tageiguys ivinis Moses nakaleiwag, igeiguys.”

Kaleiwag townen ikawes inawes Antiyok

²²Takaweins livanen Yeisuw, sisiyas tayakelesiys situwawek, sisiyas tayakelesiysa babaw, idokes bikayabes sigamag mwasanin, sisiy Pawl o

Banabas bikawes silet binawes Antiyok. E, ikayabes tayakelesiys guyawaw asteiy, teitan Yudas, yagan kwayuwein Basabas, tayuwein yagan Saylas.

²³ Let townen nikawes nakalelel mamagina:

“Kalin nuwem budimayas yakamiy, Antiyok gimgilis, o Siliy gimgilis, o Silisiy gimgilis, tobwag ven gimgilis tayakelesiys yakamiy. Yakamey takaweins livanen daGuyaws Yeisuw, simayas tayakelesiys situwawek ven Yelusalem waseg.

²⁴ “O peinan nakaligen simayas mwasanin bo ivages moumouvit wasigeis yakamiy, o ibol ninoumiy yakamiy asilivan waseg. O yakamey nag kakayabes tasiyas, nag; ninousa tasiyas niweis.

²⁵⁻²⁶ “Mapuna ninom yakamey bo katanok-wan vagan bakakayeb tawaw mwasanin biwekeimiy, sisiyas Banabas son Pawl. O yakamiy o yakamey, babaw yakids ikalin nuwads tawaw tasiyas Banabas son Pawl, peinan tuta babaw inounas abkanig waseg, daGuyaws Yeisuw Kelis silmanin.

²⁷ “Mapuna nakakayabes Yudas son Saylas, biwekeimiy, mo bidibakeimiy mawana nakalel malet townen waseg.

²⁸⁻²⁹ “O simey Yowbad Kululuwan kadok kid nag kweitan kaleiwag moumouvit bakasekeimiy; tage kadiloka kupiyaves kalbaleb sinap tasiyas, viniyonan man nimgwavis silmanin tobwag yowbad, o buyav, o viniyonan man bo niskwen kayon neimat nanawan, o makava kanavay.

“Magat bukuvnases kaleiwag townen bo bukusesusa bwein, bukutawtouns.

Taneimiyo.”

³⁰ Bo itanouys, mo inounas, ineis Antiyok. Tayakelesiys babaw ikatuyouns imeis, mo isekes silet townen.

³¹ Ivinis let townen, bo imwasaws, peinan bo ikambuvis ninous, bo idumwal.

³²⁻³³ O Yudas son Saylas, peinan palopit tasiyas, asilivan babaw wasigeis mo igeiguys tayakelesiys wasigeis, mapuna itawtouns. Nisesus sisiyas ee... imwemway-nen; mo imulouls wasigeis, itanouys, iyums, inekes tayakelesiys tasiyas kweiboug nikayabes niweis. ³⁴ (-)

³⁵ Pawl son Banabas sisiy tageiguys mwasanin, nisesus Antiyok, illivans livanen Yeisuw, o Yowbad anilivan bwanabwein ikatimlakays.

Banabas ilisow Pawl

³⁶ Yam mwasanin ikous, Pawl mo idibek Banabas, ilana, “Kum, taneis, takines tayakelesiys vena babaw, kweiboug-o nitaguyes livanen Yeisuw; mo bitakin amawan sikasis.”

³⁷ Banabas itam, ilana, “Bwein;” ilana, “Adok sod Yon bitanounas.” Yon yagan kwayuwein Mak.

³⁸Pawl ipiyev, ilana, “Nag, peinan kweiboug nilisaweid ven Pampiliy waseg, ipiyev dawotet, iyum. Nag kadilok sod bitanoun. Bweina bises.”

³⁹Mapuna ikamnians. Banabas son Mak mo ilisawes Pawl, ikuks ineis Saypilos.

⁴⁰⁻⁴¹Tage Pawl idow Saylas; tayakelesiys initougs waseg Yowbad, sivines kid Yowbad bilabes tasiyas asteiy mo inounas, ikanpeles Siliy o Silisiy, vena babaw wasigeis ilabes tayakelesiys, vagan kid bitawtouns.

Timotiy inekes Pawl son Saylas

16 ¹E, isaps Dabi, ikanpeles, mo ineis Lisitil. Ven townen waseg mo ibanēs taw teitan, kweiboug-o niligen livanen Yeisuw. Mtownen yagan Timotiy, inan vinen-Yudiy, isimounid Yeisuw waseg; taman gog guma-Gilis.

²Tayakelesiys ven Lisitil waseg o Ikoniya waseg idokes kid Timotiy singay tadidumwal.

³Pawl sivanan taw townen sisiy bineis, mapuna ibob momwan, magina Ebelam nakabivatus; peinan gamag babaw ikakins Timotiy taman guma-Gilis; o peinan min-Yudiy babaw nisesus ven townen, o Pawl nag ivag sivanan tasiyas bivtokes livan, mapuna mtowen Timotiy ibob momwan.

⁴Igawa ikaninapels ven katanok katanok wasigeis, mo ikatpeles sikaleiwag isekes, kweiboug nikalawages Yelusalem waseg. Tasiyas takaweins livanen Yeisuw, o tayakelesiys situwaweke, isekes sikaleiwag, ilansa, “Kadiloka kuvnases.”

⁵Mapuna tayakelesiys iyamweis sisimounid; o yam katanok katanok ikatimweisis, mo ibabaws.

⁶Ikanpeles ven avakaein Piligiy, ikous mo ikanpeles ven avakaein Galetiy. Yowbad Kululuwan mo isilbwades, awoum bisekes asilivan min-Esiy wasigeis.

⁷Wankuyeim mo ineis Misiy, sivines kid bineis Bitiniy; iyokonsa, nag; peinan nag beitam Kululuwan Yeisuw.

⁸Misiy ikanpeles ikous, mo iwloubus ineis Tilowas.

⁹O boug waseg, Pawl matan isisawl mav, magina ikamikon, ikintuwen ikin wayol ikin gum-Masidoniya itamanaw iton palatan, ilana, “Kudopel kum wamaven Masidoniya, kulabem yakamey.”

¹⁰Pawl ikikin ikous; bo ikatimamal, sivanan kid bidopel bein Masidoniya; kadok kid Yowbad nidawem bakan bakasekes tasiyas livanen Yeisuw. Ninom katanok-wan.

Lidiy iyakelesiya

¹¹Kakilev Tilowas, kadumwala kan Samotiles kamasis; neiyam nen kakuk ee... kalug Niyapolis.

¹²Niyapolis waseg kabus kan Pilipay, ven townen wunovek wawnuwan Masedoniya; mina-Lom babaw o mina-Lom sitakanaviy babaw nisesus ven townen waseg. Yam mwasanin kasesuna ven townen.

¹³Sādad waseg kadoki gamag mwasanin ininitougs o ititapwālous Yowbad waseg wadadan lay kweitan; mapuna kasap adunan ked kan lay townen, kawekes vinay mwasanin, kakaypul simayas; kallivan.

¹⁴Guyouvin natan yagan Lidiy, vinen-Tayatil, taymayisein kweim bwabwel, tuta babaw nititapwāloul Yowbad waseg; e, manāwen mo iligen amalivan. Peinan Yowbad bo ikatiboug nuwan vāgan biligen kid Pawl anilivan.

¹⁵Peinan iligen livānen Yeisuw, mo nakabaptayses Lidiy sen angamag. Ikous, Lidiy mo idibakem ilana, “Magat bukudokeig nasimounid yey daGuyaws waseg, kadiloka kumeis waganbunatum, agubwabwal yakamiy.” Ivvalut ee... mo kāmam.

Imapumas wādeil ven Pilipay waseg

¹⁶Yatam yam nakan tapwāloul silmānin, kaninoun ee... mo ilivatam nukubukwab natan, kululuwan waseg ikatigigik aveiyag igaw bikamat, o nawotet maysan singay avakaen ikawes taliven.

¹⁷Vin nāwen ikabkunim yakamey simey Pawl, iwkuwak, ilana, “Yowbad Tatawtoun nagamag tasiyas; tasiyas ikatimlakeids ked townen waseg Yowbad bo bikatinabweids.”

¹⁸Nawkuwak anilivan māwana yam babaw. Mapuna igeg nanon Pawl, itouvin, idibek yeiluw townen, ilana, “Akalawageim wayagan Yeisuw Kelis, kulisow manāwen vin, kunoun.” Mitiyāmun townen yeiluw mo inoun.

¹⁹Vin manāwen taliven ikakins bo iyakous wawun simoney, igeg ninous, iyousis Pawl son Saylas, ibiteilis tasiyas ineis wawtakon ven vāgan kid biyateles wamtes tasiyas takaliwageins ven.

²⁰⁻²¹E, itokes, inawes takalleiwags wasigeis; ilansa, “Min-Yudiy tasiyas kalbaleb sinap ivāges wadavanuys, peinan sivines kid bisekemas sinap kweitan, o asisinap townen bwaboum wasigeis yakamey mina-Lom.”

²²Gamag babaw mo ilabes, sivines kid biyagages Pawl son Saylas. Takalleiwags mo ilansa, “Kunisis asikweim, mo kuweiys amweilok waseg.”

²³Iwaways avakaen wawous; ikous, mo ikalabus, idibakes takaymatein deil ilansa, “Kukwaymates tasiyas beibwein. Awoum bisaps bineis watoulan.”

²⁴Towen iligen, isenas wādeil bunatum tawtoun waseg, ilokes kikeis amweilok akiy wanuwein; ta-māwan biyaganis kikeis.

²⁵Watapwan boug Pawl son Saylas ikululs wamatan Yowbad, initougs waseg, ikannuwels asiwous. Tasiwuns deil mwasanin ikatilutegs.

²⁶Mo ivag nik avakaen, kakolan bunatum dakul igogewns-wan; koukweda babaw ikaliyowes, o sen o amweilok niyousis tasiwuns deil nimes o kikeis bo ipalpaleiks o itigtāgut ikous.

²⁷Takaymatein deil mo ilaktukit, ikin koukweda babaw bo ikaliyowes, idok kid bo isawls tasiwuns deil babaw; igeg nanon, ikow napulut tanmunum vāgan kid bibes nipowun tatonen, beimat.

²⁸Pawl ikin, aygan avakaein ivag, ilana, “Awoum kuygagem toneim yak. Yakamey-yaya, amababaw-wan.”

²⁹Takaymatein deil idow teitan bimey lamp; mo ikow, isawl, isiw wanuwan deil, itatat won, ikulul wantes Pawl son Saylas.

³⁰Wankuyeim mo itokes ineis wamnat, ilana, “Adok guntuwawek yakamiy, kadiloka kudibakeigs aveiyag bavag silmanin kid Yowbad bikatinabweig.”

³¹Ilansa, “Kadiloka kusimounid daGuyaws Yeisuw waseg, mo bikatinabweimiy simwey amgwamag.”

³²Mo idibakes tasiyas livanen Guyaw Kelis, siney gamaga babaw nisesus wanbunatum.

³³Mitiyamun towen boug waseg, tanuwagan deil ikow yevagam, buyavis wawous itawis. Ikous, mo ibaptayses sen nagamag.

³⁴Ibaptayses ikous, mo isiws wanbunatum, kaeis isekes, ikams, peinan imwasaws avakaein sineya-wan angamag; livanen Yowbad niliganes.

Ikous, mo iyums ineis wadeil.

³⁵Iyam nen gaboug takaliwageins ven mo ikayabes sipilismans ineis wadeil, ilansa, “Kulavewas tasiyas asteiy, bineis.”

³⁶Tanuwagan deil ikow asilivan towen, isek Pawl, ilana, “Takalawageins ven bo ikayabeimiy bukounas. Bweina beitout ninoumiy, kuneis.”

³⁷Pawl idibakes, ilana, “O yakamey mina-Lom yakamey; bo iwemas wantes gamag babaw nov, o nag iyatelemas vagan bikakins amasinap aveiyag kalbaleb. Makaw isenamas wadeil; nagein gog bikakiws asimwasin, bikawumemas mo bikayabemas. Kapiyev. Bakasesuna. Kadiloka tasiyas bimeis bitokemas bakan wamnat, mo bikayabemas.”

³⁸Tasiyas pilismans mo inekes takaliwageins ven; asilivan ikatpeles isekes. Kweiboug nag bikakins Pawl o Saylas mina-Lom tasiyas; e, tut towen mo ikakins, asimwasin seikwan.

³⁹Aspwayat inekes Pawl son Saylas, asilivan siwayoub, mo itokes ineis wamnat, ikayabes bineis kid kweitan ven.

⁴⁰Ilisawes deil mo inekes Lidiy, inekes tayakelesiys, iguyes, mo itanouys, inounas, ineis.

Moumouvit ilivatus ven Tesalonik waseg

17 ¹Inounas mo isaps Ampipol; ilisawes Ampipol mo ineis Apoloni; ilisawes Apoloni; mo ineis Tesalonik. Min-Yudiy sibuntuman tapwaloul yagan sinagog nises Tesalonik.

²⁻³Mawan ansinap vena babaw waseg, Pawl mo isiw wanuwan sinagog ikatimlakes silawun Bukitab. Kweitoun Saded waseg ikatiboug nuwes min-Yudiy tasiyas. Isek ninous mawan; ilana, “Kadiloka gamag biyagages Kelis, bikanig, mo beikit vayuwein. Livanen nises Bukitab

waseg, bo maᵛan. Silawun gunkatimlakay Yeisuw, mtowen mound Kelis.”

⁴Pawl ivvalut ee... mo isimounids mwasinis gamag, mapuna ikatuvases sisiyas Pawl son Saylas; mina-Gilis-vak tavnaseins Yowbad isimounids singaya babaw, sisiyas guyvinays mwasanin.

⁵Tage min-Yudiy mwasanin bo ikameiliws, ivtokes livan. O mwasanin tasiyas tabgumats bo iliganes asilivan, ikatuyouns gamag babaw, sivines kid bikawpwanaws wasigeis Yeisuw nagamag, ineis Yeson wanbunatum, iwkuwaks; ilansa, “Kadilok tasiyas Pawl son Saylas bimeis wamnat.” Peinan min-Yudiy ninous bo biyagages Pawl son Saylas.

⁶⁻⁷Iyyokons, bo nag; mapuna itokes Yeson siney Yeisuw nagamag mwasanin, inawes takaliwageins ven wamtes, iwkuwaks, ilansa, “Gamag tasiyas niyagages vena babaw, nagein mo imeis wadavanuys yakids, Yeson anbwabwal tasiyas nisesus. Tawaw tasiyas bo ibwabwes Sisal nakaleiwag, peinan ilansa, ‘King kweitan nises, yagan Yeisuw.’ ”

⁸⁻⁹Gamag babaw iliganes livan towen, mo igege ninous, sisiyas takaliwageins ven; mapuna idibakes, ilansa, “Yakamiy simiy Yeson kadiloka kupayins, money mwasanin kusekemas, mo kunounas. Igaw kukin bukusesusa bwein, o nag kweitan sinap bukuvages maᵛana kalbaleb sinap towen, igaw tut wanakoug mo bakayamen mimoney.”

Takaweins livanen Yeisuw ineis Beloy

¹⁰Yeisuw nagamag ikatimamals, boug waseg ikayabes Pawl son Saylas, bineis Beloy. Isaps Beloy mo ineis wasinagog, isiws wanuwan, livanen Yeisuw mo isekes min-Yudiy tasiyas.

¹¹E, tasiyas asisinap bwein, nag maᵛan min-Yudiy tasiyas nisesus Tesalonik; bo iseiw nuwes Pawl anilivan towen sivines binganegs-wan; e, yam babaw ivnivins Bukitab vagan bikakins kid livan towen mound, o nag, yaweid.

¹²Babaw gamag mo isimounids, sisiyas vinay-nen Gilis guyvinays, sisiyas tawaw mwasanin.

¹³Wankuyeim min-Yudiy tasiyas nisesus Tesalonik mo iliganes Pawl nises Beloy igeiguy livanen Yowbad; mapuna inounas imeis Beloy, ivtokes livan, vagan beivag aspwayat gamaga babaw, mo bikamliwes towen Pawl.

¹⁴Mapuna Yeisuw nagamag tayakelesiys ven towen mo ikatimamals ikayabes Pawl biwloubus kid bein wayol. Tage Saylas son Timotiy nisesusa ven towen Beloy.

¹⁵Gamag mwasanin itokes Pawl, itouws wawag, ikuks, ineis Atens; Pawl mo idibakes tasiyas, ilana, “Kuyums kuneis kukines Saylas son Timotiy nuwanaw bimekeigs,” mo iyums ineis Beloy.

Pawl nises ven towen Atens

¹⁶Pawl, igawa nises Atens ikaymates Saylas son Timotiy bimeis; bo igege nanon peinan ikines tasiyas taginvens singay imgamegs. O babaw siyowbad tobwag wasigeis ikululs wantes.

¹⁷Mapuna yam babaw Pawl mo isen kweitan livan, Yowbad livanen, min-Yudiy sisinagog waseg, o tavnaseins Yowbad wasigeis, o gamag mwasanin ilivatus wavtakon ven, igeiguy wasigeis.

¹⁸Tassinaps mwasanin tasiyas Epikul sisiyas tasiyas Sitowik illivans sisiy Pawl. Mwasanin iliganes, ilansa, “Taw towen, makava illivan. Aveiyag illivan?” Mwasanin gog ilansa, “Livanen kweitan ven siyowbad illivan.” peinan Pawl anilivan Yeisuw inakanig silmanin o neikit vayuwein.

¹⁹⁻²⁰Mapuna itokes Pawl inawes buntuman Konsel waseg, yagan Aliyopag, ilansa, “Tabta bukwatimlakes amsinap towen kweivaw, towen nukulivan wasigeis gamaga babaw; kadok kid youd kweitan towen isowsiw watigem yakamey. Sivinem gog bakakakin silawun sinap towen.”

²¹Peinan min-Atens sisiyas asibwabwal tuta babaw sivines bikatilutegs youd kweivaw, o livanen youd kweivaw billivans sisiyas; mapuna tuta babaw inineivs sinap kweivaw.

²²⁻²³Pawl mo itamanaw wakabgeiguy bunatum Aliyopag wanuwan, ilivan. Ilana, “Min-Atens yakamiy, bo akin singay tamgamegs yakamiy. Bo atavin miven akikinena wuliyougwan tapwaloul, bo aban abeilun kweitan. Lelel-nen mamagina, ‘Silmanin yowbad tamtawas.’ Yakamiy nag kukwakins Yowbad towen nukukululs wamatan, yey mo bakatimlakeimiy yagan towenan.

²⁴“Yowbad towen bo ibun youda babaw, o peinan towen tanuwagan libalab, o ven watinow, nag bimasis wabunatum towen tawlules wanamads; nag.

²⁵“O nag ivag sivan aveiyag namads biwtel silmanin towen, peinan bo nisekeids damwamovs o kululuwads, o dawliyougs babaw-wan.

²⁶“O tabuds anmwānet-wan Adam waseg, bo ibunids, nitamlavags vena babaw gimgilis wadaban pwepway. Bo ikaleiwag idatuts, o dakablivis pwepway ven katanok katanok wasigeis.

²⁷“O bo ikaleiwag vagan kid bitaneves mtowen Yowbad; igaw takinew mo bitaban, peinan kadilakus nises wasigeis yakids katanok katanok.

²⁸“Mtowen waseg tamwamovs, taninouas, tasesus. Mawan tawutun wous nilivan wasigeis yakamiy,

‘Peinan yakids Yowbad tibun yakids.’

²⁹“E, peinan Yowbad tabuds yakids, awoum bitanuways Yowbad kid mawana goul o silib o dakul, o aveiyag gamag teitan binuway mo bibun wanaman, nag.

30-31 “O Yowbad gog inumlev tut kweiboug dadub; tut gog towen ikaleiwag vena babaw gimgilis vāgan bikanavin ninous, peinan nikatigik tutan katukin wanakougwaw, yam towen bo bikatukin gamag babaw wasigeis, amtowen bwein, amtowen kalbaleb; e, teitan taw bo itamnow, takaleiwag tatonen. Kakakin anilivan moundid, peinan taw towen nikanig, Yowbad ivag mo ikit vayuwein.”

32 Ikatiliganes livānen dakabeikits kanig waseg, mwasanin mo igigs peinan nag isimounids; mwasanin gog ilansa, “Igaw, kweitan tut mo bukuwgavaw amlivan towen vāgan bakaligen.”

33-34 Pawl iligen asilivan, mo ilisawes, inoun. Mwasanin gamag bo isimounids anilivan waseg, mo ikatuvases sisiy Pawl, teitan Diyonisiy, mtowen takaleiwag teitan bunatum Aliyopag waseg, nātan Damalis, sisiyas mwasinis gamag.

Pawl ven Kolinit waseg

18 1-2 Wankuyeim Pawl mo ilisow Atens in Kolinit; iban gum-Yudiy yagan Akwil, naven Ponit. Kweiboug nises Itāliy, o peinan Sisal Kalodiw nakaleiwag vāgan min-Yudiy babaw bilisawes naven towen Lom, mapuna ilisow Itāliy; e, mwana nimeis Kolinit son nakwaw Piliskil.

3 Towen nawotet, ikow man kulivis mo ibsibas ivag bunatum. O peinan Pawl ikakin sinap towen, mo inekes, sisiy nisesus, iwwootets.

4 Tapwāloul waseg, Sādad katanok katanok illivans siney Min-Yudiy, o mina-Gilis, isimkakin vāgan bisimounids waseg Yeisuw.

5 Wankuyeim Saylas son Timotiy meinoy nimeis Masidoniya isaps Kolinit, igawa Pawl ivvalut wotet towen, ikatimlakes min-Yudiy vāgan bikakins beibwein mtowen Yeisuw moundid Kelis.

6 Wankuyeim tasiyas mo ipiyaves Pawl anilivan, itawyages, asilivan kalbaleb waseg; mapuna ikatsap anakweim vāgan bikakins bo ipiyaves tasiyas, ilana, “Deis! Peinan kupiyaves livan towen, igaw bukumtāmats; takaleiwag yakamiy. Bweina bo batouvin basekes livan towen tobwag ven gimgilis, vāgan bo biliganes.”

7 Ikous, mo ilisawes, isiw wanbunatum tavnāsein Yowbad teitan, yagan Titos Yusitos, nabunatum nises sinagog wadadan.

8 Tanuwagan sinagog, yagan Kilisip, bo iliganes livānen Guyaw Yeisuw, sen angamags babaw; o min-Kolinit babaw bo iliganes, mo ibaptayses.

9-10 Kweitan tut, boug waseg, Pawl immasis, anmikon waseg mo ikin naguyaw Yeisuw, ilana, “Pawl, awoum beivag ampwayat, kusimkakin livāneig waseg; awoum kukwāpay, peinan agugwamag namagleis nisesus ven towen. Ta-kweitan gamag beiweim o biyagageim, peinan soum yey tases.”

11 Mapuna Pawl isesuna katanok bweilim ikous, mo tibukon kweinim katanok. Misumkwey towen waseg ikatimlakes ven towen gimgilis vāgan kid bikakins livānen Yowbad.

¹²⁻¹³Mitiyamun townen, min-Akay sigabman avakaein, yagan Galiyon, nises ven townen. Min-Yudiy ninous katanok-wan mo itamanaws iyousis Pawl itokes inawes Galiyon wankabkaleiwag, aban townen wamatan, ilansa, “Taw townen sivilan bibob dakaleiwags, ikatimlakay tobwag tapwɔloul vagan bitateiy gamag ninous.”

¹⁴⁻¹⁵Pawl sivilan bisilamaw anilivan, tage Galiyon mo idibakes min-Yudiy tasiyas, ilana, “Min-Yudiy yakamiy, magat townen ansinap kalbaleb, o magat biyageg son, bweina baligen amilivan; o peinan sinap townen yakamiyana amisinap, sinapun imiven, o livanen imiven, kadiloka yakamiyana bukwaleiwags; yey apiyev.”

¹⁶Ilivan mawan, mo ikayabes, ilisawes nakabkaleiwag townen.

¹⁷Gamag babaw mo iyousis tanuwagan sinagog yagan Sositen, iwaways-wan kabkaleiwag townen wamatan; tage Galiyon nag igege nanon sinap townen waseg.

Pawl iyum in Antiyok

¹⁸Wankuyeim Pawl isesuna ven townen, yam mwasanin. Ikous, mo ilisawes Yeisuw nagamag, itanouys siney Piliskil son Akwil; ikuks, bineis Siliy. Isaps ven Kenikil waseg, Pawl iduy kunun peinan anilivan katout Yowbad waseg.

¹⁹Ikuks ee... ilugs Epesos, Pawl mo ilisawes tasiyas, isiw wanuwan sinagog mo illivans sisiyas min-Yudiy; vagan bivag ninous bikanavin.

²⁰⁻²¹Tasiyas mo idibakes Pawl, ilansa, “Kadilok kadiveiyov tut yakoum simey yak tasesus.” Ilana, “Nag; bo banoun. Kukin nanon Yowbad mawan, igaw mo bayum bam.” Mo itouw wawag, ikuks, itanes min-Epesos.

²²Ilugs Sisaliy, ikatulag in Yelusalem, imulouls siney tasiyas tayakelesiys; mo inoun in Antiyok.

²³Isesuna yam mwasanin waseg; ikous, mo inoun ilakwanes tayakelesiys ven katanok katanok wasigeis; isilamaw ven katanok katanok wawnuwan ven Galetiy; iyakous, mo ikanapel in ilakwanes ven katanok katanok wawnuwan Piligiy; ilabes tayakelesiys vagan kid bitawtouns.

Apolos igeiguy ven Epesos waseg

²⁴Gum-Yudiy tassinap teitan mo isap Epesos, townen yagan Apolos, naven Aleksanidel, singay ikakin Bukitab, o itawtoun geiguy waseg.

²⁵Kweiboug mwasanin gamag bo ikatimlakes, mapuna ikakin Yowbad inaked. E, bo iseiw nuwan livanen Yeisuw bilivan, anilivan moundiwan. Ikatimlakes gamag mwasanin anilivan townen. E, ikakin sinapun tabaptaysein gamag townen Yon. Tage sinapun Yeisuw nag iyakous.

²⁶Anilivan kamnat mo isilamaw sinagog wanuwan. Piliskil son Akwil iliganes, mo idawes im wasibunatum, ikatimlakes Yowbad inaked, mo ikakin bwein.

27-28 Iyakous nawotet ven towen, mo ivag sivinan kid bein Akay. Yeisuw nagamag ilivans, “Bwein;” mo ilelels let silmanin ven towen tayakelesiys-nen, vagan bivnases mtowen Apolos, anbwabwal tasiyas. Isap wasiven, mo ikatimweis asisinap tayakelesiys tasiyas. Kweiboug-o Yowbad nilabes mo isimounids Yeisuw waseg, misiyamun towen asisinap mo ikatimweis peinan Apolos ilabes; o anilivan itamap wasigeis min-Yudiy asilivan, peinan anilivan tawtoun waseg ikatimlakes silawun Bukitab, vagan bikakins kid moundid Kelis mtowen Yeisuw.

Pawl nawotet ven Epesos waseg

19 1-2 Igaw Apolos nises Kolinit, Pawl ikaninapel ven tasiyas wanawoud. Ikous mo isap Epesos; mo ilivatus Yeisuw nagamag mwasanin; idibakes, ilana, “Nukuliganes livanen Yeisuw, Yowbad Kululuwan Townen Bwanabwein iwekeimiy tan, o nag?” Ikatimapus aygan; ilansa, “Nag. Nag bakaligen livanen Kululuwan Bwanabwein.”

3 Pawl mo ikatugwan; ilana, “Amawan nukubaptays?” Ilansa, “Nakaligen Yon nageiguy, mo ibaptaysem yakamey.”

4 Iw to Pawl, ilana, “Yon bo ibaptayseimiy vagan bikanavin ninoumiy, o vagan bukulavewas amisinap kalbaleb, sinap bwanabwein bukuyousis; o Yon nidibakeimiy ilana, ‘Kadiloka bukusimounids waseg mtowen nibkunig yey.’ Anilivan gog livanen Yeisuw.”

5 Gamag tasiyas bo iliganes Pawl anilivan, mo ibaptayses Guyaw Yeisuw wayagan.

6 Pawl isen naman wawous tasiyas, Yowbad Kululuwan mo inekes, ilivans kaeig kweitan kweitan wasigeis, o ipalopisays Yowbad anilivan waseg ilivnakes.

7 Babiweis tawaw tasiyas adok sinawatan teiy.

8 Pawl mo isiw wanuwan sinagog, anilivan kamnat waseg igigeiguy kweitoun tibukon; livanen Yowbad nakaleiwag isekes, vagan kid bisimounids waseg.

9 Wankuyeim mwasanin gamag ipiyaves anilivan, ikapidabs, ivtokes livan Yeisuw inaked, e wamtes gamag babaw ivtokays mawan. Mapuna Pawl itokes inagamag ilisawes, isiw wanuwan Tilan nabunatum, sikul buntuman, yam katanok katanok mo ikatimlakes gamag.

10 Nawotet towen niwtel akweiyuna bweilim waseg, min-Esiy babawan mo iliganes livanen Guyaw Yeisuw, min-Yudiy sisiyas mina-Gilis.

11 Yowbad nawotet niwtel Pawl naman waseg. Inawotet kweitan-wan, singay tawtoun.

12 E, gamag ikawes Pawl anakweim o kweim towen itanob magin waseg, isen takatouns wawous, inimul, mo ibweins, o yeiluw ilisawes mwasanin gamag mo ibweins.

13-14 Min-Yudiy tamgameg mwasanis mo isaps, iyokons kid bikayabes yeiluw, Yeisuw yagan waseg. Tasiyas ininounas vena babaw ikikayabes

yeiluw; maysan wotet townen ikokews. Tawaw teinim teiy, times tanuwagan lun avakaein, Sikev yagan; tasiyas iyokons kid bikayabes yeiluw, Yeisuw yagan waseg; ilansa, “Kadibakeimiy Yeisuw wayagan kunounas; yeg townen Yeisuw, Pawl nikavvatag waseg.”

¹⁵Yeiluw townen ikatimop asilivan, ilana, “Akakin Yeisuw, akakin Pawl, tage yakamiy kalisiy yakamiy?”

¹⁶Takayeiluw townen mo ipel iwawaysa mav tasiyas, itawtoun wasigeis, ikididul wous ibuybuyav-wan; mapuna sona mwadiyes mo isawls ineis wamnat, aspwayat nag bikakit vagan.

¹⁷Min-Epesos babaw iliganes youd townen, mo ivag aspwayat, tasiyas min-Yudiy sisiyas mina-Gilis misikes Epesos. Mapuna mo igoulus mtowen Guyaw Yeisuw.

¹⁸Babaw gamag tasiyas mwana niliganes livanen Yeisuw mo ikamteles asisinap kweiboug dadub waseg.

¹⁹O tamgamegs babaw simeg nileles nein wasibuk, nimeyes sibuk maynsiyas, mo igabus wantes gamaga babaw. Maysan buk tasiyas ivinis, singay avakaein, sinawanim tawsan kina.

²⁰Wotet babaw waseg livanen Yeisuw mo itawtoun, gamaga babaw o sinap babaw wasigeis.

Min-Epesos ikawpwanaws

²¹Wotet townen ikous, Kululuwan Teiwen Bwanabwein mo isek nanon Pawl, ilana, “Singay sivinag batavin Masidoni y o Akay, mo ban Yelusalem. Wankuyeim gog mo banoun ban Lom.”

²²Mapuna ikayabes natouwat asteiy, ineis Masidoni y, yiges Timotiy son Elasis. Townen gog Pawl isesuna Esiy tut kayakus waseg.

²³Misiyamun townen, gamaga babaw inoyes Yeisuw inaked, mapuna ven townen Epesos gimgilis mo ilivatus moumouvita singay.

²⁴E, takatanak teitan yagan Dimitil, mtowen tawtelein didawag silib, ibwabubs sen nagamag; biyakousis, mo bimeis gamaga babaw bigimwals; bikawes binawes vagan simeg bidagis wanuwan didawag townen; imgamegs silmanin siyowbad natan yagan Dayan, vagan kid bilabes. Didawag tasiyas singay kawkwavek mayses.

²⁵O gamag babaw inganegs Pawl anilivan, mo ipiyaves meg silmanin nawen Dayan; mapuna Dimitil idawes nagamag sisiyas takatanaks babaw; ikatuyouns imeis, Dimitil mo iliwon; ilana, “Tawaw, kukwakins dawotets townen waseg kads tabanes vagan bitakams.

²⁶“O kukwakins Epesos gimgilis, o gimgilis ven tasiyas Esiy wawnuwan, bo iliganes aygan Pawl, mo ipiyaves adgeileiws tatoneids, peinan Pawl anilivan mawana, ‘Yowbad tasiyas kubunis wanimamiy, yowbad tobwag tasiyas.’

²⁷“Adok tut kalbaleb bitalivatus; peinan gamag bipiyaves Dayan navavag tasiyas tabunins; o dayowbads avakaein nawen bidokes tobwag

yowbad, bipiyaves kid nabunatum; mo biyakous yakawanan manawen Dayan. Bo igak, peinan babaw yakids takululs-wan wamatan Dayan, min-Esiy yakids, o gimgilis vena babaw wadaban pwepway.”

²⁸Iliganes, mo ikavikuns avakaein, iwkuwaks, ilansa, “Min-Epesos yakids dayowbads Dayan, manawen singay natawtoun.”

²⁹Wankuyeim gamaga babaw ven townen waseg mo isilamaws wak, makava ikawnaweins, mamagina takabalaweins tasiyas. Wankuyeim babaw gamag mo isawls, iyousis min-Masidoniy tasiyas Gayus son Alistak, mo ibiteilis inawes buntuman kaleiwag waseg. Kweiboug tasiyas sisiy Pawl nimeis wakad.

³⁰Pawl sivinan beisiw bein buntuman kaleiwag wanuwān, tage tayakelesiys bo isilbwades.

³¹Tasiyas guyawun Esiy mwasanin, kweiboug-o nisiwayoubs waseg Pawl, tasiyas mo ikayabes sigamag vagan kid bidibakes Pawl, ilansa, “Awoum yakoum bukun buntuman kaleiwag wanuwān; awoum!”

³²Gamag babaw, asilivan kweitan kweitan iwkuwaks, ta-kal biligen; o babaw gamag nag ikakins aveiyag wawun ikatuyouns nimeis, iwkuwaksa mav.

³³Min-Yudiy mo idibakes Alekisan, ilansa, “Kulivan vagan babaw gamag bikakins yakamey ta-ivag silawun sinap townen;” gamag babaw mo iyabinis townen Alekisan, in wantes gamag babaw, itamnow naman vagan bikapays, mo bilivan.

³⁴Gamaga babaw ikakins gum-Yudiy townen, mo iwaks, ages ikobobtwan, akweiy veit waseg iwkuwaks, ilansa, “Min-Epesos yakids daguyaws Dayan, manawen singay natawtoun.”

³⁵Tanuwagan ven isap, mo ikatitun sikawnawein, ilana, “Min-Epesos yakamiy, vena babaw gimgilis ikakinsa davanuys bulagan peinan yakids tamtakavateins nabunatum dayowbads avakaein Dayan, sona nadakul nises, kweiboug-o meinoy neim libalab nikalivatow neim watinow.

³⁶“Peinan youd tasiyas mounid, nag kadilok teitan gamag bisen kweitan livan, nag. E, kadilokena kukwapays kusesus, peinan nag aveiyag bivag, nag. Awoum kuwkuwaks, o kwawnaweinsa mav, awoum.

³⁷“Gamag tasiyas nukumeyes nag ineis iveinaws Dayan wanbunatum; nag ivtokes livan dayowbads manawen, nag.

³⁸“Magat Dimitil sivinan biyatel teitan gamag, o magat takatanaks yakamiy simiy Dimitil sivnamiy bukuyateles teitan gamag, yatā nises, o gabman nisesus; kadiloka bukuyateles simiy, gabman mo bikaleiwags.

³⁹“Kukin bikabwag sikaleiwag tasiyas gabmans, igaw tutan gamag babaw bikatuyouns bimeis, mo babawa gamag bikaleiwags sinap townen silmanin.

⁴⁰“Nag ivag silawun sinap townen nagein kwawnaweinsa mav. Magat daguyaws avakaein biligen, mo bikatiganeids, nag kweitan livan nises

waseg yākids vāgan bitakatimapus anilivan; moumouvit mo bitalivatus. Kadiloka kunounas kuneis wamibunatum tatineimiy.” Iliganes, mo inounas, ineis wasibunatum. ⁴¹(-)

Pawl in Masidoni y mo inoun in Gilis

20 ¹Bo iyakousis asisinap to nikawnaweins mav; nag ivag kweitan kawnewein, nag ivag kweitan tamwāgeg, nag. Bo ikous. Pawl mo idawes ven townen tayakelesiys-nen, iguyes tasiyas, imulouls siney, mo inoun in Masidoni y.

²Itāvin ven tasiyas Masidoni y wawnuwan; anilivan babaw igeiguy wasigeis, mo inoun in Gilis.

³⁻⁴I sesuna ee... kweitoun tibukon, min-Yudiy mo asisinap ikatilawos sivines kid beiweis Pawl. Misiyamun townen Pawl nanon ivag bo beikuk bein Siliy; mo iligen livānen asisinap kalbaleb, mapuna ikanavin nanon, mo inounas wāked, ikanapels Masidoni y, siney gum-Beloy teitan, Pilos natun yagan Sopedal, sisiy min-Tesalonik asteiy, Alisitak son Sikanid; sisiyas gum-Dābiy yagan Gayus son Timotiy, sisiyas min-Esiy tasiyas Tikikos son Tilopim.

⁵Tasiyas imgwayemas, mo ikaymatemas ven Tilowas waseg.

⁶Ikous sagal to nag bitakams bled son yist, mo kātouw ven Pilipay waseg, kākuk ee... yam kweinim ikous mo kālug Tilowas, mo kanekes tasiyas; kases simayas katanok wik.

Pawl itanouy min-Tilowas wasigeis

⁷Wik kweitan nakabsilamaw, Sābat waseg, kakatuyoun nakam, vāgan bakakiv bled bakākam, māwan Yeisuw nakaleiwag. Pawl mo iguyes tasiyas; o peinan bo binoun nubweig, singay iveiyov anilivan wasigeis tasiyas.

⁸Mabunatum wanakaew, o imalamp babaw wabunatum townen.

⁹Watapwan boug, Pawl igawa illivan; tawlat teitan yagan Yutikos isin wasintāboul, matan inanup; o Pawl igawa illivan, taw townen imasis kangagay, mo ikalouw bunatum kastounun waseg, in watinow. Gamag ineis watinow, ikines imasis, inupes bo imat.

¹⁰Pawl ibus, ibasin kitatun, mo iwliboub wāwon taw townen, ilivan, idibakes gamag, ilana, “Awoum bigeg ninoumiy; mwamovan nises.”

¹¹⁻¹²Pawl imwen in wanakaew, sinsiney mo ikivis bled ikams, illivans ee... walalayis mo inoun in. Gwad townen itokes inawes wanbunatum, imwāsaws seikwan, peinan sona mwamovan.

Ikuks ineis Milit

¹³Yakamey nakan nakātouw wāwag, nakākuk silmanin Asos vāgan bakakayamat Pawl ven townen waseg; townen gog sivinan kid beinoy wāked, o nidibakem māwan.

¹⁴E, imekem Asos waseg, simey towen nakakuk nakan Mitilin.

¹⁵Neiyam nen mo kakuk kan Kiyos walasin; neiyam nen mo kasap Samos; neiyam nen mo kalug Milit.

¹⁶Nakakalipouy Epesos peinan nanon Pawl bo mawan; nag ivag sivinan yam babaw bisesuna Esiy, ikatimamal nuwanaw kid bisap Yelusalem, silmanin Kaltuwon anayam mo bilouvat Yelusalem waseg.

Pawl iguyes tayakelesiys situwaweaks Epesos

¹⁷Ven Milit waseg Pawl idawes min-Epesos tayakelesiys situwaweaks bimeis.

¹⁸Isaps mo idibakes mamagina, “Kukwakinsa agusinap tuta babaw nases wasigeis yakamiy. Wanmugwana asap Esiy waseg nukukineigs ee... bweilima babaw agusinap bo mawan-wan.

¹⁹“Nawwotet daGuyaws nawotet, ta-akaypom sinap; tut babaw nanoug igeg, navvalam-wan, o min-Yudiy tut babaw biyagageigs kid, abag nivages singaya igeg.

²⁰“Nag akayus agulivan wasigeis yakamiy, nag. Ivag sivinag balabeimiy; babaw bo asekeimiy, bo akatimlakeimiy buntuman tapwaloul waseg o wamibunatum-vak tatineimiy.

²¹“O min-Yudiy bo adibakeimiy, o mina-Gilis bo adibakeimiy, alana, ‘Kadiloka bikanavin ninoumiy, bukunekes Yowbad, o bukusimounids daGuyaws Yeisuw waseg.’

²²⁻²³“Tut gog towen Yowbad Kululuwan bo isimkineig ban kid Yelusalem. Nag akakin aveiyag balouvat ven towen waseg; deisa vena babaw wasigeis Kululuwan Town Bwanabwein ikatimlakeig abag bo bigeg, o bisenags wadeil ven to Yelusalem waseg.’

²⁴“O peinan daGuyaws Yeisuw nawotet bo isekeig gunawotet towen, akokew kid liwanen nasiwayoub Yowbad, bassekes kid gamag babaw wasigeis; o nag akayus mwamovag tatoneig; deisa bayakous Yeisuw nawotet towen.

²⁵“Kweiboug-o nageiguy aguyeimiy liwanen Yowbad nakaleiwag; o nagein gog kamnat akakin-wan nag vayuwein bayum bam bukukines magig, nag.

²⁶⁻²⁷“Nagein adibakeimiy moundid bo asekeimiy Yowbad anilivan vagan biymoveimiy; nag kweitan akayus, nag akawum, nag. Kukin kavel yak bukupiyeve, mo bukukwanig; takaleiwag yakoum.

²⁸“Kuvnaseimiy yakamiy, o kuvnases Yowbad nagamags, Kululuwan Town Bwanabwein nisekeimiy miwotet vagan kid bukumtakavates tasiyas; kadiloka kumtakavates Yowbad alen mamagina tayakelesiys tasiyas, peinan bo iyamayises tasiyas buyavin tonen waseg.

²⁹“Yey bo banoun; akakin-wan takalbalebs mwasanin igaw mo biweis wasigeis yakamiy; biyagages tayakelesiys; o tasiyas magina awuk

bulawud, bikapasal nuwes bikananeiy; o tayakelesiys magina sip, mamagina awuk bulawud bigades, bikatimates.

³⁰“Akakin mwasanin gamag yakamiy igaw bukutamanaws, bukwatidavis tayakelesiys mwasanin, vāgan kid bikabkunimiy yakamiy.

³¹“Kadiloka kuvnāseimiy. Kununuways-wan kweitoun bweilim nases wasigeis yakamiy, adibakeimiy, aguyeimiy katanok katanok yakamiy; iwtawout mitinagig, yam katanok katanok waseg, o boug katanok katanok waseg.

³²“Tut towen nagein kadilok Yowbad bimtakavateimiy, kadiloka kuliganes livānen nasiwayoub wasigeis yakamiy, mo bikatimweis kululuwamiy, bikayuseimiy simiyas yakamey, angamag tonen babaw yākids.

³³“Kweiboug simiy yey nitasesus, nag apwākit soug namoney o anakweim o nawliyoug; nag.

³⁴“Kukwakinsa wanamag tatoneig nawtel silmanin kag o gunavavag, o bo awotet vāgan bagimwel sigwey sivavag o kaeis tatineis.

³⁵“Agusinap towen waseg, bo akatimlakeimiy vāgan kid bukukwakins bweina bitawotets māwan, vāgan bitalabes sidayas tasiyas tougweys. Kadiloka kid taninuways daGuyaws Yeisuw anilivan mamagina, ‘Soum bisiwyoubum mo bukumwāsaw; tage bukusiwyoub soum bukumwāsaw singay avakaein.’ ”

³⁶Illivan ikous, mo ikululs siney tasiyas, initoug Yowbad waseg.

³⁷⁻³⁸Ikous, mo ivālams asibabaw-wan, iwliboubs Pawl wāwon, imulouls sisiy. Ivālams avakaein peinan anilivan Pawl mamagina, “Nag yamtan yam bukukines magig, nag.”

Igawa ivvālams mo sisiy Pawl ineis wāwag.

Pawl ikuk silmanin Yelusalem

21 ¹Pawl itouw wāwag, mo itanouy sineyas wasigeis. Yakamey katanouy, ikous, kākuk, kadumwala Kos. Neiyam nen, mo kan Lods; kakilev Lods mo kan Patal.

²Ven Patal waseg mo kaban wag akitan, kakita bikilev silmanin Pinisiy, mapuna katouw mo kākuk.

³Kākuk kasisawl ee... mo kaban ven Saypilos, inoy wamakimaw, kasawl mo kan Siliy, kālug ven yagan Tayil vāgan wuliyoub babaw wāwag beibus bein wanakaew.

⁴Kanineiv tayakelesiys, kaban mwasanin, mo kasesuna simayas tasiyas katanok wik; o peinan Yowbad Kululuwan ikatimlakes, ikakins-wan igaw min-Yelusalem biyagages kid Pawl, mapuna illivans, “Awoum kun Yelusalem.”

⁵⁻⁶Bo ikous matut simayas tasiyas mo katamanaw kanoun. O simayas tasiyas, sisiyas sikwavas o nitsiyas, nakan watoulan ven, kabasin kititum

wakawalaw kanitoug Yowbad waseg, mo kamuloul simsimeyas tasiyas, katouw wawag, mo katanouy; tasiyas mo iyums ineis wasiven.

⁷Kakilev Tayil kasisawl ee... mo kalug Pitolimey, kanekes tayakelesiys, kamuloul simayas tasiyas, kases-vak wasibunatum katanok yam.

⁸Neiyam nen nakatanouy nakaw Sisaliy, mo kasiw Pilip wanbunatum, anwbawwal yakamey. Mtowen Pilip nawotet igeiguy-wan livan bwawabwein, livanen Yeisuw. Kweiboug-o takaweins livanen Yeisuw nisekes siwotet town soney tawaw teinim tatanok, ven Yelusalem waseg.

⁹Nitun nakubukwabs nanim nay; Yowbad nisekes asisinap, mo ilivnakes Yowbad anilivan.

¹⁰⁻¹¹Kasesun ee... bo imwemway-nen, teitan palopit meinoy neim Yudiy; mtowen yagan Agabous, imekem mo ikow Pawl anpalit iyawen naman o kaken tatonen; ilana, “Yowbad Kululuwan ilivan mawana: Ven Yelusalem waseg min-Yudiy biyawanis naman o kaken tanuwagan palit town, bisilkodes vagan kid tobwag ven gimgilis mo biyagages.”

¹²Kaligen anilivan mawan; simayas tasiyas misikena gimgilis ven town; yakamey mo kadibek Pawl; kalana, “Awoum kun Yelusalem; bweina kuses.”

¹³Pawl mo ikatimop agem, ilana, “Awoum kuvalams; mawan bo bigeg nanoug. Nanoug bo atam vagan kid tasiyas biyagageigs, daGuyaws Yeisuw peinan. Bweina biyousigs; bweina bikatimateigs; bwein-wan.”

¹⁴Tage Pawl nag biligen amalivan, mapuna kasesun-wan, kalana, “Magat Yowbad nanon mawan, bweina bivag.”

¹⁵⁻¹⁶Ikous, mo kakatunag bakan Yelusalem, simayas tasiyas min-Sisaliy tayakelesiys mwasinis. Tasiyas imgwayemas nakan Mineson wanbunatum, kamasis. Mtowen gum-Saypilos, wanmugwana niligen livanen Yeisuw.

Pawl ilakwen Yemes

¹⁷Nakasap Yelusalem, tayakelesiys mo ikinemas, singaya imwasaws pinem.

¹⁸Neiyam nen simey Pawl mo kanekes Yemes soney tayakelesiys situwaweiksa babaw.

¹⁹Pawl imulouls soney tasiyas ikous, mo ikamtel youd katanok katanok Yowbad niwtel tobwag ven gimgilis wasigeis, peinan Yowbad son Pawl niwteles wotet town.

²⁰Iliganes iyakawns Yowbad waseg, mo idibakes Pawl; ilansa, “Gwade, adok kukwakin min-Yudiy singay babaw tawsans bo niliganes livanen Yeisuw; tasiyas babaw-wan ivnases bwein Moses nakaleiwag waseg.

²¹“Bo niliganes livaneim mamagina, ‘Town Pawl ipiyev Moses nakaleiwag, o ikatimlakes min-Yudiy vena babaw wadaban pwepway, vagan nag bibwabwes momwes nitsiyas, o bipiayes kid adsinaps kweiboug Moses nisekeids.’

22 “Amawan bitavkek? Peinan bo biliganes livaneim yak, mwana nukum Yelusalem waseg.

23-24 “Adok kuvag mawan. Tawaw tayakelesiys simayas teivas nisesus; peinan asilivan waseg Yowbad, kakita bo biduyes kunus mo bisiwayoubs Yowbad waseg, mawan Moses nakaleiwag. Kadiloka kunekes simwey tasiyas, kuwidis woumiy, money kusekes vagan beiluns beibwein Yowbad waseg, mo biduyes kunus tasiyas. Gamag babaw bikineimiy simwey tasiyas, mo bikakins livaneim to niliganes kweiboug iyyaweids-wan, peinan nukutam Moses nakaleiwag waseg, o kuvnas nakaleiwag towen.

25 “Makaleiwag wasigeis tobwag ven gimgilis, kalisiy isimounids waseg Yeisuw, nakalel silet nein wasigeis tasiyas, nakakaleiwag vagan kid bipiyaves kan ningwavis silmanin tobwag yowbad, o buyav, o viniyonan man bo niskwen kayon neimat nanawan; o nag bikanavays mav.”

26 Pawl iligen, itam. Neyyam nen itokes gamag tasiyas, iwidis wous, mo isiw Yowbad wanbunatum, Pawl mo idibek tanuwagan lun; ilana, “Yakamey amalivan Yowbad waseg; yam tasiyas beikous bakaduy kunum, bo bakalun Yowbad waseg, mawan Moses nakaleiwag.”

Iyousis Pawl Yowbad wanbunatum

27-28 Asiwik kakita beikous, Pawl sen tawaw tasiyas nisesus Yowbad wanbunatum; min-Yudiy siven Esiy waseg mo ikines, ikabuts gamaga babaw, iyousis Pawl; iwkuwaks; ilansa, “Tawaw, min-Yisleil yakamiy kulabemas. Taw towen tuta babaw ikatimlakes vena babaw gimgilis vagan kid bikasigumids yakids, o bikasigumis adsinaps, o Yowbad nabunatum towen. Tut gog towen bo imeyes mina-Gilis, isiws wanuwan Yowbad nabunatum bunawen nikayus silmanin min-Yudiy yakids. Bo igak!”

29 Ilivans mawan peinan kweiboug nikines gum-Epesos towen Tilopim son Pawl nisesus waven; idokes kid Pawl itok taw towen ineis Yowbad wanbunatum.

30 Ven towen gimgilis asibabaw-wan mo isaps, isisawls, ikatuyouns imimeis, iyousis Pawl, ibiteilis Pawl, in watoulan Yowbad nabunatum, awkwedan mo ikatibagus.

31 Tasiyas iwaweis Pawl, sivines kid bikatimates. Mina-Lom sitakanaviy babaw nisesus Yelusalem. Teitan gamag mo inek takanaviys sitovek, ikow livanen asisinap tasiyas min-Yelusalem, peinan ikawnaweinsa mav.

32 Takanaviys sitovek mo idawes takanaviys sisiyas sitakalikays, nuwanaw isawls vagan binekes gamag tasiyasa babaw. Tasiyas ikines takanaviys sisiy sitovek bo nimeis, mo ipiyaves anwayway Pawl.

33 Takanaviy sitovek mo iyous Pawl, idibakes natakanaviys biyawanis kid Pawl naman palayun-wan sen waseg, mo ilana, “Kal mtowen? Aveiyag inuwerk?”

³⁴Gamag babaw mo iwkuwaks, livan kweitan kweitan illivans. Tamawan biligintun livanen taw townen; idibakes natakanaviys; ilana, “Kutokes taw townen, kumeyes; taneis wadabunatums.”

³⁵⁻³⁶Mo itokes Pawl, inawes wasibunatum. Ikapasal nuwes gamaga babaw ikabwākunsa watiblous, silmanin beiweiy kid, iwkuwaks ilansa, “Kuweiy! Kuweiy!” Ilivatus wātet, takanaviys tasiyas mo inupes Pawl, inounas, peinan gamaga babaw sivinesa biyousis.

Pawl iyatal

³⁷⁻³⁸Kakita beisiws wanuwān takanaviy sibunatum, Pawl mo idibek sitovek; aga-Gilis waseg ilivan; ilana, “Tab kadilok balivan waseg yak?” Sitovek ilana, “Kukwakin aga-Gilis, ne? Adok yakoum gum-Yidipt townen mwana nukumgwayes kweivas tawsan tawaw, tasiyas tawayins gamag, nukuneis wanawoud svinamiy kid bukwanaviys wasigeis Gabman Lom takanaviy yakamey.”

³⁹Pawl ilana, “Nag, yey gum-Yudiy, gunaven avakaein yagan Talisus wawnuwan ven avakaein Silisiy. Tab kadilok balivan gamaga babaw wasigeis?”

⁴⁰Takanaviy sitovek itam. Pawl iton tet townen wakunuwatan, itamnow naman, mo ikapays tababaws-wan; wankuyeim Pawl mo ilivan aga-Ibliw waseg, ilana:

22 ¹“Sigwey, timog budag yakamiy, kuliganes agulivan, mamagina akayan wasigeis yakamiy.”

²Tasiyas iliganes aga-Ibliw waseg illivan, mo ikikapays vāgan kid binganegs bwein. Mo ilivan.

³Ilana, “Yey gum-Yudiy yey. Inag nikopweig ven Talisus waseg, wawnuwan ven avakaein Silisiy; tage bo askul ven townen Yelusalem waseg. Tamwey townen yagan Gamaliyel ikatimlakeig, mo akakin dakaleiwags yakids, akakinbunik, iseiw nuwag Yowbad nawotet, māwana babaw yakamiy tut townen.

⁴“O gamag tasiyas inoyes kadetan ked, bo amop asisinap; mwasinis akatimates. Vinay o tawaw ayousis asenas wādeil.

⁵“Tanuwgwes lun sitovek avakaein, o tammwayas babaw ikakins agulivan townen mound. Peinan bo isekeigs let silmanin budidayas ven Damasik waseg, anounana waked silmanin Damasik vāgan bayousis gamag, bameyes Yelusalem, vāgan kid takaleiwags mo bimop asisinap.

Kweiboug Pawl ikanavin nanon

(Wotet 9:1-9; 26:12-18)

⁶Yanay waseg anoun kadiyakusa Damasik, mo mititeilin avakaein imekeig, māwana kavikawn meinoy neim walbalab.

⁷“Akalouw wapwepway aligen aygan teitan; ilana, ‘Soul, Soul, aveiyag wawun kuybilebeig yey?’

8 “Akatimop aygan, alana, ‘O guyaw, kavel yak?’ Ilana, ‘Yey gum-Nasalet Yeisuw, mtowen tut babaw nukuybileb.’

9 “Tasiyas sigwey nakan, bo ikines mititeilin, tage nag biliganes aygan towen, soug yey nakallivan.

10 “Wankuyeim mo alivan; alana, ‘O guyaw, aveiyag bavag?’ Guyaw towen mo idibakeig, ilana, ‘Kutamanaw kun Damasik, igaw teitan gamag mo bikatimlakeim muwotet, aveiyag bakaleiwag vagan bukuwutel.’

11 “Peinan mititeilin ikaligwen matag, ta-mawan bakin. Misinaka iyousis namag itokeigs, mo kan Damasik.

12 “Ven towen waseg taw yagan Ananiyas; min-Yudiy tasiyas misikes ven towen ikakinsa tadidumwal, peinan tavnasein Moses nakaleiwag towen.

13 “E, mtowen imekeig itamanaw itom mo ilivan; ilana, ‘Bwadag yakoum Soul, towen bukukin.’ Ilivan ikous mo akinbunik, akin taw towen Ananiyas.

14-16 “Mo ilivan, ilana, “Tammwayas siYowbad bo ikaliwageim vagan kid bukukwakin nanon, o bukukin tadidumwal towen, o bukuligen aygan tonen; o amsinap towen bisekeim kadiloka bukwapipel kusekes gamag babaw wasigeis. E, tut towen aveiyag kukwayamat? Kutamanaw, kutam mtowen waseg, mo babaptayseim, yagan tonen waseg, bo biwid mukwalbaleb, vagan beikous.’

Ikayeb Soul binekes kid tobwag ven gimgilis

17-18 “Ikous, nayum nam Yelusalem, akulul, annitoug Yowbad wanbunatum, matag mo isisawla mav, akin Guyaw towen idibakeig; ilana, ‘Nuwanaw kun kulisow Yelusalem, peinan min-Yelusalem bipiyaves amlivan, livaneig yey.’

19-20 “Yey alivan; alana, ‘O Guyaw, tasiyas ikakins sinagoga babaw wasigeis bo ayablebes taliganeins livaneim yak; mwasinis awaweis vatul waseg, mwasinis asenas wadeil. Kweiboug neiweis takanawein aygam mtowen Sitiben, yey bo atam wotet towen waseg, natamanaw akikin, bo amtakavet asikweim tawayins taw towen.’

21 “Guyaw towen mo idibakeig, ilana, ‘Kunoun, bakayabeim bukun kadiveiyov, silmanin tobwag ven gimgilis.’ ”

Pawl ilivans son takanaviys sitovek

22 Anilivan babaw iligintunis, tage iliganes livan towen “Tobwag ven gimgilis,” mo iwaks avakaen, ilansa, “Singaya takalbaleb towen; kuweis taw towen. Na-ikadilok son mwamovan bises.”

23 Iwkuwaksa, ilivelovs asikweim, musamusan pwepway ilivelovs ininein wanakaew, singay ikapasal nuwes.

24 Takanaviy sitovek mo ilivan; ilana, “Kutokes taw towen kunawes wanuwan bunatum, kuweis vatul waseg vagan bikamtel aveiyag anilivan waseg ikawkunes.”

²⁵Iyawanis won Pawl; ta-mawan bigogewn naman o kaken. Takalikay teitan itamanaw wadadan. Pawl mo idibek takalikay townen; ilana, “Nag kadilok bukwatimaveigs, guma-Lom yey. Kadiloka kuyateleigs, magat bukubanes agusinap kalbaleb, mo kuweigs.”

²⁶Takalikay iligen anilivan townen, inek natovek, idibek, ilana, “Aveiyag bukuvag? Taw townen guma-Lom teitan.”

²⁷Takanaviy sitovek mo inek Pawl, ikatigan, ilana, “Adok yakoum guma-Lom yakoum, ne?”

Pawl ilana, “Mawan.”

²⁸Takanaviys sitovek ilana, “Money avakaein bo asek, mo amlavag guma-Lom.”

Pawl ilana, “Peinan kweiboug-o tamag imlavag guma-Lom, mo inag nikopweig guma-Lom tatonen yey.”

²⁹Iliganes tasiyas, ikakiws wous peinan kakita bo beiweiy Pawl; sitovek-vak anpwayat seikwan, peinan guma-Lom townen bo iyawanis naman o kaken.

Pawl mo iyatal

³⁰Iyam nen gaboug mo ilikus vatul wawon Pawl, o peinan takanaviys sitovek sivinan bikakin wawun min-Yudiy sikavikun waseg Pawl, mo idibakes bimeis tasiyas tanuwgwes lun situwaweiks sisiyasa takaleiwags babaw; teitan mo itok Pawl, imey, itamanaw wamtes tasiyas.

23 ¹Pawl ikinbunikes takaleiwags tasiyas, ilana, “Tuwag yakamiy, yam babaw nases agusinap bwein wamatan Yowbad, nagein gog bo mawan.”

²Tanuwgwes lun sitovek avakaein Ananiyas mo idibakes tasiyas nitamanaws wadadan Pawl, ilana, “Kuweiy wadon taw townen, singay kalbaleb anilivan.”

³Pawl mo idibek Ananiyas, ilana, “Yowbad bo beiweim yak, magina budakay kalbaleb yakoum, yalig isin, magin ibwein, tage bo ipwas, bukuyateleig Moses nakaleiwag waseg; tage bo kugulek nakaleiwag townen, peinan kudibakes tasiyas kid beiweigs mav.”

⁴Tasiyas itomos wadadan Pawl, ilansa, “Oo ne! Bo kuyeg Yowbad nagamag townen, ne?”

⁵Pawl ilana, “Nag bakakin mtowen tanuwagan lun sitovek avakaein. Akakin Bukitab livanen mamagina, ‘Awoum kuyeg mitovek.’ ”

⁶Pawl mo ikines tasiyas mwasanin Sadusiy, mwasanin Palisiy, aygan avakaein mo idibakes takaleiwags tasiyas, ilana, “Tuwag yakamiy, yey Palisiy yey, tamag gog Palisiy. Bo ayatal peinan bo anamis vagan bitakits vayuwein kanig waseg.”

⁷⁻⁸Iilivan mawan ikous, tasiyas Palisiy bo ikamnims sisiyas tasiyas Sadusiy; ilivis, ivages bod akweiy. Peinan tasiyas Sadusiy idokes gamag

nag beikits vayuwein; ta-kweitan anelos nises; ta-kweitan kululuwan nises; tasiyas gog Palisiy idokes gamag beikits vayuwein, o anelos nises, o kululuwads nises-vak.

⁹Tasiyas babaw-wan mo ikamnimans avakaein. Igawa ikamnimans takatimlakeins Palisiy sikaleiwag mwasanin mo itamanaws, ages avakaein, ilansa, “Kadok nag kweitan kalbaleb nises taw townen waseg; nag. Adok anelos teitan o kululuwan teitan bo ikatimlek ansinap.”

¹⁰Tasiyas babaw-wan singay ikavikuns; takanaviy sitovek idok kakita biyousis Pawl bikisalis kid won, mapuna idibakes natakanaviy biyousis Pawl, bikawes, binawes wasibunatum.

¹¹Boug townen waseg naGuyaw Yeisuw mo itamanaw wadadan Pawl, ilana, “Awoum beivag ampwayat. Mawan kweiboug livaneig nukusek ven Yelusalem waseg, igaw ven Lom waseg bo mawan.”

Min-Yudiy sivines beiweiy Pawl

¹²⁻¹³Iyam nen gaboug, min-Yudiy tabebaws-wan, sinawavas o sinawanim, mo ivtames sisiyas vagan beipos kid mo beiweiy Pawl. Ilansa, “Kalisiy yakamiy bukukwams o bukumoums, Yowbad bo beiweimiy. Igaw bitaweiy Pawl, mo bitakams.”

¹⁴⁻¹⁵Tasiyas mo inekes tanuwgwes lun situwaweiks sisiy takaliwageins ven, ilansa, “Yakamey amalivan Yowbad waseg, bo bakapos ee... tonena bakaweiy Pawl. O yakamiy kamnat amilivan kusekes takanaviys sitovek, kulivans mamagina, ‘Taw townen Pawl kutok kumey, sivinem bakaytel, kweitan sinap silmanin, vagan bakakinbunik.’ E, kukin takanaviys sitovek beitam, Pawl bimey, yakamey bakakayamat, tutan bo beim, mo bakaweiy.”

¹⁶Gwad teitan, Pawl kadan, bo iligen asilivan, mo in, isiw takanaviys wasibunatum, livan townen mo ikatipel isek Pawl.

¹⁷Pawl mo idow takalikay teitan, ilana, “Gwad townen sinap kweitan nisisiy. Kadiloka kutok, kuneis mutovek waseg, igaw kweitan livan mo bisek.”

¹⁸Itok gwad townen, inekes natovek, ilana, “Tasiwun deil townen Pawl bo idaweig, ilana, ‘Kutok gwad townen kuneikes mutovek waseg, anilivan mo bisek.’ ”

¹⁹Natovek mo itok gwad townen, asteiyuna ineis palatan, mo ilana, “Aw-youid bukunukweig?”

²⁰⁻²¹Ilana, “Tasiyas min-Yudiy ninous mawana, nubweig kid bivatams waseg yakoum vagan kid bukuyamanes townen Pawl kusekes takaleiwags tasiyas wasigeis, mamagina biyateles, bikatugwans waseg, vagan ansinap bikakins kid. Nag gog, peinan mwasanin ikayamats, sivines kid beiweiy. Awoum kutam. Tawaw tasiyas sinawavas o sinawanim tapsapos sivines beiweiy. Bo itabudabods Yowbad waseg bivages kid mawan. Bo ikatunags ikous, ikaymatesa ge amlivan yakoum.”

²²Takanaviys sitovek ilana, “Bwein-wan. Kadiloka kunoun. Bo talivan aditeiy bo deis; awoum bukudibakes simwayas; awoum!”

Ikayeb Pawl inek gabman avakaein Piliks

²³Takanaviys sitovek mo idawes takalikays asteiy bimeis, mo idibakes; ilana, “Kukin takanaviys lakatuy bikatunags bineis Sisaliy, sisiyas tasiyas sihos sam sinawanim sinawey, sisiyas takaweins kayal lakatuy. Igaw bidadub, kwayav, mo kuneis.

²⁴“Kuneves hos vāgan Pawl beimwen, kuvnāses beibwein, kunawes binek guyaw towen Piliks.”

²⁵Takanaviys sitovek ilel let silmanin Piliks, mamagina:

²⁶⁻²⁷“Kalin nuwag guntovek avakaein yākoum Piliks. Yey Kalodiw Lisiyas; gunalet beiw. Peinan min-Yudiy niyousis taw towen, kakita beiweisy; akakina guma-Lom towen, mapuna kakatinob sigwey guntakanaviys.

²⁸“O sivinag bakakin wawun askameiliw waseg taw towen, atok wasigeis tasiyas min-Yudiy takaleiwags vāgan kid biyateles.

²⁹“Tage nag ivag ansinap kalbaleb vāgan bikatimates o bises wādeil, nag. Misinaka ilivans, ‘Bo igulek makaleiwag min-Yudiy yakamey.’

³⁰“Wankuyeim, mo aligen asisinap ikatilawos idokes kid beiweisy taw towen, mapuna akayeb vāgan biwekeim yak; o min-Yudiy tasiyas bo adibakes, ‘Kunekes guyaw avakaein Piliks vāgan bukuyateles taw towen Pawl.’”

³¹Sitovek nakaleiwag bo māwan, takalikay tasiyas mo inawes Pawl, boug waseg, ineis Antipatil, imasis.

³²Iyam nen gaboug, tasiyas wakwakway inounas mo iyums wasiven; tasiyas tatouweins hos igaw binawes Pawl.

³³Inounas ee... Sisaliy, inekes guyaw towen avakaein, mo isekes Pawl son let.

³⁴Ivin let ikous, mo ikatigan Pawl, ilana, “Muven avakaein amiyagan?” Ilana, “Silisiy.”

³⁵Piliks mo ilana, “Ga bimeis tasiyas biyateleims, baligen amilivan, mo bakaleiwag.” Ikous, mo idibakes nagamag, ilana, “Kadilok kumtakavates taw towen wanuwan bunatum bunavakaein, kweiboug Elod nabunatum.”

Iyateles Pawl

24 ¹Yam kweinim ikous, iwloubus tanuwgwes lun sitovek avakaein Ananiyas son tallivan teitan yagan Telitul sisiyas tamumwey mwasanin. Inekes gabman avakaein, sivines kid biyateles Pawl.

²⁻³Idow Pawl beim; Pawl im; Telitul mo isilamaw anilivan, iyatel Pawl mamagina, “Kalin nuwem maguyaw avakaein yākoum, peinan mukwaleiwag bwein. Nag kweitan kawpwanaw nises wamaven. Bwein-

wan nakases. O mukwaleiwaga babaw nilabemas min-Yisleil yakamey. Mapuna tut babaw o vena babaw gimgilis yakamey ikalin nuwem maguyaw yəkoum.

4“Adok nag biveiyov agulivan, sivinag gog kusiwyoubum bukuligen kid amalivan kakit waseg yəkoum.

5“Taw towen kakakin singay takakon, ivages min-Yudiy vena babaw wasigeis vagan bikawpwanaws, peinan imgwayes tasiyas min-Nasalet nidokes, mo ivages moumouvit vena babaw wasigeis.

6“Taw towen idok biyageg Yowbad nabunatum, tage kasilbwed, nakayous. 7(-)

8“Igaw kukwatigan taw towen, mo bukukinbunik nakalbaleb towen nalivan.”

9Igaw Telitul ilivan, min-Yudiy tasiyas itimatams, ilansa, “E, mawan! Mounid.”

Pawl ilivan

10Guyaw towen Piliks mo ikin Pawl, itam vinum, mo Pawl ikatimop asilivan, ilana, “Peinan bweilim babaw nukusesun matovek yəkoum, bweina basekeim agulivan.

11“Yam sinawatan akweiy nein wankuyeim mwana asap Yelusalem vagan batapwaloul. Igaw kukwatugwans min-Yudiy wasigeis mo bilivans mawan.

12-13“Nag kal ikineig aliwon Yowbad wanbunatum, nag; nag alivan vagan gamag bikatuyouns biliganes aygag, nag. Nag ikatuyouns wasinagog; nag ikatuyouns waven, nag. Nag kakamniman soug teitan gamag, nag. Nag kadilok teitan bisimounid asilivan tasiyas mwana nilivans, nag.

14“Misinaka batam kweitan sinap waseg; makadewen ked atapwaloul maYowbad waseg, ked towen idokes ked kalbaleb, kid; isibawemas, mapuna idokem min-Nasalet yakamey. Tage yey asimounid maBukitab sinapun, Moses nakaleiwag babaw, o palopit tasiyas asilivan babaw-wan.

15“Sigwey min-Yudiy tasiyas kanmis Yowbad bivag, mo bitakits kanig waseg, tadidumwals o takalbalebs, yakidsa babaw.

16“Mapuna tut babaw sivinag agusinap bwein wamatan Yowbad, o gamaga babaw wamtes.

17“Bweilim babaw ikous, mwana nam wagonaven, gunmuloul asekes, o basiwayoub kid waseg Yowbad.

18“Bo awid woug, asiw Yowbad wanbunatum; sigwey nag ivag gamaga babaw, nag ikawnaweins, nag.

19“Wankuyeim mo isaps min-Yudiy mwasanin siven Esiy; o tut towen nag bimeis vagan bikamteles aveiyag agusinap kalbaleb.

20“O min-Yudiy tasiyas-nan nikineigs kweiboug naton takaleiwags wamtes, kadilok bikamteles aveiyag agusinap kalbaleb.

²¹ “Misinaka agusinap towen, sigwey tasiyas nakatamanaw mo awak, alana, ‘Silawun gunyatal nagein, peinan asimounid bitakits kanig waseg.’ ”

²² Towen gog Piliks bo ikabunik ked makadewen, Pawl nilivan; mtowen Piliks mo ilana, “Ga-ises, ga-beim takanaviys sitovek towen Lisiyas, mo bakaleiwag.”

²³ Mo idibek natakalikay, ilana, “Bweina biyeiwas wadeil, mtowen Pawl; o taliven bweina bimeyes kan vagan bikamkwam.”

Pawl nises wadeil

²⁴ Yam mwasanin ikous, mo isaps Piliks son nakwav Dilusil, manawen vinen-Yudiy; mo idawes Pawl beim vagan bikatilitutegs livanen Yeisuw Kelis, livan towen Pawl nisimounid waseg.

²⁵ Pawl mo idibakes livanen sinap didumwal, o livanen kapatul, o livanen Yowbad nakaleiwag igaw mo bikatukin vena babaw wasigeis. Pawl igawa illivan, Piliks gog mo ivag anpwayat, ilana, “Ga-ises. Tut towen kunoun. Igaw kweitan tut bwein waseg, mo badaweim bukuyum bukum, amlivan bukusekeig.”

²⁶ Bo inimis Pawl bisiwayoub waseg; mapuna kutukuta ididow, illivans son; ininamis gog nag, peinan Pawl ta-isek Piliks namoney vagan bilik Pawl, nag.

²⁷ Akweiy bweilim ikous Piliks atimapun neim, yagan Posiw Pestos. Tage Piliks sivinan bilabes min-Yudiy, mapuna ikaleiwag vagan Pawl bisesuna wadeil.

Pawl sivinan Sisal bikaleiwag

25 ¹ Pestos isilamaw nakaleiwag, isesuna ven Sisaliy kweitoun yam, mo in Yelusalem.

²⁻³ Tanuwgwes lun situwawek sisiyas min-Yudiy tamumwey mo inekes Pestos, ilansa, “Takalbaleb towen Pawl nises wadeil Sisaliy. Tabta ikadilok bukukwayeb towen beim wamaven Yelusalem vagan gog bakaytel?” Sivines kid bikayamats wadadan ked. Igaw beim Pawl mo beiweiyis.

⁴⁻⁵ Pestos ilana, “Nag. Bweina bises Sisaliy. Igaw kakit mo bayum ban Sisaliy. O sigwey guyawaw mwasanin yakamiy bitaneis Sisaliy, inayatal silmanin; magat nakalbaleb nises, kadiloka guyawaw tasiyas biyateles.”

⁶ Ises Yelusalem nag bibabaw yam, adok kwein-in-kweitoun o sinawatan, mo iwloubus in Sisaliy, imasis. Iyam nen gaboug mo isin wakaban idibakes nagamag wasigeis vagan kid Pawl bimeyes.

⁷ Pawl imeyes, wankuyeim mo isunaps min-Yudiy tasiyas meinoy nimeis Yelusalem, itowas mo iyateles, ikavtagis Pawl ansinap babaw-wan kalbaleb nivvag kid; tage asilivan nag bikamnat, mapuna takaleiwag nag isimounid asilivan waseg.

⁸ Pawl ikatimop asilivan, ilana, “Nag agulek min-Yudiy makaleiwag, nag. Nag ayageg Yowbad nabunatum, nag. Nag agulek Sisal nakaleiwag; nag.”

⁹ Togo Pestos sivinan bisiwayoub min-Yudiy wasigeis; mo idibek Pawl, ilana, “Tab kadilok bukun Yelusalem mo bakaleiwag amsinap ven towen waseg?”

¹⁰ Pawl ilana, “Tut towen bo atamanaw Sisal wanakabkaleiwag. Kaleiwag kadilok towen-an waseg. Nag ayablebes min-Yudiy. Kukwakin agulivan towen mound. Na-ikadilok tasiyas bikaleiwags waseg yey.

¹¹ “Magat agusinap singaya kalbaleb, māwan asilivan tasiyas, mogo bweina bakanig; nag bakakiws; nag. O peinan tasiyas tayateleigs iyyaweids-wan, na-ikadilok bukutameig vāgan kid tasiyas bikatimateigs, nag. Kadiloka Sisal tonen bikaleiwag.”

¹² Pestos iligen anilivan towen, mo ineis palatan sen nagamag tassinaps mwasanin, sinsineyas illivans. Ikous, Pestos iyum, im, ilivan; ilana, “Sivnam bukunek Sisal vāgan kid bikalawageim; mapuna bo bakayabeim bukunek mtowen Sisal.”

Agalip son Belinis ikatiliganes anilivan Pawl

¹³ Tut nag biveiyov wankuyeim King towen Agalip son nakwav Belinis mo imeis Sisaliy vāgan kid bimulouls sisiy towen Pestos.

¹⁴ Yam babaw nisesus sisiy Pestos anbwabwal tasiyas. Livanen Pawl mo isek King towen, ilana, “Tutan Piliks inoun yey mo asap, teitan taw nises wadeil.

¹⁵ “Wankuyeim an Yelusalem, tanuwgwes lun situwāveks sisiyas tamumwey, ven towen Yudiy waseg, mo idibakeigs; ilansa, ‘Taw towen takalbaleb; kadiloka bukumop ansinap kalbaleb.’

¹⁶ “Akatimop asilivan, alana, ‘Yakamey mina-Lom, nag ivag amasinap māwan. Kadiloka kuyateles taw towen wamatan, o towen biyamen amilivan; kukin ansinap kalbaleb nises, mo bakamop; kukin gog nag, bo nag.’

¹⁷ “Wankuyeim imeis tasiyas, nag akabiyun, nag. Neiyam nen mo asin wakabag vāgan kid bakaleiwag, adibakes gungamag bimeyes taw towen.

¹⁸⁻¹⁹ “Adok ansinap kalbaleb; nag gog, tasiyas itamanaws iyateles, nag ikavtagis ansinap kalbaleb; misinaka livanen sitapwāloulatatineis, o livanen teitan taw yagan Yeisuw nikanig, o Pawl ilivan namwamov igawa nises.

²⁰ “O yey nag bakakin amāwan bakaleiwag sinap towen waseg, akatugwan taw towen waseg, alana, ‘Tab kadilok bukun Yelusalem mo bakaleiwag sinap towen waseg?’

²¹ “Towen gog ilana, ‘Nag. Sivinag datoveks avakaein bikaleiwag.’ Mapuna akaleiwag alana, ‘Ga-bises wadeil mo banineiv amata ked waseg baban, mo bakayeb binek datoveks towen Sisal.’ ”

²²Agalip mo idibek Pestos, ilana, “Sivinag baligen taw townen anilivan.”
Pestos ilana, “Bwein. Nubweig mo bukukin.”

²³Iyam nen g̃aboug Agalip son Belinis mo ineis wabuntuman liwon, sisiyas takanaviys situwaweiks o guyawuns ven townen, asikweim maynamnabwein nisikams, askatubub singaya bwanabwein nivages. Pestos mo idawes nagamag bimeyes Pawl, mo imeyes, itamanaw wamtes.

²⁴Pestos mo ilivan; ilana, “Agalip, making ẏakoum, o tawaw babaw yakamiy wabunatum townen, kukines gamag townen. Min-Yudiy, Yelusalem waseg o ven townen waseg, intougigs v̇agan bamop ansinap, niwkuwaks, ilansa, ‘Kuweiy. Nag kadilok son mwamovan bises.’

²⁵“Bo akatiligen asilivan, akatugwan waseg, akakin nag ivag ansinap kalbaleb. Na-ikadilok ḃaweiy taw townen. O townen nilivan, ‘Sivinag guntovek avakaein bikaleiwag’; mapun bakayeb binek Sisal.

²⁶“Kukin bakayeb, nago akakin ansinap, aveiyag balel ẇalet. Mapuna bo amey taw townen wamitamiy, ẏakoum making Agalip simwey guyawaw tababaws, v̇agan kid bukunganegs anilivan; adok bitabanes ansinap kweitan, mo balel ẇalet, v̇agan Sisal bikaleiwag.

²⁷“Adok na-ikadilok makava bakayeb, nag.”

Pawl ilivan wamatan Agalip

26 ¹Agalip mo idibek Pawl, ilana, “Kadiloka kulivan.” Pawl itamnow naman, ilivan mamagina:

²Ilana, “Peinan min-Yudiy niyateleigs, ilivans kid agusinap kalbaleb, o tut nagein ikalin nuwag peinan ẏakoum bo kuligen agulivan, matovek avakaein ẏakoum.

³“Peinan kukwakin amasinap, min-Yudiy yakamey, o kukwakin silawun makamnimana babaw, sivinag kwaptuleim bukuligen agulivan.

⁴⁻⁵“Min-Yudiy babaw ikakins agusinap. Ikakins igaw-o wagwadig gungamag wasigeis, o ven Yelusalem waseg, gum-Yudiy yey; o tut kadiveiyov ikakins agusinap, Palisiy teitan yey. O yakamey Palisiy singaya kavnas min-Yudiy makaleiwag babaw. Kukin tasiyas sivines, mo beitams waseg agulivan townen; peinan mound.

⁶“Nagein tasiwun deil yey, o tasiyas bo iyateleigs peinan animis Yowbad bivag ṁawan anilivan wasigeis tamumwey min-Yudiy yakamey.

⁷“O yakamey, amakum sinawatan akweiy, meiveka yakamey kasimkakin yam babaw o boug babaw kakanow aygan Yowbad, kadoki bisekem ṁawan anilivan. O yey anmis sinap townen, igaw kanig waseg bitakits vayuwein, mapun min-Yudiy tasiyas bo iyateleigs.

⁸“O guyaw, aveiyag wawun isunasun ninoumiy livan townen, ‘Takanigs beikits vayuwein.’

⁹“O kweiboug ivag sivinag basilbwed nawotet gum-Nasalet mtowen Yeisuw.

10 “Yelusalem waseg navvag mawan. Tanuwgwes lun situwaweaks nisekeigs gunakaleiwag vagan bayousis tayakelesiys basenas kid wadeil; o igawa niyyatals yey bo atam vagan bakakatimates.

11 “O sinagog babaw wasigeis bo amop asisinap tasiyas, adok kid mo bipiyaves siguyaw towen Yeisuw. Singay kapasal nuwag, aneves tayakelesiys vagan bamop asisinap kadiveiyov ven wasigeis.

Pawl ilana, “Bo ikanavin nanoug”

(Wotet 9:1-19; 22:6-16)

12 “Misumkwey towen tanuwgwes lun situwawek bo itams gunawotet towen waseg, ilansa, ‘Bweina bukun Damasik bukuyousis tayakelesiys tasiyas-one.’

13 “Igawa waked, yanay waseg, bo akin kamnat singay avakaein meinoy neim walbalab. Kalas mititeilin kalamwey-nen, tage towen mititeilin singay avakaein; imteilm yakamey sigwey tasiyas nakaninoun.

14 “Kakalouw wapwepway, kamasis, mo aligen teitan aga-Ibliw waseg idibakeig; ilana, ‘Soul, Soul, aveiyag wawun kuygagageig? Tut babaw kwatipiyow kayal toneima ibasim avakaein.’

15-16 “Yey alana, ‘O guyaw, kavel yak?’

Ilana, ‘Yey Yeisuw, mtowen tuta babaw nukuyageg. Tut gog towen kutamanaw kutom. Bo amekem, vagan kid basekem muwotet. Kadiloka kwanow aygag, kusekes gamaga babaw livaneig yey peinan nukukineig nagein; o igaw tut wanakougwaw sinap mo bakamtel waseg yakoum, kadiloka bukusekes-vak livaneig mawan.

17 “ ‘Bakayabeim bukun tobwag ven gimgilis wasigeis. Igaw tasiyas beivag sivines biyagageims yakoum, sisiyas mugwamag min-Yudiy mwasinis; yey mo bakatinabweim yakoum.

18 “ ‘O vena babaw gimgilis wasigeis, yakoum bukuvag beilal mites, vagan kid bipiyaves sinap dadub, kamnat biyousis; o bipiyaves Seitan nakaleiwag, mo binekes Yowbad, vagan kid biwid asisinap kalbaleb. E, tasiyas dadub mo binekes tasiyas tasimounids waseg yey, peinan akayuseimiy simiyas tasiyas, asekeimiy amisinap kweivaw, bwanabwein.’

Pawl nawotet livanen

19 “O King yakoum, peinan Yeisuw meinoy neim walbalab nidibakeig mawan, ta-mawan bapiyev aygan.

20 “Bo naguyes min-Damasik, wankuyeim min-Yelusalem, o vena babaw wawnuwan Yudiy, mo tobwag ven kadiveiyov wasigeis; adibakes, ‘Kadilok bikanavin ninoumiy, vagan kid bukunekes Yowbad. Awoum ninoumiy bikanavin makaw; kadilok sinap bwein kuwteles.’

21 “Peinan gunawotet towen nawtel, min-Yudiy mo iyousigs Yowbad wanbunatum, sivines kid beiweigs.

22 “Yam babaw Yowbad nilabeig, nagein gog bo mawan; ililabeig vagan kid baguyes gamaga babaw, takinew toul, o takinew guyaw; gamaga babaw wasigeis agulivan katanok-wan; mawan tasiyas palopits sisiy Moses nilivnakes, mawana yey agulivan; nag kid kweitan livan balivan; nag.

23 “Mawan tasiyas kweiboug, yey alana, ‘Kadilok aban Kelis bigeg, bikanig, o kanig waseg mtowen biginikit, mo anilivan bwanabwein bimteilis nagamag min-Yudiy, wankuyeim vena babaw.’ ”

Pawl igeiguy King Agalip waseg

24 Igawa Pawl illivan mawan, Pestos mo ilivan; aygan avakaenin, ilana, “O Pawl, takabalawein yakoum; peinan buk babaw kuvnivin mo kukwabalawein.”

25 Pawl ilana, “Nag akabalawein. Guntovek yakoum kukineig nanoug idumwal, agulivan mound-wan.

26 “King Agalip ikakina sinap towen, mapun nag ivag agumwasin, peinan nag itagouwaw sinap towen waseg; peinan bo ikamat wavtakon ven. 27 O King yakoum, tabta kusimounid tasiyas palopit asilivan? Akakina kusimounid-wan.”

28 King Agalip mo ilivan, ilana, “Kudokeig yey kakita bamlavag Kelis nagamag, ne?”

29 Pawl ilana, “Igaw tut kadiveiyov o tut kayakus, yakamiy babaw bukumlavags Kelis nagamag yakamiy, bo bwein. Yowbad ikakin nanoug bo mawan. Sivinag nagein bukumlavags mawana yey, yakoum making yakoum, simwey gamag tasiyas babaw niliganes aygag. O nag sivinag bukusiws wadeil; sivinag bukumlavags Kelis nagamag yakamiy, mawan yey.”

30-31 King towen mo itamanaws siney Piliks o manawen Belinis, sisiyas tasiyas nisinis bunatum towen, mo isaps. Sisiyas mo illivans, ilansa, “Taw towen nag ivag ansinap kalbaleb; nag kadilok bisesuna wadeil; nag kadilok min-Yudiy beiweiyis, nag.”

32 Agalip mo idibek Pestos; ilana, “Magat gamag towen nag sivanan Sisal bikaluweg; bweina bitakaluweg vagan bisap bein bininoun wamnat.”

Ikuks silmanin Lom

27 1 Ikaleiwags kid bikayabem, bakaakuk, bakan Italiy, isekes takalikay nawotet vagan bikaymates Pawl siney tasiwuns deil mwasanin. Takalikay towen yagan Yuliyas. Natakanaviys nisesus. Meivek-wan tasiyas Ogoustos inabod.

2 Katouw wag kaytan, meinoy neim Adilamiteim bein ven wunsiyas Esiy wakawalaw; simey kakuk Alistak, gum-Masidoniyy teitan, naven Tesalonik.

³Neiyam nen mo k̄alug Sidon. Peinan takalikay towen isiwayoub, itam waseg Pawl v̄agan kid binek taliven nisesus ven towen, bimasis, asbwabwal towen.

⁴Neiyam nen mo k̄akuk Sidon, kasawl. Peinan yag kalbaleb k̄anoy wangwanan sim towen Saypilos.

⁵Wankuyeim k̄akuk kadoupouy awasas avakaein walasin ven yagan Silisiy o Pampiliy, mo k̄alug Mayl, wawnuwan ven avakaein Lisiy.

⁶Ven Mayl waseg matakalikay iban min-Aleksanidel siwag akitan, mo k̄atow wag akiwen waseg, peinan kid bein It̄aliy.

⁷Singaya youviy to nakakuk; peinan yag meinoy neim wamitem; yam babaw ikous, mo k̄alug Nidas. Igaw yag nitotow wamitem, mapuna kayawatein kan wangwanan sim yagan Kilit waseg, kan kadounip silbunun yagan Salamon.

⁸Singay keikay to nakadavayal wadadan ven, nakan ee... mo k̄alug wamunon, yagan Munon Bwanabwein, kadiyakusan ven yagan Lasey.

⁹⁻¹⁰Bo kalasibwen yam mwasanin nein wankuyeim, peinan yag igeg, o bo ikous yam towen min-Yudiy yakamey kapsapos, bo tutan yag avakaein bisilamaw; mapuna Pawl idibakes tasiyas; ilana, “Tawaw, bweina bitayeiwas munon towen waseg; kukin bitakuks, adok bukuyamkwanes kaydod o wag, o ȳakids babaw adok bitamt̄amat.”

¹¹⁻¹²Tage taginiwag son takavaveis ilansa, “Munon towen kalbaleb; bweina bitadokons; kukin bitalugs kweitan ven, bo bwein.” Takalikay iligen asilivan tasiyas, ipiyev Pawl anilivan. Tabebaws-wan sivines beikuks, bidokons kid bineis munon yagan Piniks, mo bakayeiwas munon towen waseg.

Piniks wawnuwan sim to Kilit; munon towen wadon isekew wayals, awasas-nen isekew wayavat.

Kalouvat bwaw avakaein

¹³Yag yals mo iyagil, idokes bweina bakadavayal bakan Piniks, mo ikawes lon, k̄akuk kadavayala ven Kilit wadadan.

¹⁴Yag mo itet in wabomat, meinoy neim waven, singaya tawtoun, mamagina sink̄awein!

¹⁵Ta-m̄awan bak̄akuk peinan yag meinoy neim wamtem, singay avakaein, mo mweg kweitan kakit k̄akuk mo isigogonem oko wabwanit.

¹⁶Kan wangwanan sim kakit yagan Kilod, mawotet singay keikay waseg kakatimwen kewow, in wakunuwatan wag, kayawen.

¹⁷Ikous, ikawes yiwayon, mo isays wag. Aspwayat wag kid bitul wakunabub yagan Silitus, mapuna k̄alug, mo iyalaves.

¹⁸Neiyam nen igaw itotow yag, ilaves kaydod in wabwanit.

¹⁹Neiyam nen mo ikawes wuliyoug-wan wag, ilaves in wabwanit.

²⁰Yam babaw libgagay ivag; nag kakin k̄alas, nag kakin wutun, yag singay avakaein itotow. Kadoki bo bakamt̄amat.

²¹ Yam babaw waseg, nag kakamkwam kan. Kweitan yam Pawl mo itamanaw wamitem; ilana, “Tawaw, kadiloka bukuliganes aygag kweiboug; bitayeiwas ven Kilit bo bwein; tut townen bo tayagages, bo tayamkwanes youda babaw.

²² “Tage tut townen awoum beivag amipwayat, peinan nag bitamtamats; nag. Misinaka bitayamkwanes wag.

²³⁻²⁴ “Yey atapwaloul Yowbad waseg. Boug waseg gunaYowbad natakayob imekeig, ilana, ‘O Pawl, awoum beivag ampwayat; bo bukunek Sisal. O peinan kwanow Yowbad aygan, bo itam simwey tasiyas tababaws-wan, bo bikatinabweimiy.’

²⁵⁻²⁶ “Kadilok beibwein amnamiy, peinan animis Yowbad; bo bikamat mawana nilivnek. Dawag gog bo bibilag wasim.”

²⁷ Akweiy wik iyalavem wabwanit townen yagan Ediliy. Watapwan boug tasiyas wunataw mo idokes ven kid kadiyakusa nises.

²⁸ Mo bitakwanes bwani amawan vayovan; mo ivinis ovavin. Ovanim, ovanim, ovanim, ovanim; e, mo imlavag sinawey. Wankuyeim vayuwein mo itakwanes, mo imlavag sinawatan ovanim vayovan bwani townen.

²⁹ Aspwayat bakan wadakul, mata ge igulek wag, mo ilaves lon walivas wawawun wag; sivines kid ga-iyam.

³⁰ Wunataw inibwis kewow, ilansa, “Lon mwasanin bakanow wadabwen wag bakalev;” iyaweids gog, sivines kid bikalavis, bisawls kid bilisawemas.

³¹ Pawl mo idibek takalikay sen natakanaviys; ilana, “Kukin tasiyas bilisaweids, bo bitamtamats babaw yakids. Kukin bisesus, bo bwein.”

³² Mapuna takanaviys tasiyas mo ibwabwes vatulen kewow, ikalouw in wayol, iyetuwen.

³³⁻³⁴ Wankuyeim kakita beiyam. Pawl mo iguyem vagan bakakam; ilana, “Yam sinawatan kweivas nukusesus, ikubukub nuwamiy, nag kukwams. Kadiloka kukwams vagan gog biyamoveimiy; nag aveiyag bivag, nag; bwein-wan bitasesus.”

³⁵ Ilivan ikous, mo ikow bled, ikalin nuwan Yowbad waseg, initoug wamtem meiveka gamag yakamey, bled ikiv, mo isilamaw ikam.

³⁶ Amnem mo ibwein babaw yakamey, mo kakam.

³⁷ Meiveka yakamey wag makaywen adagan, lakatuy sinawanim sinawey teinim tatanok gamag.

³⁸ Kakam, kakamuweip, mo kalev kan, in wayol vagan kid wag bikayay.

Ikatugulek wag

³⁹ Iyam nen gaboug, nag teitan gamag iwtus ven townen, tage kaban awasas kakit alekel kakit nises; tasiyas wunataws idokes biyokons kid beikuks vagan wag bein wanuwan, mo bibilag wag.

⁴⁰ Mapuna ibwabwes yiwayon, lon kalisow wayol; kweiboug niyawanis avaveis naman vagan awoum bigogewn kid, tut townen mo ilikus vitulen

avaveis vāgan bigogewn; kanagon mo isenas, mo kākuk silmanin kawalaw towen.

⁴¹Kākuk ee... wag mo itul kunabub waseg, dabwen ibilag, kaysay iwaway wag wawawun, mo ikatagulek.

⁴²Takanaviys idokes bweina bikatimates tasiyas tasiwuns deil, mata igegays ge igalags mo bisawls.

⁴³⁻⁴⁴Tage takalikay towen sivinan biyamov Pawl, mapuna isilbwed asinap; ilana, “Tasiyas kalisiy ikamins gegay kadiloka bikaspepel bineis wayol bigegays bimgwayemas bineis wanakaew. Yakamey wankuyeim kaypap waseg mo bakagay bakan wanakaew.”

E, māwan sona mwamovem meiveka yakamey kan wanakaew mo kasap waven.

Kases sim yagan Melit

28 ¹Kagalag kan wanakaew; ven towen gimgilis imeis mo ikavtagis siven yagan Melit.

²Tasiyas nag isināemas, nag; bo isiwyoubumas. Amaloulun, peinan kweis, mapuna ilabemas, ikavlakes imakov, kakamunuw.

³Pawl in ikow amweilok sinivtanok, isen wākov, mwatet gog nises amweilok towen wanuwan; muymuyan kov isimkwen, isap, iged naman Pawl.

⁴Ven towen gimgilis ikines mwatet towen ikakuwātay wanaman Pawl, mo ilansa, “Mounid tawayin gamag taw towen; nag kadilok son mwamovan bises; nag iwgwel wabwanit, tage mwateta nāwen mo iged, vāgan kid bikatimet.”

⁵Pawl ikatsap mwatet wanaman, mo ikalivatow, in wākov; nag ikatoun, bwein-wan ises.

⁶Idokes kid naman beilol, o bikalouw wapwepway beimat kid; ikayamats ee... nag aveiyag ivag; mo ikanavin ninous, idokes kid yowbad teitan.

⁷Sim towen gimgilis siguyaw avakaein Pubiliy, napwepway nises ven towen waseg; anwbabwal yakamey kasesuna ee... kweitoun yam, singaya ge isiwyoubum, guyaw towen.

⁸Misumkwey towen Pubiliy taman nises wabunatum, ikatoun, itakālon won, mwaliyes isawel. Pawl isiw wanbunatum, initoug Yowbad waseg, isen naman wāwon, mo ibwein.

⁹Wankuyeim takatounsa babaw sim towen gimgilis nimeis, Pawl initoug pines, mo ibweins.

¹⁰Mapuna isiwyoubumas bwānabwein, o igaw tutan bo bakākuk mo itanouys wuliyoug makaw isekemas.

Pawl isap Lom

¹¹Tibukon kweitoun ikous, mo kātouw wag akitan nikayamat wāsim towen bulbweilim waseg. Min-Aleksanidel siwag makaywen antabuy mamagina tawaw papap asteiy.

¹²Kalug Sulakous kases kweitoun yam.

¹³Kakuk mo kayeyewousa kayeyewous ee... mo kalug Legiyam, kamasis. Iyam nen gaboug, yag in yals mo kakuk silmanin Putiyol, akweiy yam mo kalug.

¹⁴Ven Putiyol waseg kaban Yeisuw nagamag mwasanin, ilivans, “Kadiloka kumeis wamabunatum, amabwabwal yakamiy.” Katam, kases katanok wik. Wankuyeim mo kanoun waked silmanin Lom.

¹⁵Yeisuw nagamag, tayakelesiys mwasanin nisesus Lom; bo iliganes livnem yakamey bo bakan Lom, mo imeis waked silmanin bakalouvat; e, imekemas ven yagan Apiyos Maket, o kweitan ven Buntuman Masis Bunatoun. Pawl ikines budan tasiyas mo ikalin nuwan Yowbad waseg, ibwein amnan.

¹⁶Kasap Lom, gabman mo itam Pawl nabunatum tatonen vagan kid bisikes son takanaviy teitan bikayamat.

Pawl igeiguy ven Lom waseg

¹⁷Yam kweitoun nein wankuyeim mo idawes min-Yudiy situwaweiks bimeis. Ikatuyouns imeis, mo idibakes, ilana, “Tuwag yakamiy; yey makava asiw wadeil. Nag aveiyag avag sidayas wasigeis, o nag apiyev datammwayas asisinap, nag. Tage bo iyousigs Yelusalem waseg mo itameigs mina-Lom takaleiwags wasigeis.

¹⁸⁻¹⁹“Bo iyateleigs, nag go ibanēs agusinap kalbaleb, nag. Tasiyas mina-Lom takaleiwags idokes bweina basap wamnat banoun; tage min-Yudiy ilansa, ‘Awoum. Kuweiys taw townen, peinan takalbaleb.’ Mapuna alivan, alana, ‘Sivinag Sisal bikaleiwag.’ Nag sivinag bayateles min-Yudiy wamatan Sisal; nag. Gunaked kaditanok-wan, ked townen waseg manoy.

²⁰O silawun gunyatal townen sivinag bitalivans sigwey yakamiy, mapun to nadaweimiy bukumeis waseg yey. Kukines agusen wanamag niyawanis, o min-Yisleil yakids tanmises Yowbad igaw mo bikatinabweids, o inawotet townen silmanin yey nasiw wadeil.”

²¹Tasiyas ikatimapus aygan, ilansa, “Min-Yelusalem nag ileles malet vagan bikatimlakemas livaneim yak, o min-Yudiy meinoy nimeis palawen, livaneim kalbaleb nag isekemas, liwon waseg o asilivan waseg, nag.

²²“Sivinem bakaligen nanoum yakoum, peinan kakakin ven babaw gimgilis ivtokays livan sinap townen waseg, Yeisuw nagamag amisinap.”

²³Ikaleiwags kweitan yam igaw mo bimeis biliganes Pawl anilivan. Yam townen nimeis wanbunatum, singaya babaw gamag. Gaboug isilamaw anilivan, ee... in kwayav mo iyakous. Yowbad nakaleiwag livanen nisekes. Moses nakaleiwag ivin, o tasiyas palopits sikaleiwag ivin, ikatimlakes wawun asilivan, vagan kid bisimounids Yeisuw waseg.

²⁴Mwasanin gamag mo iliganes anilivan Pawl, isimounids; mwasanin nag, ipiyaves.

²⁵Ta-mawan ninous bilatanes bimlavags katanok-wan, mo inounas. Nakabiyokous Pawl anilivan mawana, “Mounid anilivan Yowbad Kululuwan tamumwey wasigeis. Palopit towen Isaya nikatipel nisekes anilivan towen-an.

²⁶“Ilana, ‘Kunekes gamag tasiyas, kudibakes mawana:

Bukuliganes, tage nag bukukwakins.

Bukukines, tage nag bukuwtusis.

²⁷Peinan gamag tasiyas ninous bo imouvit,

bo ituy tiges; bo ikaw mites;

mata ge mites waseg beikins, o tiges waseg beinegs,

bikakins mo bikanavin ninous,

bavages kid beibweins tasiyas. Nag gog.’

²⁸“Kadiloka bukukwakins Yowbad anilivan bo nisekem yakamey, ikayabem, bakan tobwag ven gimgilis bakasekes; tasiyas bo biliganes; e, Yowbad mo bisiwyoubus tasiyas, bikatinabwes.” ²⁹(-)

³⁰⁻³¹Akweiy bweilim Pawl misik wanbunatum tatonen, peinan bo iyamiyis bunatum towen; nikaypuls siney tabebaws tasiyas ininekes, bo iguyes Yowbad nakaleiwag waseg, o ikatimlakes sinapun daGuyaws Yeisuw Kelis. Bwein-wan illivan, peinan nag teitan gamag isilbwed anilivan.